

當問題少年遇上問題少女

作者: 蛋撻王子

Powered by [紙言](#)

1.混雙球隊的成立

1636年5月15日，滿清立國

1644年6月5日，滿清入關

1662年6月1日，南明滅亡，清統一天下

1912年2月12日，宣統帝（溥儀）宣佈退位，清朝正式滅亡

羽毛球，係香港黎講，係一種好受歡迎嘅運動。每個學生係小學階段，總會係體育堂上學習羽毛球。而羽毛球亦被一眾家長選擇俾自己小朋友學習嘅課外活動之一，但係往往小朋友升到中學，就會立即放棄。

所以係學界運動場上仍然參賽嘅學生，佢地都係一心一意打羽毛球，有人為拎獎杯，有人為做運動員，然後保送入大學，但係每個人係場上目標只有一個，就係擊敗對手。

球賽上，有男單、女單、男雙、女雙以及混雙

當中以單打最受歡迎，因為勝者可以獨自享受勝利嘅喜悅

而最少人參加嘅比賽就係混雙，因為傳統男校及女校一眾精英並唔可以參賽，所以，係混雙嘅世界，永遠就係男女校天下，所以羽毛球可以話係一個齋校不能攻破嘅結界

但係今日，呢個結界將會被打破

九龍華仁，一間傳統男校，有唔少出色嘅校友，與香港華仁呢間兄弟校，係九龍及香港一齊同其他傳統男校分庭抗禮

真光女書院，四間真光之一，被稱為真光二家姐，佢地同九龍真光係九龍區與一眾女校不分上下，而香港島果邊，就靠大坑真光一間就足以同其他女校對抗，連同鴨利洲真光，係女校界，冇邊間學校想係學界上遇上著天藍色旗袍嘅真光軍團

就係今日，學界體育聯會宣佈，男校可以同女校組成混雙去參賽，唯一條件，必須兩間學校係同區內，以防止學生練習過於辛苦

就係呢個決定宣佈後，九龍華仁校長以及真光女書院，兩間學校管理層以及體育老師軍團，係對面嘅青年會酒店中，進行一個會面

一位中年髮白嘅男士飲一啖杯中嘅熱奶茶後，向對面一位女士詢問

「岑校長，對於我地學校建議，妳有冇任何意見？」

岑校長正正係真光女書院校長，多年黎佢同九龍華仁保持良好關係

「劉校長，你呢個建議都唔錯，我同一班老師都好有興趣，而且真光校董會都批准左我地油真可以參賽，當中嘅細節同埋練習....唔...」

「我明嘅岑校長，始終...我地學校都係單性學校，不過應該問題唔會好大，我會安排閉門訓練」

「劉校長，如果每隔一次去大家學校練習會唔會更好？」

「呢個都係一個好方法」

「嗯，咁希望我地呢隊聯校校隊會有好成績啦」

就係一間酒店café內，九華同油真組成左一隊聯校羽毛球隊去參加來年學界混雙羽毛球比賽

九華嘅羽毛球隊內，好快就傳出呢個消息，不過反應並唔係一般熱烈，始終大家都唔想同一個未同自己練習過嘅異性球員出戰，應該話，係唔想做白老鼠

另一邊箱嘅油真亦都係一樣，冇一個女仔想做白老鼠

但係兩間學校校長有令，要組成一隊聯隊參賽，於是體育老師唯有向非校隊成員同學埋手

我自己一個人坐係課室之內，望住樓下操場同學打羽毛球

2.只係一個球僮

「最多三板，1...2...3...完」

係操場嘅同學正如我所料，只係猜到3板

「阿傑!!!」係我身邊出現嘅，係學校中少數傾得埋嘅好朋友，袁文浩

「唔?咩事?」

袁文浩坐係我張檯上，慢慢同佢講自己所聽到嘅消息

「我剛先聽到呢，我地學校今年會同隔離真光組成男女子聯隊去打混雙喎」

「我方咩興趣」

我望一望球場，嘆左一聲

另一邊箱，係九華不遠嘅油真，一眾羽毛球隊隊員集合一齊

「Miss潘呀!!!點解我地要夾九華班和尚呀!!!」

油真嘅羽毛球教練Miss潘以一個命令口吻說道

「老佛爺有令，誰敢不從」

「但係我地自己各人都有單雙打，仲點分身去打混雙呀」

「係囉!係囉!!」 「我地要練波之餘又要溫書」

「有邊個同學自願同九華仔組隊嘅舉手?!」

「靚唔靚仔先?」 「係咪高富帥先」

Miss潘經常俾呢班問題少女搞到頭都大，但係校長有令，要組成聯隊，而自己手中學生冇人有興趣，點算好呢?忽然，有一個同學提出左建議

「Miss潘，妳有冇諗過叫返阿晴落場打呀?」

Miss潘一聽到阿晴呢個名之後，自己都靜左一陣，佢自己心中默默咁講

「佢應該係一個天才少女，不過因為佢自己性格，令到同隊友唔夾，最終佢已經好耐冇出現過係羽毛球隊練習，另外最大嘅問題係....」

有其他隊員係到表示擔心

「佢呀?我怕佢去到同人打架咋」

「係囉，佢脾氣又唔好，性格又孤僻，佢好似冇朋友架喎」

「好似係，食飯都見佢自己一個人，放學就急急腳咁走」

Miss潘咁咁手招魂

「好啦好啦，而家開始練習」

Miss潘回頭一望，一個熟悉嘅身影正好轉身

返到屋企，坐係書檯前，不禁問自己，係咪唔會再打羽毛球?

係電腦中，文浩係FB到Msg我

[喂，今日紫菜彭問我打唔打混雙喎]

[你想去咪去囉]

[你真係唔打?]

[唔係太想，你都知道...]

[明嘅明嘅]

[但係你應該唔係想打波咁簡單喎]

[邊X到係呀!]

[你經常望住拎羽毛球拍果個真光妹架喎]

[咁...有機會...交流下都好呀]

[我怕你同人未交流到就輸21分咋]

[咁點呀?]

[我唔比賽者，我可以陪你練波架嘛]

[都係你最瞭解我]

[有咩聽日先傾啦]

係羽毛球場上，我同文浩兩個人係到拉筋

「你真係唔返黎羽毛球隊呀?」

我擰一擰頭「唔啦，舊年如果唔係我失誤，我地就贏左冠軍，我係球隊罪人」

「都係一場波者」

「好!同你練波，希望你唔好映衰我地學校啦」

「其實阿sir想搵兩個人過去拍班女仔，仲有一個位喎」

「唔啦，費事阻你去識女仔啦，你知啦，我一出場就好多人問我拎簽名架啦」

「好多基佬丫嘛」

「首先，我地今日練咩?」

「都係練接波啦」

“嘍!!!”我開出一球高遠球出黎，而文浩都企喺位接波，如是者我開足三十球俾佢接

「係喎!!你幾時過去見班真光妹?」

「唔知架，可能等齊兩個人先囉」

「你真係要練好d技術先過去喎」

「如果你一齊過去打就好啦」

「唔洗啦，我係球隊冇地位架啦」

「所以你應該用呢個機會，去證明自己仲打到波」

「唔好啦」

文浩拍一拍我膊頭「我幫你交左名啦」

「下!!!你...」

「佢地班正選球員真係冇個肯去呀，你就當過去真光睇下女啦」

「真係冇你乎，講明，我唔落場，最多練波」

「冇問題」

「咁幾時過真光?」

「聽日放學去同佢地見面者」

「有成個暑假俾你同d女夾，你得嘅」

3.初次踏入隔離的女校

放學後，九華嘅羽毛球隊係禮堂集合，由對眼眉好似紫菜咁粗嘅彭sir宣佈事項

「好，各位同學，我地已經決定左派邊兩位去同真光組隊參賽啦。因為你地成班冇人肯同人夾，所以我搵左球隊B組球員去。第一位，袁文浩，第二位，常子傑」

當眾人聽到我個名之後，大家都好驚訝，因為我已經一年左右冇參賽

「傑仔參賽？」「佢已經走返出黎？」

彭SIR望一望大家「傑仔佢只係落名者，佢最多會幫手練波，至於出唔出場，我都唔知」

估唔到，我一年冇參賽，就已經落左去B隊果到

我地學校嘅校隊，係分為A同B兩組

A組，係公開組，或者係代表學校出戰學界嘅組別

而B組，就係一D實力次一等嘅隊員所組成，佢地責任只係負責友誼賽、或者負責球隊行政。除非可以係校內賽打低A組成員，否則，B組只可以企係對方後邊，所以今次同女校組隊，大家都冇咩興趣

第二日放學，彭sir帶住我同文浩兩個人，踏入左真光女書院

一間我地經常用望遠鏡裝佢地上堂嘅女校，而且有不少師兄會搵返呢間女校同學做女朋友

如今，我地踏入左呢間學校

當我隻腳一踩真光範圍果一刻，就已經覺得有好多雙眼望實我地

果種感覺...好唔自在

正當彭sir同對家教練傾緊計果時，有個小妹妹走過黎碌大雙眼望住我地

個小妹妹不停咁上下打量我地兩個，於是，文浩就開聲同佢打招呼

「呀...小妹妹呀？」出於禮貌，佢稱呼對方小妹妹，不過，佢中伏了

果個「小妹妹」用非常高嘅聲線係到同我地講野

「咩小妹妹呀!!!我升F.5架啦!!我邊忽似小妹妹呀!!!」

文浩仲係要挑戰眼前呢個「小妹妹」

「F.5?唔似，俾盡F.2」的確，呢個小妹妹似F.2多

然後「小妹妹」拎起塊羽毛球拍，想一下拍落文浩個頭到，佢好快下意識咁一手捉實塊拍

「小妹妹」好用力咁想搵返塊拍，但係一個女仔，又點夠D男仔大力？

「喂!!放手啦!!!喂呀!!!死人頭!!!識唔識讓下女仔架」

「下!!妳頭先唔係好惡架咩？」

「放手啦!!」正當文浩想放手果時，我叫停左佢

「同學，妳唔好同佢鬥力先啦，一陣佢突然放手妳就跌低架啦」我好心咁提佢

果然，文浩立即放手，而「小妹妹」成功拎返塊拍之餘亦向後跌

為左保護「小妹妹」，我立即一個箭步上前，捉實佢隻手，緊緊拉實佢

「小妹妹」面紅紅咁同我講左聲唔該之後，就返左去真光妹軍團果邊

「賤格!!!」然後，我地兩個換黎一大群真光妹嘅指責

睇黎，佢地係有心玩我地兩個

4.第一個認識嘅小妹妹

“啪啪啪啪”一班真光妹嘅指摘聲隨住佢地教練嘅招魂而完結

「好啦妳地!!唔好玩人地啦」

然後佢地好似好唔開心咁「噢~玩完lu~」

「兩位同學唔好意思，班女仔玩得過份左少少」

「呀...唔緊要...唔緊要」

「我係佢地主教練Miss Poon，兩位都係來年同我地組合雙打嘅同學?」

「呀....其實....我係幫佢手練波」我好尷尬咁講

Miss Poon望一望文浩「就係你會拍我地嘅同學?」

「呀...係呀教練」

「我同彭sir都知道，今次係校長堅決要組成聯校隊伍出賽，所以你應該明白，我地都唔會派最強嘅隊員出賽」

「我...我明白教練」

「但係唔代表你可以馬馬虎虎咁練習，記住，暑假同來年你地兩個會跟我地真光練習，唔好得過且過」

我地兩個立即好似軍人咁立正企好「明白!我/佢會認真練習」

然後文浩望一望我

「咩呀!我過黎幫你練波咋，咩呀!」

「我同你介紹下會同你地聯絡嘅同學，Chloe!過黎丫」

Chloe呢個名應該係d好靚，好高貴嘅女仔用，點知...

「我就係負責同你地班和尚聯絡，你地所有事，都係由我負責」講呢番說話嘅，就係剛先整估我地嘅小妹妹

文浩又再一次同佢有語言上嘅衝突「呀...小妹妹呀」

「咩小妹妹呀!我升F.5架啦!!!仲有!!我係你地其中一個嘅拍擋!!」

文浩一面不可相信嘅樣「妳呀?」

「咩呀!!我好失禮你呀!!!我著住旗袍同你比賽都得呀!!!」

佢地兩個差唔多要講手，而其他同學都有打算阻止佢地兩個

「呀...教練，就係呢個妹妹同我拍檔呀?」交浩一手推住Chloe個頭

「你...你珍惜下我呢d美女好唔好呀!!!!」

教練俾呢Pair人搞到哭笑不得，佢地第一日已經為大家帶來好多笑聲

「唔係，你拍檔呢，佢今日唔得閒，我已經同佢講左，下兩星期大考之後，會開始練習」

「哦，明白」

我地同教練寒暄幾句之後，就坐埋一邊睇真光練習

佢地實力都唔差，每一個隊員都好有實力，正當我留心睇果陣，Chloe妹妹企左係我地面前

「咸濕佬!睇完未呀?未見過女仔呀!?!」

「呀妹妹呀?妳唔洗練習咩?妳點拍我比賽呀?」

「你...你好想睇我著運動衫咩!!」Chloe佢面紅紅咁對住我地講

「我對妳呢個小妹妹冇興趣，我只係好奇點解我拍檔唔出現者」

「哦，佢呀?我都唔知呀，或者你地正式練習果陣可以傾下計嘅」

「佢係咁奇怪嘅咩?」我多口問一問

「如果你想知嘅，我可以講少少俾你地知嘅」

「咁妳講啦」

「陪我去飲野先啦，你地請」然後我地兩個就俾呢位小妹妹捉左去飲野

我地三個坐係附近一間普通冰室，Chloe佢要左杯紅豆冰，而文浩就飲佢嘅凍檸水，我呢?我飲我最愛嘅茶走

5.一對歡喜冤家的誕生

「喂，小妹妹」

「都話左我唔係小妹妹囉，我有名架」

「我地夠知妳叫Chloe囉，不過妳咁矮，學咩人叫Chloe呢？」文浩不停係到串Chloe

「咁你可以叫我中文名架嘛！」

「咁妳叫咩名丫」

「做咩呀？想追我呀？」

「痴線」

「我叫余嘉靜，叫我阿靜就算啦」

「妳一d都唔靜」

阿靜係檯底踢左文浩一腳「係咪仲串呀！」

「咁阿靜，文浩個拍擋係點架？」

「佢呀....佢俾教練稱為天才少女，我地呢個隊員打羽毛球嘅天份真係好好，只不過...」

「不過咩？」我開始對呢位天才有d興趣

「佢性格好怪，完全唔鍾意同人傾計，不論食飯，小息佢都係自己一個人，放學會以極速離開學校」

「佢唔會練波架咩？身為校隊，佢都要練波架」世上竟然會有呢種人？

阿靜擰一擰頭「佢好少黎練習，而且佢連球拍都唔會準備，佢用學校提供嘅公家拍」

我第一次聽到羽毛球隊嘅隊員係冇自己嘅球拍而要用學校嘅公家拍

就連文浩都覺得佢拍檔好奇怪「咁佢打學界果時呢？」

點知阿靜俾我地嘅答案仲令我地覺得奇怪

「佢從未打過學界比賽架」

一個未打過學界比賽嘅球員？俾教練稱為天才少女？

「但係...妳地教練點會叫佢做...」

阿靜碌大隻眼望住我地「講你地知，你地都唔會信，我都係要親眼見到先可以相信。佢可以用一塊公家拍，著一對白飯魚，將我地學校個學界女單冠軍打到體無完膚，唔止係女單...連女雙兩個隊員分別同佢打，都輸左。佢...將我地四間真光嘅羽毛球隊都打低晒」

「但係咁犀利嘅球員...竟然唔出賽？」

「嗯，呢個係我地真光女書院，應該係四間真光最大嘅謎團」

「咁靜靜呀，妳有冇佢張相呀？」

阿靜聽到文浩咁樣叫佢，立即紅都面晒咁樣「你...你咁叫我架...」

「個名幾襯妳呀」

阿靜面紅紅咁咬左下唇，然後拎出電話再搵左好耐

佢呢個隊友真係神秘，連佢FB都係用粉紅色玫瑰花做profile picture，而且佢FB都只係同阿靜係球隊上嘅對話

「拿，佢D相呢，就永遠都係著校服，我好難先搵到俾你地睇」

阿靜將羽毛球隊照俾我地睇，果張仲要係年度羽毛球隊好正經嘅相

呢個女仔，真係好正經下。佢扎住真光招牌仔辦加埋套旗袍校服

其實佢好似周可茵

「佢叫咩名呀？」我邊睇張相邊問

阿靜飲一啖佢嘅紅豆冰「佢叫佟梓晴，Jessie Tung。佢仲係我地學校嘅高材生」

我地三個踏出冰室，係禮貌上都要問下阿靜住邊。不過佢真係老實不客氣

佢將個書包扔俾交浩，然後用一個命令口吻對佢講

「你!送我返屋企!!」

「我?點解呀!」

「俾晒你拍擋資料你啲!!送下我返屋企都應該呀?我一個女仔返屋企好危險架!」

老實講，我真係睇唔到妳有邊忽會有危險

「咁阿靜妳住邊呀？」我都係好有禮貌咁問佢

「我住黃埔」真係啱呀，文浩又係住黃埔

「咁你就送阿靜返屋企啦」

「唉...行啦，搭地鐵啦」

「我要搭巴士!!」阿靜嘟長個咀抗議

「你陪佢啦」

於是文浩就俾阿靜拉左去搭巴士，而我，就自己慢慢行返屋企

估唔到，係我地隔離嘅女校會有d咁嘅學生係到

6.問題/天才少女的出現

第二日放學，文浩死都要捉住我

「你搞咩呀？我唔玩菊花架啫」

「總之...係陪下我好唔好？」

「放學都要人陪？」

「行啦，一陣你就明架啦」

我同佢慢慢行，去到真義里果時，佢停低左

「你搞咩？係真光附近停低？」

「呀....一陣講你知」

「難道你想伏擊你個拍擋？」

「唔係呢...」

好快，所有謎都解開晒啦，係我地企係到之時，同時亦係真光放學時間

係我地身邊出現左一把女仔聲

「喂，等左好耐？」果把聲好熟，而且好開心咁

我一轉身，係阿靜自己一個係學校行出黎

「乜咁啱呀，文浩黎伏擊佢拍擋啫」

不過文浩面色有d難睇

「Jessie？佢已經走左啦」

「咁快？咁你係到等邊個呀？」

「我....我等...靜靜架」

佢等阿靜？搞乜？佢地幾時咁熟？尋日先識咋啫

「你地...搞乜？」

「阿傑呀...呢到學校...行遠d先講啦」

「哦...哦...」我俾唔到反應佢地

不過我地幾個走果時，有不下3個應該係阿靜嘅同學笑住咁望住佢

我望一望佢地兩個，行得好埋

噢~~我終於明啦，春天來了啦

「兩位，我嘅任務已經完成，告辭」

文浩聽到之後，非常緊張

「喂....未得呀」

下?未得?

「我唔做電燈膽啦，你地兩個去甜下啦」

阿靜面紅紅咁對我講

「Jessie話，佢考慮出賽」

「咁妳同文浩講咪得囉，我唔洗知架，我負責同佢練波」

「咁你真係唔出賽呀!？」阿靜好直接咁問我

我用一個怪怨眼神望一望文浩

「你講左幾多野出黎呀?」

「全部」

呢個真係一個老婆奴黎...

就係咁樣，文浩係24小時之內就俾阿靜攻陷左，而我就開始電燈膽生涯

到左大考後，我同文浩兩個人走入真光，開始同佢地一班真光妹練習。

係球場上，我不停開波俾文浩接。雖然佢係B隊成員，但係實力上都有返咁上下

Miss Poon見到我開波技巧唔錯，於是我就俾教練委任左去專門開波俾其他球員接

呢一班女仔打羽毛球實力唔差，可惜基本功弱左少少，未能夠將個波打去眼望嘅目標

「打準D!係!準D...唔好殺波住」教練不停向一班隊員落指示，現場一班隊員都嘻嘻哈哈咁講笑，訓練時比較輕鬆，然後，大家突然間向門口望過去

係門口，有一個扎起髮髻，個樣有少許高冷嘅女仔企左係到。佢著住普通體育校服同埋白飯魚。佢慢慢行到教練身邊，打左聲招呼，然後就去拎起一塊公家球拍，行去隊尾排隊

阿靜走黎我身邊同我講「佢就係Jessie啦」

我一球一球咁發出去，終於到Jessie接我嘅發球。既然佢可以打低咁多對手，即係實力上有返咁上下，所以我都打算試一試佢實力有幾多

我開出一個高遠球，係好普通嘅一球

Jessie望一望個波，輕輕退後幾步，然後將個波猜返俾我

佢呢一下猜波，個波嘅落點非常靚，係界邊落地。就憑佢呢一下，就顯出佢實力同其他隊員唔同

猜完波之後，佢又排返去隊尾。佢回左10球左右俾我，每一球落點都係同一位置，絲毫不差

7.冷如冰、寒如雪

「好!!下個cycle開始練習反手」教練每一次都會叫大家猜波練習

終於再到Jessie，佢每一下猜波，都俾我覺得佢有真實力，佢每一下動作都係一氣呵成，完全冇任何多餘動作，而且每一球落點都好準

“啪啪啪”教練一貫拍手要大家集合

「好，而家開始各自練習，混雙果兩對組合，你地可以用一號場練波，大家夾多d」

於是我地4個行左去一號羽毛球場

文浩想同Jessie打聲招呼，畢竟大家都係拍檔

「妳好呀...」

正當文浩想介紹下自己果時，Jessie已經好快行開左，佢真係同傳聞一樣，冷如冰、寒如雪

今次係混雙組合組成以黎，第一次互相交流下，所以好多人都黎睇下呢對混雙組合嘅表現，亦有人想睇下我同文浩嘅實力，佢地1 on 1單挑

Jessie首先開波俾文浩，佢地兩個頭幾下係試探下對方嘅實力去到邊

係幾球普通猜波之中，已經睇得出Jessie實力遠遠係文浩之上

係呢對混雙組合交流賽之中，文浩首先發難，即係殺波

“啪!”一聲，個波直飛Jessie右手邊，文浩打出呢一球，務求要Jessie餘下時間都要係防守下進行球實

羽毛球直飛向地下，可惜個波嘅落點唔好，非常容易化解

不過Jessie佢就利用呢個機會去反攻文浩

Jessie輕輕踏出右腳將個人橫移，就係佢右腳落地一刻，右手同時揮拍

“嘍!!” Jessie打波嘅聲音就好似其他人殺波一樣咁響

個波以高速飛向球網，然後係網頂輕輕彈左一下，再跌落文浩嘅場區

就係呢一下，我就知道Jessie實力唔簡單，佢係專登瞄準網頂打過去

換為Jessie開波，佢就咁開左球普通嘅波出黎，文浩同佢都猜到幾下

但Jessie突然間一下殺球，係跳殺

球速好快，軌道好高，明看以為會出界之際...個波擦一聲，係外線最邊緣落地，係“in”

Jessie用左兩球，就話俾文浩知，同佢拍雙打，要以佢為中心

休息時間，文浩坐係我身邊，正當佢想開口之時

「我知你想講咩，你拍檔實力唔野少」

「佢遠遠將我拋離，你見我出晒汗就知，我完全俾佢帶住黎打」

「佢果球跳殺，真係好靚」

「你去唔去挑下佢？我覺得你可以打贏佢啫」

「唔啦，我黎係陪你練波，仲會唔會去挑佢機？」

「未必啦，一陣我拍佢，睇下同佢夾唔夾仲好」

8. 性格孤僻嘅拍檔

休息過後，文浩同Jessie對上Chloe同另一位隊友Michelle

Chloe首先開波俾佢夫君文浩，哎呀~~真係甜L死囉，然後文浩回返個波過去

之後Michelle就開始進攻，係佢殺波果一刻，Jessie已經好快咁移位企到有利位置。當個波飛到之時，佢已經準備好輕輕迎接呢一球

而佢呢一下輕輕出手，打出黎嘅聲音就可以聽出佢同其他隊員嘅分別

佢，絕對唔係池中物

個波過返半場，Chloe唔知係有心定冇意，將個波回返去文浩到，等佢有機會殺波

不過Chloe用力過大，飛過左文浩所企嘅位置

正當文浩轉身時，Jessie塊拍已經到左

係場外，我睇得好清楚。Jessie佢回左波去對半場後，就立即企到中間，呢個係羽毛球，壁球、網球黎講係最最最基本嘅常識

不過學界有好多人在乎跳殺呢一下得分動作，所以好少人會練基本功

好明顯Jessie基本功上係非常紮實

係呢場練習中，Jessie差唔多一個人拎晒所有分咁滯

完場後，佢好快就放低球拍，想離開球場

「呀...Jessie呀...」文浩想叫住佢

Jessie用一把冷漠聲音回應佢「我後你前，教練要求我黎練波我會到，有事就係球場講，私下我同你冇任何交情」

好快佢就飄走左，此時Chloe過黎文浩身邊

「慢慢你就會慣架啦，Jessie佢性格係好孤僻，未有人見佢笑過」

「佢總唔會連Group project都冇野同人講掛？」

「我同佢同班3年，佢真係一個人做晒份Project就算，我地只係free ride佢份功課」

「怪人」

不過呢名怪人，實力真係深不可測，佢係天才定係後天努力呢？真係冇人知

佟梓晴好快去更衣室淋浴，用毛巾抹乾淨個身後就離開學校

佢去到附近一座大廈其中一個單位，入屋後，有個小朋友歡迎佢

「晴晴姐姐」

「乖啦，我地開始補習啦好唔好？」

兩小時後，佢離開呢個單位，又再去另一座大廈，再次重覆所做嘅事

今日係星期六，所以做補習嘅節數比平日多一節

完成第二個學生之後，佢係附近買左個飯盒同一碟菜外賣

佢行到橫街，係一幢好舊嘅常樓慢慢行上去....去到頂樓再推門出天台，經過少許雜物後，再行到一間鐵皮屋前，拎出鎖匙，打開閘及木門，返到佢自己屋企

放低衣服後，佢拎住餸菜，放係張小檯上。佢打開檯上嘅光管，開著部手提電腦，邊上網睇羽毛球比賽邊食飯

食完飯後，佢換上體育服，係碌架床上層拎出一塊學校的公家球拍以及一堆羽毛球，走到屋企同樓梯間嘅空地，係一個用膠紙痴成嘅羽毛球場上，自己不斷練習發球以及揮拍

呢個動作，佢每日係溫習過後，都會用90分鐘左右去練習

「拍我果個能力一般，反而另外一個，實力應該同我差唔多，或者仲高過我。如果可以同佢拍，可能會更好。如果可以同佢單獨打一場，我就可以摸清佢實力」

9.退下來的原因

練習完後，我再一次同面前呢對夫婦坐埋一齊

「子傑，你覺得Jessie實力如何？」

「深不可測」我飲一飲奶茶後答

「不過佢脾氣真係好古怪」

「Jessie?係呀，佢真係好孤癖，完全唔鍾意同人講野」

「佢連上堂都係咁？」

「冇錯，就連佢個姓氏都好少人用」

「佢姓咩？」

「佢姓佟，佢叫佟梓晴」

文浩聽到之後R晒頭「通常係識『童』，用『佟』的話真係好少」

「係架，所以好多同學都對佢好有興趣」

「子傑你下次會唔會同佢交流交流下呀？」

「有機會先啦，不過今日你好失威喎，俾Jessie帶住黎打」

「其實第一下睇佢開波，我都知道佢實力係我之上」

「要打退堂鼓嘛？」

「唔打!!!正如我祖先袁崇煥名言『屌那媽!頂硬上!』咁樣」

「嗯?文浩你係袁崇煥後人咩？」

「係呀，我地同一條村架」

文浩一直以自己係抗清名將袁崇煥後人為榮，佢嘅『屌那媽!頂硬上!』更係文浩名言之一，佢祖先嘅金句亦都令佢俾學校罰企左好多次

如果...佢知道我家族嘅底細....佢會唔會滅左我架

係考完試嘅日子，基本上每隔一日就要去真光到練習，而唔需要練習嘅日子，我就會係屋企溫書同出去跑步加操

如果唔夠體能嘅話，落場打比賽基本上同輸左冇分別

今日我地又返到真光練習，我一早就返到去球場等練習

果然係女校，我真係最早一個人到達，於是我就拎起塊拍同D波，自己係到練習發球

如果發球發得好，足以左右成場比賽

我不停係到發球，務求每一球都發去同一點

我發完一筒波，自己執好，再發

然後到我發完第五筒果時，我身後出現一把聲

「同學，你真係同傳聞一樣，非常努力練習」

我轉身望一望，係真光教練Miss Poon

「潘教練早晨」禮貌上，我都要打聲招呼，如果係我地自己教練的話，我會大聲叫佢『死紫菜』

「你每一球發球落點都非常準，我d學生都對你有讚冇彈」

「教練妳太過獎啦，我發球仍然一般，而且我仲有好多野唔識」

「例如？」

「就...就好似...」我口窒窒咁樣，唔知講咩好

「例如你係球場上嘅心理質素，你唔太擅長打逆境波，亦唔擅長打稍微領先嘅波。你係屬於果種，一發球就要不停猛攻對手果款。要係最短時間內，將自己同對手距離拉開」

我望住教練，心中諗緊點解佢可以咁清楚我嘅事

「係彭Sir同我講，去到舊年為止，你都係學校A隊球員，亦為學校立過唔少功勞」

「冇錯，可能我真係不知天高地厚...」

「每個單打嘅羽毛球手都會遇上呢種情況，我試過」

「所以我就想退落黎」

「你知唔知點解學校要迫你黎雙打？仲要係混雙」

我擰一擰頭

「因為我同彭sir都覺得，你同我地學校嘅問題少女會好夾，你兩個好有機會打到入八強」

「八強就夠？」

「一個問題少年同問題少女所組成嘅組合，入到八強都好好」

潘教練企起身望住我

「你會唔會出賽？」

「我...暫時都未必會」

潘教練笑一笑「同我預期嘅一樣，不過你仲有成個暑假去決定。考慮下」

「我會」

10.獨取15分的天才少女

今日練習內容，仍然係基本功，但係教練仲安排左另一樣野俾我同文浩練習

就係拉筋

「呀.....」 「呀.....」

我地兩個各自俾幾個女仔用力推個背脊，另加佢地用雙腳頂住我地雙腳，盡量幫我地整一字馬(打橫果隻)

「唔好望我地下邊呀!!!咸濕仔!!!!」

「我冇望呀!!我邊得閒望呀!!!」

「低d啦!!!」我身邊嘅女仔係到俾指示我

「冇啦!!!最低啦」

「咁廢架你!!!好腰好腎好男人呀!!!!俾d腰力啦!!!」

我連肌肉都未拉鬆拉長，就已經俾呢班女色魔不停虐待

文浩果邊，佢已經口吐白泡，佢下一個環節好似要俾人由三樓扔落街

「呀.....幾位女俠呀，點解妳地唔去糟質妳d同學，而係黎咁樣對我呢?」

「有我地幾個服侍你，你執到啦。講!!平時有冇用望遠鏡裝我地上堂!?!」

「冇呀!!」

「即係我地唔靚女啦!!!!姊妹!!!再推低d!!!!」

然後傳出我嘅慘叫

係我慘叫之時，我先發現Jessie佢自己係到練習發球，佢每一球落點都係一樣，因為佢技術好好，令我不其然咁望實佢

「喂...喂!!!咸濕仔」真係幾個幫我拉筋嘅女仔叫我時先識俾反應

「下....係」

「做咩呆晒咁望住Jessie呀?你對佢起痰呀?」

「唔...唔係呀」

「原來你係個腿控，仲係鍾意d奇怪嘅野」

「噫...原來你有D咁嘅癖好架...」

「唔係啦，點會鍾意呢D怪人」

「真係?咁點解你呆左咁望住人呀」佢地用不懷好意嘅眼光望過黎

「我望佢對腳咩?我望佢發球個姿勢呀，佢發球個落點好靚，唔信妳地自己一齊睇」

我地咁多隻眼一齊望過去

「咁Jessie又真係天才球員黎嘅」

「但係脾氣好怪呢」

「係囉，佢真係冇咩同人傾過計」呢位同學用力一推

「咁肋!」我條腰呀!!!!

後邊位同學仍然不停將我推前

「喂喂喂!!!!Michelle!!!!佢死啦!!!!」

「呀!!!!Sorry呀!!!!!!!」

我差唔多大字馬咁趴左係地下上邊

「有冇人可憐下我呀....」

「冇呀!走啦，去練波啦!!」

於是，就剩低我一個人大字馬咁趴係地下到，真係好痛

呢一班，係一班好粗暴嘅女仔，可能係一班冇J嘅男仔

我同文浩一齊等Jessie埋位練波，今次係雙打啦

但係我仍然係場外到睇

剛先俾佢地咁樣SM法，我仲點打到波

終於可以再睇到Jessie同文浩拍成點，但係依我估計，文浩都係會俾Jessie帶住黎打

真光女雙組合，美女Michelle同埋Jeanie首先發球俾文浩

而文浩都好禮讓咁回返個波過對面，然後佢地四個各猜左幾板之後...

Jeanie忽然黎一個跳殺，個波直飛去文浩果邊

「Jeanie同Michelle係我地首席雙打，文浩未必夠佢地打」Chloe係我身邊講

果然冇講錯，文浩俾兩個女仔追住黎打。有幾次Jessie想救佢都救唔到，所以佢索性唔再救佢，自己一個人集中精神比賽

唔洗10分鐘，呢對新組合就俾女雙組合打低左，但係比分上唔係輸好多

只係17-21，Jessie自己獨取15分

11.美女隊長的出現

第一節比賽完，大家坐低休息。真光嘅女雙組合默契好好，互相走位配合得唔錯，但係Jessie自己一個人係佢地身上拎到15分，佢真係好恐怖

「Jessie自己獨取15分？」係我身後出現左一把聲音

「Polly」

Polly對我笑一笑介紹自己，佢係真光女書院羽毛球隊隊長，佢主要負責單打

「Jessie佢真係一個人拎左15分」

「嗯...我估到丫...我識佢咁多年，佢嘅實力我到而家都唔知道」

「Polly妳好似識佢...6年？」

「係呀，我同佢係同一小學」

「佢細個就已經咁孤僻？」

「嗯，不過佢打羽毛球真係好叻」

聽到隊長咁講，我就更加想同Jessie打返場睇下

「你地仲唔出去準備第二節？」Polly微笑咁對我講

「下!?我地?Polly妳講真？」Chloe唔相信Polly所講嘅野

「係呀，出去活動下囉，快d啦」

我同Chloe兩個企係場上，而場邊Polly就望實我地，而Jessie佢自己就坐得好遠，不過佢都望實我地兩個

「喂，我地成班隊員都想睇你表演嘞」

「妳夫君先係落場果個，我呢，就係伴讀書童」

「可能打完呢一節，你就升級呢」

「可能降級呢」

我拎住文浩塊拍同Chloe一齊行到去球場上

剛先俾班女仔拉完筋，個身鬆左好多

Chloe交個波俾我「係時間俾人睇下你嘅實力啦」

「獻醜啦」

首先我發球，第一球係一球高遠球

“啪”我將個波送左去對面場區，Jeanie好快咁猜左個波俾Chloe

初時，大家都好似好輕鬆咁猜波，應該係第5球開始，女雙組合開始發力

Michelle係後場黎一個殺波，球速一般，不過直飛Chloe

「縮開!!!」Chloe聽到我咁講就讓位俾我回返個波

個波回返過去之後，Jeanie好快就補位將個波回返過黎

同時間，我都企返好自己位猜返個波過去

女雙實力果然唔差，佢地接連殺左幾球波，好快拎左幾分

於是我同Chloe講左少少戰術

「你進攻?」

「妳同文浩唔係一直好想睇下我進攻咩?」

「但係...」

「玩波者」

Chloe依我所講，開波俾Michelle，之後佢地好快就殺波，正合我意

個波直飛底線，我將右腳一踏，右手一揮

拍直接擊中羽毛球，個波以高速向網頂飛過去

然後掂網頂，再跌落對方場區

Jeanie同Michelle望一望地下個波再望一望我

好啦，兩位姐姐仔，唔可以再俾妳地魚肉架啦

輪到我發球，將個波互送左幾次之後，一個高波送到我頭頂

要跳殺嘛?暫時唔洗嘅，所以我企定定，將個波殺過對面場區

“啪!!”呢下聲真係好大，球速好快，個波係兩個人之間快速落地

場邊嘅Jessie都行近d睇我地呢對組合

Chloe再發球·Michelle今次好快就殺波

Chloe不甘示弱·成功擋到呢一球

對方將個波再打返過黎·好啦·再一次

“啪!”我再一次殺波·今次個波唔係向兩個人之間穿過去

今次我殺嘅波係佢地頭邊飛過去·係底線出界前落地

佢地兩個再一次用驚訝眼神望住我·好似唔太相信咁樣

Michelle同Jeanie再一次向我發起猛攻

又一球高波打過黎·睇黎佢地兩個俾我打亂左陣腳

於是我今次跳高·黎一個跳殺

今次球速非常快·又係“擦”一聲·輕輕係出界前落地

佢地呢對女雙組合·就咁樣俾我呢幾球嚇左一嚇而打亂陣腳

係剩低果幾分·佢地完全俾我同Chloe壓住黎打

完場時·比數係21-7

12.初次的對決

潘教練係一邊微笑，Polly就係場邊睇實，好似一早就知道結局

Jessie一如以往，好冷靜咁望住我

練習結束，潘教練叫晒所有冇JJ嘅隊員去做總結，而我同文浩就坐埋一邊休息

「點呀?Michelle、Jeanie，同佢地打左兩場，有咩評價呢?」

Jeanie有少少唔高興咁回答「教練妳又話佢地只係派二線過黎?點睇第二場果個都唔似二線啦」

「佢的確係九華羽毛球B隊，千真萬確」

「二線都咁嘅實力呀?佢D殺波完全唔似二線啲」

呢個時間，隊長Polly出聲

「不如咁講啦，常子傑的確係今年九華羽毛球B隊，但係冇人講過佢之前唔係A隊成員啲」

「佢係A隊?」

Polly點一點頭「冇錯，舊年為止佢都係A隊主力，不過因為有D事，佢唔再落場打學界，所以佢退去B隊」

潘教練望一望佟梓晴

「Jessie妳有咩評價?」

「教練妳要我同邊個拍檔我就會拍邊個」

「咁樣...」教練望實Jessie，然後拎起一塊拍遞俾佢

「去做妳想做嘅野啦，今日妳應該唔洗幫人補習」

「嗯...唔該教練」

正當Jessie行出去果時，Polly叫停左佢

「梓晴!!」

「唔?咩事呀Polly?」

Polly將佢塊拍遞俾Jessie

「用我塊拍啦」

Jessie冇伸手接過塊拍「唔該晒妳，唔需要啦」

佢係場中望實我，呢個時候，教練行過黎，但佢未開口，我已經拎起塊拍起身行出球場

Jessie想正面同我打一場單打

所有人都坐晒係場邊睇我同Jessie之間嘅練習，身為男士，我讓佢發球先

“啪!” Jessie開出一球好普通嘅發球，無理由第一球就由我展開攻擊，所以我就輕輕回返個波俾佢

Jessie一見到就踏前輕力回波，佢呢一下係一招陰招，將我迫上前場救波，等我打高個波之後再殺波得分

我亦一如佢所料，將個波打高，不過我係將個波打高，係向場邊打高，令佢冇辦法踏順黎殺波。而我救完波之後都立即返後場

果然我呢一下波，令到Jessie要退後橫身跳後殺波，就係佢唔順步，令到呢球速度一般

但係個波到我塊拍果時，我感覺到Jessie殺呢一球都好用力，睇黎佢係一心一意同我分高下

所以唔可以留力，我要尊重下呢個對手

擋左嘅波再飛到對面場區，Jessie將個波打返過我場區修正，準備再一次殺波

但係就當個波去到我場區時，我跳高殺左一下波

個波高速飛向網頂，係網頂輕輕挨左一下，所有力都俾個網瀉晒，個波慢慢冇力咁向Jessie場區，正當我以為呢一分可以拎到果時

Jessie已經快速走到網前撈高左呢一球

個波再次飛到我面前，係一個得分好機會

我一下殺波，羽毛球落地，係一球IN波

高手過招，一分已夠，呢一分得黎唔易。Jessie行出場邊

「Jessie?一分咋喎」

Jessie望住Polly，一句野都冇講

佢拎住背囊行到我身邊望一望我

「唔該晒你」放低呢句說話後就離開左球場

我同文浩換完衫後，就發現Polly係到等緊我地

13.第一張的合照

「剛才果幾球，好精彩」佢微笑咁對住我講

「撞彩者，邊有咁好波」

「如果次次都可以瞄準網頂黎打，我相信唔係好彩，我都係第一次見Jessie打波咁狼狽」

「妳過獎啦Polly姐，妳係到等我地咩事？」

「放心啦，我唔係想同你1 on 1」

我大約知道Polly等我係為左咩，所以我好快咁拒絕佢先

「一開始講明，文浩先係落場比賽果個，我唔會搶佢個位」

Jessie返到自己位於天台嘅屋企，自己拎塊球拍出去自制嘅球場係到不停練波

「點解會輸俾佢呢？呢個對手好有挑戰性。如果佢同我拍檔的話，我地會唔會贏到呢？」

而家，每個人心中都有自己嘅計畫，希望將呢對聯校混雙組合，為大家帶黎一d衝擊同新鮮感

我同文浩Chloe坐係starbucks入邊，佢地都係到問緊我對Jessie嘅睇法

「其實佢實力好犀利，佢帶住人打嘅節奏好快，如果一跟唔上就會好快輸」

「係...我上次同佢1 on 1就係俾佢打亂左節奏」

「不過我覺得Polly嘅level應該同Jessie差唔多」

「Polly姐？佢係單打真係好犀利架，同協恩同體藝打到好燦爛架」

「有機會都想同佢較量下」

「不過.... Jessie佢咁有天份，點解唔會打學界呢？」

「呢個係一個好大嘅謎團」

「如果你地想知，不過問下Polly姐丫」

「有冇問題架？」

「冇問題嘅，俾個機會你去接近我地個校花啫」

「校花？」

「係呀，Polly姐好多男仔追架，佢又係富家女，住學校後邊D豪宅，讀書又叻打波又叻，係一個好對象黎架」

文浩聽到之後細細聲講「哎呀~~」

「你哎咩呀!!!而定我唔好咩!?我對你唔好咩!!下!!!我好差咩!?!」

文浩受到Chloe嘅炮彈式轟炸，原來袁崇煥嘅後人都只不過係一名九叔

於是第二日Polly就應邀出黎同我地去飲野，好彩Polly揀左尖沙咀海港城之中嘅starbucks，我幾驚佢會揀返學校附近呀，已經每日返學去果到架啦，如果連假期都去果到，我會死

我預早左一個鐘係尖沙咀到行，自己一個係誠品睇書，忽然膊頭俾人拍一拍，我轉身睇一睇，原來係Polly

佢今日著左件t shirt加及膝傘裙再加涼鞋，仲將佢把長髮放落黎

老老實實，佢真係好靚女，如果要形容佢嘅話.....佢有d似陳嘉倩嘅

「做咩呆左咁望住我呀?我好醜咩?」

「唔..唔係呀，Polly姐妳點會醜呢」

Polly笑笑口作狀打我「你呀，口甜舌滑」

佢睇一睇我手上本書笑笑口咁講

「估唔到你會睇呢D書架啎」

「哦...呢D呀?我求其搵咋」

「唔....『你是如此難忘記』做咩呀?你有情傷?」

「下....我覺得個作者寫嘅野幾好睇之嘛」

「懶浪漫，不過我鍾意」

「估唔到Polly妳都有可愛嘅一面啎，平時妳係球場到總係板起塊面對住其他人」

「咁做隊長，一定要有威嚴嘅」

「妳F.4就做到隊長，妳打波一定好叻」

「唔知呢?同我打一場你咪知囉」

Polly撓住我隻手周圍去睇野，佢睇嘅不外乎精品之類，呢一個真光女書院羽毛球隊隊長都有少女一面

「喂喂，拎你電話出黎丫」

「做咩呀?最新打劫手法?」我真係唔知佢想用黎做咩

Polly拎左我部電話再拉我埋佢身邊，於是我就同佢影左一張合照，相中嘅我地兩個好close，仲笑得好開心

我眼前嘅Polly笑得好天真，同平時嘅佢完全係兩個人

到左約定時間，我地兩個去到Starbucks坐低，等待袁氏夫婦黎

14.變得孤僻的原因

「係啲，文浩幾時追到Chloe架？」

「下？妳地唔知架咩？」

「唔知架」

「就係我地第一次黎妳地學校果日，Chloe迫文浩送佢返屋企，佢地當日就一齊左」

「咁...咁快？」

「我都唔可以相信」

Polly雙手托住自己下巴望住我「咁你呢？你有冇鍾意嘅女仔？」

Polly單刀直入咁問我呢條問題，搞到我唔知點答佢

「呀...我其實...即係點呢...」

「唔通你未拍過拖？」

「又唔係嘅...我之前都...」

「唏~唔好咁down，總有方法治療情傷嘅。不過，你真係唔出場？」

原來Polly都係教練派黎嘅刺客

「冇理由因為要療情傷而要出場架嘛」

「你上次比賽嘅事...我好清楚...」

「算啦...過左去」

「但係果下真係唔係你嘅責任」

我擰一擰頭「除非文浩死左或者斷手斷腳，否則我係唔會出場比賽」

「如果我同你拍檔呢？」

「Polly妳仲要單打，邊得黎夾得切呢？」

「唔...」

就係Polly諗緊野果時，另外果pair人到啦

佢地坐低叫晒野飲之後，文浩開始問Jessie嘅事

「你對佢好有興趣？」

「始終佢係我拍檔，如果我對佢一無所知嘅話...」

其實文浩講得冇錯嘅，身為自己拍檔，點可以對人地一無所知呢

「Jessie嘅實力，你地都親身嘗試過啦」

我地兩個點點頭

「無可否認，佢係比較難相處嘅。唔...點講好呢...佢小學果時唔係咁樣」

「小學？」

「冇錯，Jessie同我同一小學，佢亦都係我小學時羽毛球隊嘅雙打拍檔」

「Polly妳係Jessie拍檔？」

「嗯...自從小學5年級...一次比賽後，Jessie俾人笑佢身世之類，從此佢就變得好孤僻，連我呢個拍檔都唔睬」

「發生咩事？」

Polly放低杯果汁...低頭回想「果次係班際比賽，只要我地女雙贏埋就可以做全級總冠軍。不過因為我一個失誤，累到Jessie救唔到波...我地輸左果場比賽」

「然後呢?關Jessie身世咩事？」

「Jessie佢...點講呢，唔...佢父母係新移民，黎到香港生Jessie」

「又點?Jessie即係香港人啦」

Polly擰一擰頭「係咁簡單就好...因為Jessie細個講野係有口音，有一種奇怪口音」

「咁都唔奇嘅，有時我講野都有啦」文浩係到示範佢d口音

Polly望一望佢「你果d叫懶音呀」

「妳繼續啦」

「有時d同學聽到佢同父母用另一種語言傾計，又唔係普通話又唔係廣東話，而且佢屋企環境又唔好，所以大家就開始笑佢。唔...應該話，d女仔開始妒忌佢」

「點解呢？」

「不如我問你地兩個丫，Jessie靚唔靚女」

「還可以」「ok啦」

「估唔到你地會咁答喎，Jessie小學果時有好多男仔都鍾意佢，所以佢係一眾女仔嘅眼中釘。今次有機會俾人入，班女仔就不停笑佢係大陸妹、鄉下妹...最慘就係...Jessie果時爸爸係地盤有意外過左身，對佢打擊好大」

「咁佢媽媽呢？」

「佢媽媽...係佢F.1果時病死左」

「咁Jessie佢點呀？」

「當時有教會修女做佢監護人，佢先唔洗去保良局」

「即係佢而家自己一個住？」

「嗯...」

「咁Jessie講咩語言令佢俾同學笑呀？」

15.問題少女的背境

「我都唔知呀，不過唔...食果d馬仔呢...我地咪咩馬仔嘅？」

「黃色一舊舊果d咪馬仔囉」

「Jessie叫佢做薩奇馬」

「薩奇馬？」

「咁Jessie有冇講佢鄉下邊到呀？」

「佢好似...講過俾我知....佢係...大連...係!!佢鄉下係大連果邊」

「嘩....咁北呀？」

「咁Jessie佢可能唔係漢族人」

佢地三個望實我「你點知架?我由佢小學識到而家都唔知佢係咩人」

我解釋俾佢地聽「佢姓『佟』係唔係？」

「係呀，好少人用呢個姓」

「仲有薩奇馬，係外族語。Jessie佢可能係一個滿洲人」

「滿洲人？」

「即係滿清果d呀，佢係女真人，清朝係佢地女真人嘅朝代」

「佢...佢係滿族？」

我點一點頭「既然佢鄉下係大連，佢識講外族語，又姓佟，佢好大機會係一個滿洲人」

「但係佟姓...唔係漢族姓咩？」Chloe R晒頭咁問我

「Jessie好大機會係滿洲姓，當年民國成立，滿族剪辮改漢姓，滿族八大姓之一嘅佟佳氏同赫舍里氏，就改左姓佟，佢地紛紛走出關外生活，大部分係遼寧、吉林同黑龍江生活」

Chloe望一望文浩「喂，你仲同唔同佢拍呀?佢祖先害死你祖先㗎」

「唔?文浩你係姓朱架咩？」

「呀...唔係，我係袁崇煥後人」

「咁我地又唔知Jessie係唔係滿洲人，係又點?叫佢賠咩？」

我都開始對Jessie背景有d興趣

「Polly妳話Jessie自己一個住，佢咪成日要兼職囉？」

Polly啜一口果汁「以我所知，佢要幫人補習去賺生活費，始終教會唔可以俾太多生活費佢，而且佢仲係租d舊樓住」

「但係點解佢唔打學界？」

「佢係鍾意打羽毛球，但係佢應該有心理陰影，所以唔再比賽」

「不過今次佢又咁順攤出賽嘅？」

「可能教練開左個好條件俾佢啦」

「如果...Polly妳同Jessie打女雙會點呢？」

Polly個樣好有信心「一定會比Michelle同Jeanie更厲害」

我諗一諗「可能...呢個係教練部署Jessie復出其中一步」

「丫...你幾瞭解教練啲」

「如果係我，我會咁做」

Polly放低果汁「冇錯，教練就係想咁做」

文浩睇一睇錶「Polly妳會同我地一齊食晚飯定點？」

「我都話留左成日俾你地囉，食咩你地話事丫」

Chloe舉手「大喜屋！」

「冇錯!!!!」Polly超級興奮

好快Chloe就book左位，距離食飯仲有幾個鐘，所以我地四個係玩具反斗城行

Polly同平時嘅佢好唔同，佢將最純真嘅一面展現出黎

正當我地係冒險樂園玩緊果陣，Chloe乘機用手肘撞一撞我

「喂，其實Polly而家好似冇男朋友架啲，你唔考慮下？」

點解一定要我同佢地學校女仔拍拖呢？

「妳咪多事啦」

「唔係喎，我頭先見你兩個好好傾」

「啱傾者」

「莫非...你鍾意Jessie?」

「妳咪傻啦，我點會鍾意一個未同佢講過野嘅女仔?」

「你死啦，同時睇中左我地羽毛球隊兩大美人」

就係我諗緊點樣反擊果時，Polly佢玩完遊戲返到我地身邊

16.羨慕佢的原因

「喂，Chloe，妳唔洗睇住妳男朋友咩？」

Chloe笑笑口咁對住Polly講「好啦，俾返個男朋友妳啦隊長」

Polly面紅紅咁作狀打Chloe「作死妳呀!!」

然後兩個好開心咁周圍走

然後我地又走去睇下其他野，只不過我行街嘅話，就好少睇野，除左睇書

就係因為我悶蛋，我先俾前女友飛咋

我地四個係海港城行左陣就落去食放題

Chloe盡顯佢大食妹嘅一面，大量刺身上檯

文浩同佢真係天生一對，兩個都咁大食

Polly呢?佢儀態都唔係太好，但係都有另外果兩個咁恐怖

成餐飯我都係Polly身邊，同佢一齊望住對面果兩個大食怪

Chloe食量真係驚人

「做咩呀?第一次同Chloe食夜晚飯呢?」

「係呀，估唔到呢個小妹妹食量咁大」

「睇睇下你就慣架啦」

我地果晚好乖架，只係飲左少少清酒

不過Polly塊面都紅過紅蘋果

果晚食完飯，文浩照舊送Chloe返屋企。而我就負起送Polly返屋企嘅責任

「Polly妳住邊呀?我送妳返去啦」

「我?我住京士柏架」

嘩.....佢真係非富則貴，佢望住我微笑

「我知你住仁安」

「妳又會知？」

「我係隊長，自然會有你資料啦」

「我陪妳搭的士？」

「坐小巴再慢慢行得啦」

我地夜晚靜靜地兩個人行，不過Polly應該知道Chloe講左d咩，所以有d尷尬

「喂喂，頭先係冒險樂園...Chloe亂講野，你...唔好當真呀」

「唔?佢講咩？」

係街燈下，Polly面紅紅咁低頭，佢突然有d緊張，兩隻手互相捉實，而佢十隻腳趾都不停郁動

「佢....佢呀...」

我對住Polly微微一笑

「傻妹，我對妳同Jessie都有非份之想」

係唔係我用錯?Polly聽到之後自己攞住自己個身

「非份之想?乜你咁快就想同我同埋Jessie...」

我俾呢位真光羽毛球隊隊長搞到哭笑不得

「我地都唔係識左好耐咋喎」

「其實...有d野你係需要知...」

「係咩呢？」

Polly低頭靜左陣，然後，我聽到有喊聲

「Polly....妳冇事嘛？」

我拖起Polly，去到海邊坐低

佢再喊多一陣，平伏左之後先開始講

「當年....我有份欺凌Jessie....係我搞到佢俾班同學恥笑...所有事都係我搞出黎」

「所以果日佢就唔要妳俾拍俾佢啦」

Polly點一點頭，開始講返原因出黎

「當年...我好羨慕佢，點解我呢d有錢女冇朋友鍾意，反而佢呢d咁普通嘅人咁多朋友。我成日諗，點解我咁努力學打羽毛球，每星期都有教練教我，我仍然打唔贏呢個鄉下妹...所以我就係同佢雙打比賽之中...專登令佢失誤報復...點知....收唔到科...我係畢業前講晒俾學校知，我見晒家長之類，但係都補償唔到Jessie，係我同老師家訪果時我先知，Jessie屋企比我想像中環境更差。」

17.佢係天才定係努力家?

Polly吸左啖氣再講

「當我一上到天台，我見到Jessie自己用膠紙痴左個羽毛球場出黎先知，佢叻過我嘅原因，係比平常人更加多練習...果時我先知自己有幾醜...就算升左中學，Jessie都係冇同我講野咁滯...當佢俾教練揀入羽毛球隊果時我好開心，我以為可以同佢再拍多一次...不過佢仍然係未原諒我...所以...」

「所以佢就索性唔打學界，但係潘教練又好想用到佢，所以留佢係球隊」

「嗯...初時我仲諗，我應該可以代替到佢...但係...」

「今次混雙組合，係妳提出要Jessie歸隊?」

「嗯...我好想幫佢贏返一次...呢個係我對佢最大補償」

「咁好簡單，我地不斷SM文浩就得」

Polly擰一擰頭「你知道原因，我一定要借你力量先得」

原來兜咁大個圈，都係想我出賽

「不如我問你一個問題ㄚ」

「咩呢?」

「你鍾唔鍾意我?」

突然間俾Polly咁問一問，真係唔知點答，正常男仔都一定問鍾意

「唔...妳係一個好女仔」我只可以咁樣答佢

「咁.....」Polly拖起我隻手

「我做你女朋友....你幫我出賽?好唔好?」

「傻妹，妳醉啦，返屋企先啦」

「你答我先啦」

睇黎Polly真係醉醉地，我要諗方法解釋佢知先

「Polly，妳真係好靚，而且又好好人，不過妳唔可以因為咁而同人拍拖架嘛」

「但係....得你幫到我咋!!你地唔係好鍾意搵我地學校女仔做女朋友咩?」

「係...我係好鍾意妳地旗袍校服女仔，但係妳都唔可以咁架嘛」

「咁你點先肯幫我呀...咁...我同你...咩左囉」

「Polly妳真係醉啦，總之我應承妳一定會幫妳，好唔好？」

「咁你...有咩要求？係咪要著校服同你...」

「唔洗，總之過幾次練波後我會同妳解釋，我送妳返去先啦」

去到Polly樓下，望下佢住嘅屋苑

嘩.....佢仲同我講屋企係呢到有兩個單位

「我到啦...唔該晒你...」

「妳快d返去休息啦」

佢轉身行左幾步之後，走返黎我面前

「做咩事呀？」

佢gut高腳錫左我個咀一下，當時我個腦空白一片

「多謝你...你真係一個好男仔...唔會乘人之危...」

Polly講完後好快返左入大堂

反而，我俾佢搞到個腦諗唔到野。死啦，無啦啦答應左幫佢....點好？

到左練波果日，Polly又變返平日係球場好嚴肅個樣

Chloe同文浩兩個就係我身邊不停咁問

「點呀？果晚有冇下文呀？」

睇黎佢地兩個真係好八掛

「冇呀，冇你地想像果D野」

「咁即係有其他野啦」

「唔...都有嘅，不過唔係你地所諗嘅男女之情」

「咁係咩呀？」

我慢慢講返D野俾佢地知，當然冇講Polly細個點樣帶頭欺凌Jessie，同埋係Polly樓下發生嘅事，俾佢

地知道，仲得了嘅？

文浩拍一拍我膊頭「你自己洗濕左個頭啦，打算點？我可以讓個位俾你啗」

「點解我會應承佢呢....」

「你對女人嘅眼淚係冇抵抗力」

係我仲係到諗緊點算嘅時候，Polly走到我面前，一面少女般嘅微笑對住我

佢唔理在場有咁多隊員係到，向我撒嬌

「喂...你考慮成點呀？」

長痛不如短痛，都係狠狠地拒絕佢啦，可惜道高一尺，(女色)魔高一丈，正想我想拒絕佢果時，Polly眼窩中又有眼淚

死啦，係女校整嘅女仔係死罪黎架

「Polly，妳...唔好喊住先好唔好？」

Polly開始喊出黎「果晚...果晚你又話會幫我嘅...原來你呃我!!!」

佢嘅喊聲開始引黎其他隊員望過黎，包括Jessie

點算好...佢喊聲愈來愈大...於是...

「好啦好啦，我應承妳啦我落場打混雙啦，妳唔好喊啦」

Polly望住我「真嘅？」

「係呀，真架，我唔會呃女仔架」

佢之後走返去堆女仔到

「黎啦黎啦收錢收錢，買得大贏得大呀老細」

18.初次拍檔

就係咁樣，我就代替左文浩，係下學年出戰混雙而我拍檔就係Jessie

文浩有冇唔開心?佢當然冇啦，仲要非常開心果隻。因為佢多左時間陪Chloe去街，而我呢?就俾佢扔低左係真光練波

練習開始，繼續係基本接波回波，Jessie係呢一方面做到好足，話佢係努力家真係冇錯
每一下殺波，都比起上一次我同佢對打進步左少少，莫非佢真係好似Polly咁講，自己不停練習?

休息時間，我自己坐埋一邊，呢個時候，Polly拎左枝水俾我

「啦!俾你架!」

我用一個好無奈嘅眼神望住佢

「做咩呀!?仲嬲我呀?」

老老豆豆，我真係有d驚Polly，一陣佢突然話我非禮佢點算呀?

「冇，點敢呢」

「唔好嬲我啦」

「邊有嬲妳呢」

「錫返你補數啦」

「唔好啦，Jessie係到」

Polly周圍裝下「你做咩咁緊張佢點睇你?」

「費事佢諗起小學d事」

「不過呢，提你一樣野」

「咩野?」

「Jessie一打波果時，佢就會變成第二個人」

「見到丫，上次同佢打，佢都唔留手」

Bb!!!!!!哨子聲響起，我地又返去自己組別練波

今日我將會同Jessie第一次拍檔，禮貌上，都要同佢打聲招呼

「Jessie妳好...我係...」

但係佢反應真係好冷淡

「冇所謂，拍邊個都一樣」

「咁自負?妳唔記得上次輸左係我手咩?」

佢用凶狠眼神望一望我

「做咩呀?想覆我桌?」

此時Polly過黎打圓場「好啦!準備練波啦!!!」

今日我地練習對手仍然係Michelle同Jeanie

首先由對方發球，Jessie回左個波俾對手，佢地好快回個波過返半場，正當我想去接波果時.....

Jessie成個人企左係我前邊爭波打

算，第一球由佢

Jeanie好快又回返個波過我到，正當我想打果時，Jessie又出現係我面前

又爭波打

「喂喂喂，妳企返自己位好唔好?」

佢睇一睇我，就好似同我講緊，佢先係主導

既然妳要玩野，我就企定定由得妳自己表演。於是每一球我都只係企係到，不過我唔係唔打波架，我只係打果D我雙腳唔洗郁，就咁伸手就打到嘅波

結果?大家都應該諗到啦，我地以3-21大敗

教練見到咁樣，忍唔住捉我地兩個去訓話

「你地兩個做咩呀?一個就爭波打，一個就好似自由神像咁棟係到唔郁」

我地兩個都冇聲出

「話就第一次夾，都唔會差到咁呀?!」

「係...教練...」Jessie低頭同教練道歉

「總之下一次練波再出現呢d情況，我唔會放過你地兩個!!!解散!!!」

我同Jessie係互睇之下執野離開球場

就係我準備離開球場果時，Jessie行黎同我講野

「我前你後」

「妳冇問題咩？」

「你殺波好過我，我先讓俾你」

講完，佢就急步離開左學校

我返到屋企，係衣櫃拎左塊拍出黎

「始終你都係要復出.....」

係我衣櫃內，仲有另外兩塊拍.....

我拎住我果d塊拍去運動舖到再幫佢拉線，一塊搶快(適合擅長運用「平抽快擋」、「快速反擊」等戰術的選手使用)，一塊精準(適合擅長「拉吊突擊」、「全場拉調」的選手使用)。依據唔同對手類型而用唔同武器，不過我唯獨唔用，雖然我殺波係勁，但係我比較鍾意打反擊，係一剎那由守轉攻

係運動舖內，老細慢慢幫我拉線

19.蘇子葉餛飩

「傑仔你復出呀？」

「係呀，俾班女仔呢左，又唔可以言而無信」

「老細我見你肯打返波，老懷安慰」

「唔洗咁講呀老闆？」

「呵，你細細個就跟你爸爸黎買球拍，拉線之類，我真係睇住你大」

「所以我每一塊拍都搵你拉線囉」

老闆幫我拉好兩塊拍後坐低同我傾計

「你爸爸點呀？」

「佢？日日係公司忙囉，有時又要落site」

「冇打波啦？」

「少左好多啦，始終佢膝頭做過手術」

「十字韌帶係運動員嘅大敵，更何況你爸爸仲係斷果隻」

「而家佢間唔中打下衛生波，師兄弟間都係食下飯算」

「如果唔係傷患，你爸爸一定會繼續打波，做工程師之餘仲會做羽毛球教練」

我同老闆繼續閒話家常，佢亦都拎出我地嘅民族小食出黎

「蘇子葉餛飩，你媽咪仲有冇整呀？」

「當然有啦，老闆你真知我心意」

「哈哈，夏天丫嘛，夏天就係要食呢樣野」

係我同老闆傾緊計果時，有一個熟悉嘅身影係舖外出現。佢只係望住d拍同d鞋，再拎個銀包出黎睇下，然後就好失望咁走左

佢係Jessie

「呵，個真光妹妹又黎啦」

「又黎？」

「係呀，佢經常放學後都黎睇下d球拍架」

「佢冇買過？」

「佢冇，佢好窮，佢件校服仲係左補右補，而且佢好內向」

「佢係我混雙拍檔，球技非常好」

「係呀？佢係咪用自己拍？」

我擰一擰頭「佢用公家拍」

「用公家拍練到好球技，一定係好球員，我真係想知佢叫咩名」

「佢叫佟梓晴」

「姓佟呀？」老闆望一望我

「佢鄉下係大連，而且...佢識講薩其馬」

「咁佢可能係...」

我點一點頭

「姓佟...唔...」

「老闆，你諗緊咩？」

「我諗緊佢會唔會係其中一支旗嘅人」

「會咩？」

「有可能架，世界咁大，我地兩家人都可以識到，有咩唔可能？」

「係囉.....我學校個好朋友仲係袁崇煥後人」

「咁你有冇同佢講...」

「當然冇啦」

「傑仔呀，如果你想知你拍檔係唔係滿人，你就睇下佢『fuda』」

「『fuda』？有關係咩？」

「你唔記得咩？你媽咪用果個好似袋仔果樣咪係囉」

「我明白啦，如果梓晴有fuda，又識蘇子葉餇餇的話...」

「如果係嘅話，不仿帶佢黎我舖頭食下飯」

「難左d啦，我今日先同佢嘈完」

係再一次練波，我正準備出門口之時，媽咪叫停左我

「傑仔呀，拎d蘇子葉餇餇打完波食丫」

「哦，好呀」

忽然諗起老闆講fuda嘅事

「媽咪呀？我有d野想問妳」

媽咪覺得好怪，因為我好少可有野會問佢

「咩事呀？」

「滿族d女仔，到而家仲會用傳統fuda？」

「唔.....你地呢一代好少人用啦，不過識得整，仲會用嘅都應該係滿人」

「唔該媽咪」

「仲有呀」

「係！」

「我地仲會繡自己支旗係fuda上面」

「有咩!？」

「你睇下你果個fuda」

我拎出黎睇一睇，上邊有一個小小標記

「媽咪，呢個係...」

「我地屋企旗藉，鑲黃旗」

「咁多隆條仆街係唔係我地支旗架？」

「唔知呀!!!」

冇錯，我同我父母一樣，係一個滿洲旗人，我地屋企旗藉係鑲黃旗。而運動舖那老闆，佢係正白旗，

我地都係滿清皇帝嘅親兵。

20.開始合拍

球場內，我繼續自己拉筋。自從上次被強迫拉筋之後，我D筋真係鬆左，唯獨係大牌內側果條筋比較緊，果到又唔可以叫班女仔幫我拉，所以我就自己默默係到拉鬆佢

正當我拉得好舒服果時，係我面前出現左一對白滑美腿，我抬頭一望，係Polly

佢見到我係到拉筋，就非常好心咁幫一幫我

而佢所謂幫我就只係一個屁股坐上我背後，用體重幫我將個身再壓低d，務求盡快拉鬆條筋

佢亦都係到關心我同Jessie練波情況

「今日你地兩個唔好再針鋒相對啦」

「咁係佢上次爭波打」

「一係咁丫，練完波你約佢食下飯，瞭解下對方先啦」

「同佢單獨食飯?不了，最多請佢食下小食」

「其實佢好易相處架，咪咁睇佢啦，你主動D啦」

“啪啪啪!!!” 「開始練習!!!」

首先我地又係以拉筋為熱身，當我拉緊果時，望一望距離我不遠嘅Jessie

咩話.....佢落到一字馬熱身?

Jessie發現我望緊佢，佢就用一個眼神串我，“你又落一字馬丫”

咁串丫啦!!!我就落俾妳睇!!!我落...我落....我落.....唔到

我落唔到之餘，仲上唔返去，結果又引黎成班女仔恥笑

忽然，Jessie拉一拉我起身

「唔...唔該妳」

佢冇出聲就轉身行去球場，佢隻手...好細好滑

佢依舊拎起塊公家拍，企係我隔離

我地之前已經傾好左佢前我後，所以佢一發球之後，我就立即退後去中後場

果然不出我所料，上次Michelle同Jeanie食過翻尋味，又再一次用返上次嘅節奏同招數黎打

小妹妹，每一場比賽都係獨立，一定有唔同架

所以唔需要我留手，Jessie佢已經好快咁係前場用快打方式去迫散打亂佢地嘅節奏

偶然間俾佢地回到個波去我地後場，我就會一下殺波殺返過去

因為上次練波大敗關係，今次唔可以留情面

我殺出一球好快嘅落地波過對面，in

Jessie睇完呢球，好少可咁過黎同我講野「你真係唔俾機會佢地反擊？」

「妳想？」

「可以練習下快速反擊，下球你殺俾佢地回波」

「冇問題」

既然我個拍檔咁講，總要聽下佢意見，於是第二球殺波，我留左少少力，等Michelle可以殺返過黎俾我

就係Michelle殺波，個波飛過我地場區果一刻，Jessie塊拍就到左，佢好快將個波擋返過對面場

同時Jeanie亦到係啱嘅時間、企左係啱嘅位置。Jessie檔果球波飛到Jeanie塊拍上，Jeanie將佢彈返過黎

然後Jessie再好快一個叉燒，又一分

「幾好丫」

「下球...到你係後場同Michelle試長殺？」

「冇問題」

Jessie一發球，Jeanie就回左過黎，Jessie又大力回去俾Michelle

佢見機不可失，立即係後場黎一球扣殺

個波直飛過黎，我踏順步，一下扣殺返過去

Michelle見狀比較開心，佢亦同我係到扣殺兩三球後

Jessie望一望我，我都知知想點

當我回左個波過去後，我行前，佢回後

Jessie一下扣殺過對面場

個波係中間落，in

係場邊嘅其他人都呆左，只係兩日，我同Jessie可以變得咁夾

其實我同佢暫時唔係叫夾，只係大家用技術補救，同埋對手唔太強

真正出去比賽嘅話，好大機會幾場就執包服

練習完畢時，比數係21-11

21.用技術去補救默契不足

教練行埋我地附近「兩個打得唔錯，識得用技術去補救默契不足。你地夾多d，私下相處好d」

「係.....知道...」Jessie細細聲咁講

我地兩個坐返場邊小休，Jessie第一次坐我隔離睇其他人打波

女單果邊Polly同其他同學練緊波

終於我見到Polly實力，佢同Jessie應該不分上下

Polly一下扣殺

「in」我同Jessie同時講出黎

果一下，真係in

第一次我地兩個咁有默契

今日練習完畢，我做完cool down換衫後，係場邊拎出媽咪整嘅小食

為食嘅Chloe同文浩就立即飄過黎

「喂，請舊我地食丫」

我都未答好，佢地已經一人一舊，就連Polly都走埋黎食

「喂!!好食啲!!」

就係Chloe叫好食果時，係我地身邊問「呢舊叫咩名呀?咁得意嘅」

「呢舊叫蘇子葉餛飩，北方小食」

Chloe再追問「你家鄉小食呀?」

「係呀，我媽咪係夏天會整呢d小食」

「咁你鄉下邊到呀?」

「我?哈爾濱」

「哈爾濱?」Chloe呆左咁望住我

「黑龍江呀」睇黎佢地對地理係冇印象

「原來你係外省人」

「得罪妳麼？」

Polly係呢個時候講「咁你同Jessie鄉下咪好近囉？」

Jessie聽見Polly咁講後「妳仲記得？」

「嗯，妳鄉下係大連」

「妳記得我嘅事...我好開心」

Polly想打蛇隨棍上「梓晴呀，不過同我地食飯丫」

可惜Jessie早有準備

「我...要幫人補習...妳知我屋企架啦，下次有時間先啦」

Polly終於講出左果一句說話

「對唔住呀!!果陣...我唔應該咁蝦妳」

Jessie好似已經冇嬲咁望住Polly

「咁多年，我都冇嬲過妳，係真」

然後我第一次見Jessie笑

佢笑果時真係好溫柔

練習完畢，我地四個又一齊去食野，Chloe同文浩個胃應該係黑洞黎，無底深潭

佢地兩個仲可以係倫敦大酒樓叫好多點心

無可否認，果到d點心又真係好好食特別係椰皇燉燕窩

真係一流

「Jessie真係冇嬲過妳？」我對住食緊點心嘅Polly講

「以佢嘅性格，佢話冇嬲就一定冇嬲嘅」Polly已經開心左唔少

「咁妳唔洗再擔心啦」

「講返頭先場波先，點解你同Jessie會估到Michelle佢地下一步嘅？」

「我地睇穿佢地兩個想照返上次大炒我地果場嘅打法，所以我地改一改，立即贏到佢地」

「你地兩個睇黎幾好默契，會唔會有段好浪漫嘅故事發生呢？」

「同佢？唔好啦」

「同我呢？」

「都唔好啦」

「丫，都不知幾多人想做我男朋友呀」

「不過肯定冇我份囉」

然後Polly用筷子敲我個頭「家陣我唔靚咩!？」

「唔係，妳好靚~妳最靚」

Polly雙手托住下巴同我講

「定係你仲掛住Niki呀？」

聽到Polly咁講之後，我將口中嘅茶噴去文浩果到，然後不停咁咳

22.我的前度女友

「咦?我講下咋咯，乜原來係真架?」

「妳....妳知道d咩?」

「呵呵，文浩講嘅，你個ex係九真羽毛球果個Niki丫嘛」

我用一個怨恨眼神望過去，條友用一個花生樣望返過黎

我轉個頭望返Polly「妳識佢?」

「知道係邊個囉，有少少高竇架嘛」

「咁佢又唔算高竇嘅...」

「你而家仲幫住佢呀?佢派帽俾你咯」

「咁...其實呢.....又...」

「佢地都有聯隊打混雙，我係九真嘅線人話我知嘅，而Niki呢，就係混雙代表」

「新仇舊恨，一次過打低佢地」

「抽到佢地先得呢」

Polly繼續托住下巴「而且唔可以睇小對手，有好多男校女校組成聯隊....今年混雙會好刺激，而且Jes sie仲未出過賽，冇人知佢正式比賽時會點」

Chloe又加左句「你地要夾好d默契呢，表現要比今場更好」

食左完飯，我又一次送Polly返屋企

「你真係未放低Niki?」佢轉頭同我講

「唔....冇話放唔放低嘅....」

「你冇嬲佢?佢咁對你」

「良禽擇木而棲，對方我好咁多，一定有比較嘅」

「睇黎你真係好錫佢咯，而且你仲好鍾意佢」

「初戀難忘，初次心痛。妳呢?妳應該有好多男朋友」

Polly嘟長個咀望住我抗議「你咁睇我架」

「其他人都講啦，靚女隊長黎啦咁樣。妳點會有男朋友？」

「分左手lu~」Polly好輕鬆咁講

「第三者？」

「唔係呀，同佢唔夾，咪唔好浪費時間囉」

「妳咁多人追，妳邊怕丫」

「多人追又點？總係有一日會分開」Polly低頭靜靜咁講

「妳總有一日會嫁出去架嘛」

「希望啦.....」Polly好似有心事咁樣

「妳做咩事？唔開心咁嘅？」

佢突然企定定係我面前

「傑仔呀，你可唔可以應承我一件事？」

「咩事？只要唔係傷天害理，有違我良心嘅事，我都會盡力幫妳」

「嗯...如果...我係話如果，我唔可以再帶領羽毛球隊嘅話，我希望你可以留係我地隊波...協助Jessie帶領羽毛球隊？」

Polly突然咁樣講法，我好驚

「Polly妳有咩事？妳點會帶唔到羽毛球隊？妳係單打皇牌黎架啎」

「唔...可能我要去外國讀書呢，你可唔可以應承我？」

「好呀，一言為定」

佢之後又再Gut高腳錫一錫我

「都係你對我最好」

我又再一次矇下矇下咁行返去屋企

點解Polly要將真光羽毛球隊交俾我呢？真係好奇怪

時間仲早，正當我想落去老闆舖頭打薑之時，我見到Jessie係舖頭外望緊球拍同波鞋。正如老闆所講，Jessie都只係黎睇。佢睇完之後就走左去

老闆舖內有客人係到，所以我都唔好意思入去坐，我跟住Jessie尾走左

忽然又想行陣睇野，於是我就向信和方向行

去到法輪功果個街口果時，我見到有個好熟悉嘅女仔坐左係椅到，而且佢好似扭到腳

佢係Jessie，於是我走埋佢身邊

23.扭傷腳嘅拍檔

「妳冇事嘛？」我坐係佢身邊問

當佢見到我之後，就好勉強自己咁起身「冇...冇事」

但佢個樣已經講我知佢好痛呢

「妳咪死頂啦，我扶妳返屋企啦」

「去...去我屋企？唔好啦...其實唔太....」Jessie整力阻止我送佢返屋企

「我知道妳自己住天台屋，唔緊要」

然後佢以一個不可相信嘅眼神望我

「係Polly講嘅，我仲知妳有個自制嘅羽毛球場。行啦，我扶妳啦」

未等佢開口，我已經扶起佢，一步一步咁行

「其實...你唔洗扶我，我休息一陣就得」

「有咩所謂，妳係我拍檔，我要照顧妳。就算唔係球場，男仔照顧女仔係份內事」

「唔...唔該你」

我扶住Jessie一步一步咁行去佢住果座唐樓，我地望住樓梯，然後對望

「送...送到呢到得啦」

「妳隻腳仲痛緊，我陪妳上去啦」

「但係...」

「行啦！」

不過點扶呢？如果公主抱嘅話，佢就會變AOC入邊嘅衝撞車咁，所以我用左另一個方法，我頂佢上去。不過都唔野少架，都成五層樓架

我頂住Jessie慢慢行上樓，去到五樓果時再上一層

“依”一聲推開左天台嘅鐵門，然後再行出去天台。經過其他人睇嘅衫，一個用膠紙痴成嘅球場出現係我眼前

「妳...就係呢到練波？」

「嗯...我每日溫完書會出黎練波，我屋企係前面」

我跟住Jessie指嘅方向行過去佢屋企，經過佢晾嘅校服，係門口放低佢果時，佢表情仲好痛

我係Jessie手上接過鎖匙，打開佢道閘同大門，走入佢嘅天台屋

Jessie屋企非常簡陋，一個小小嘅廚房仔，一個小洗手間，然後有張摺檯同書檯，之後就係張碌架床

Jessie平日係瞓下格，而上格就用黎放雜物

「Sorry呀...有冇嚇親你呀？」

「唔會，我以前有屋企人都係住深水埗天台屋」

「嗯...」

我將佢放低係床上，幫佢除鞋襪。係佢白白皮膚上，腳上有個位腫左少少

「妳有冇冰？」

「冰呀?好似冇」

我打開佢冰箱睇一睇，真係乜都冇。所以我去羽毛球袋到拎出急救包，入邊有幾個冰種

“啪!” 我拍開個冰種再敷落Jessie隻腳到

「妳敷下先啦」

「唔該你」

然後我地聽到Jessie個肚傳出「咕.....」

佢好尷尬咁摸住自己個肚

「妳未食野？」

「剛先同人補完習....」

我望見袋中仲有野食，就拎出黎遞俾Jessie

佢望見之後呆左

「你....係邊到買？」

「我媽咪自己整，夏天我地會食呢d小食」

「呢個....係蘇子葉餡餡」

24.滿清羽毛球拍檔組成

我望住佢「係呀，妳應該會知係咩黎」

「係...滿族人夏天小食，你...點解會知我一定知呢個小食？」

「妳係大連人，姓佟，好大機會係滿族人，而且我見過妳個袋仔，果個fuda」

「你....你識fuda？」

「妳仲未知我叫咩名呀？」

Jessie扭一扭頭「我只係知你叫傑仔」

我微笑咁對住Jessie

「我姓常，常子傑，哈爾濱瓜爾佳氏」

Jessie望住我

「我係佟梓晴，大連赫舍里氏」

我地兩個微笑對住大家

「估唔到，我可以遇到一個滿族拍檔」Jessie微笑

佢笑果時個樣好可愛，我幫佢用冰敷住隻腳

「唔單止係我，妳係咪經過去羽毛球舖睇野？」

Jessie點一點頭「我一直好想自己要塊球拍同球鞋，奈何...你明啦」佢四目環視

「妳唔參賽原因就係咁？」

「嗯...我唔想令寶利佢尷尬」

「Polly？」

「係呀，佢叫寶利，你唔知咩，你點追佢架」

我幾時有追佢呀？

「我同Polly?冇事架啲」

「不過我成日係更衣室聽到其他隊員講，話你地兩個經常約出去啲」

「都係一兩次，睇下球拍之類，冇野架」

「係咩？」

「下次帶埋妳去舖頭睇下，老闆一定好鍾意妳」

「點解咁講？」

「佢姓那，係盛京人，同我地一樣係滿族人」

「不過突然入去嘅話...」

「下次我帶妳入去啦，妳仲餓唔餓呀？」

「仲有少少...我自己煮得啦」

「喂，我地係拍檔黎架喎，我幫妳煮d野食啦」

我打開Jessie個雪櫃，有菜，有d丸，仲有烏冬

我轉身問佢「平時都係妳自己煮？」

「嗯...如果補完習太夜，我會買外賣就算」

我慢慢煮碗烏冬俾佢「其實...妳可以同我地一齊食野，唔洗自己一個咁悶」

Jessie望住外邊

「同我食?唔好啦，我襯你地唔起」

我放低碗烏冬，叫Jessie過黎食左先，然後我幫佢洗好碗

我坐係佢身邊「妳係我拍檔，我唔會蝦妳喎，而且大家都係滿洲人，所以我更加要保護妳」

「咁我多謝你先」

「其實妳唔好收埋自己，對妳唔好，總之有咩事，我都會係妳身邊陪住妳」

「你做我護花使者？」

「妳肯有咩所謂?妳隻腳仲痛唔痛？」

Jessie郁下隻腳，五隻腳趾郁下

「冇事啦」

我係佢身邊起身「冇事就唔好睇時間」

Jessie望住我「做咩事呀？」

「出去練波啦，同妳繼續練習下」

Jessie好開心咁企起身「好呀」

於是我地就夾手夾腳係天台拉起個網，係Jessie用膠紙整成嘅球場練波

Jessie首先發球，然後我又回返俾佢

佢殺波，我又好快擋到

Jessie球技果然係Polly之上，令我估唔到嘅係，Jessie佢嘅跳殺應該同我不分上下

我地兩個打左差唔多30分鐘，直到個波飛落街為止

25.我地唔只係滿洲人

我地坐返係佢屋企

「妳技術好好丫」

「你都係呀，但係點解你唔出學界？」

「點解嘛...」

「有難處可以唔講」

「我方無謂瞞住妳啦，妳係我拍檔」

我飲一飲水

「F.3果一年，我代表九華出賽，一直好順利」

「去到決賽？」

「嗯，決賽我地對喇沙。果場波，我完全俾人帶住黎打，而且係最關鍵一分，我仲因為大意而失左，最後我地輸左」

「你係咪果種一開始就不停攻不停攻，令對方冇反擊機會果種打法？一開始就拉到好大距離」

「冇錯丫，妳點知道？」

「因為你打法非常有攻擊性，上次我係學校同你打，我方反擊」

「妳有辦法反擊？」我呆左咁望住佢

「當然，你跳殺完之後，個波係好快，但係我可以輕輕一彈就係前邊落波」

「妳果然係一個天才少女」

「我只係睇得多比賽者，下次練波會唔會早D到？我同你一齊加操好唔好？」

「妳約我，我一定會到」

「嗯....仲有呀，你...以後可以叫我中文名」

「叫妳...梓晴？」

「嗯，咁樣好似...好D」

「點解妳仲用公家拍？妳唔買塊拍俾自己？」

Jessie聽到我咁問之後，就面有難色

「我呢間天台屋都係租...仲有水電費，電話同上網，日常洗費，我幫人補習都係剛剛夠，自己儲錢唔多...所以...你明啦」

我望一望Jessie屋企四周，佢真係得一對返學皮鞋，一對白飯魚、一對去街波鞋同一對斯文d嘅平底鞋

「不過，我好開心，幫人補習幫到小朋友之餘，可以用自己嘅能力養活自己」

「其實，妳有需要嘅話，我同老闆可以幫妳」

「唔洗啦，我地唔係應該要苦中求存咩?就好似當年我地祖先對抗大明一樣」

「妳真係好樂觀」

Jessie拎起佢個fuda係我面前掏掏下

「我地滿族人唔怕吃苦嘛，可以由關外打到入關內」

Jessie個fuda上，有一枝少少嘅旗，莫非...

「梓晴，可唔可以俾我睇清楚妳個fuda?」

Jessie佢突然俾我咁問一問，先係一下呆，然後遞俾我

「係妳自己整嘅?」

「係我額娘整俾我，佢走之前整左幾個俾我」

「整左好多?」

「佢要提我，我地屋企係咩人」

Jessie個fuda上邊，繡有一枝旗，同我果個fuda差唔多，只不過佢係全個黃色

「梓晴，我有樣野冇同妳講清楚」

「係咩呀?」

我將我自己個fuda俾佢睇，佢見到果時，雙眼就快跌出黎咁滯

「你....傑仔...你同我都係.....」

「冇錯，妳係正黃旗，我係鑲黃旗。我同妳都係上三旗嘅八旗後人，愛生覺羅氏嘅親兵」

「你...點解咁清楚?」

「妳姓佟，赫舍里氏...正黃旗，輔政大臣、一等公索尼，索額圖，保和殿大學士、戶部尚書、議政大臣，議政大臣領侍衛內大臣噶布喇，孝誠仁皇后、平妃。索尼係妳祖上?」

Jessie好似不能相信

「你...點會知道架?」

「妳....係郡主?正黃旗嘅郡主?」

Jessie點一點頭「咁又點?我屋企家道已失，我係索尼後裔又點?文革果時，我屋企左避右避，黎到香港，生活困難，旗人呢個身份對我屋企只係...一個包袱」

「我知道」

Jessie抹一抹眼淚「你呢?你地鑲黃旗點呀?」

26.我係鰲拜嘅後人

「我地嘛.....我屋企好早就離開左宮出黎做主子，然後黎左香港，打輸左仗後怕俾朝廷秋後算帳，所以改姓係香港生根」

「估唔到我地兩家人會係香港重逢，咁你呢?你係鑲黃旗邊個大臣嘅後代?」

「我先祖嘛...同妳先祖好熟」

「重臣?」

我好尷尬咁點一點頭

「咁我估下先...福康安?」

「唔係」

「佟國維?」

「唔係」

「隆科多?」

講左幾個出名嘅人，佢都估唔中，不過佢最後都會估中，一定會，因為我地係世仇咁滯

「唔通係...遏必隆?」

我再擰一擰頭，然後佢終於都知道

「鑲黃旗之中，同我祖上索尼平起平坐嘅人...除左遏必隆之外...就係....」

我點一點頭

冇錯，我祖上係康熙帝四大輔政大臣之一，鑲黃旗超武一等公、滿清第一武將、議政大臣、領侍衛內大臣、鰲拜

Jessie立即坐開少少「你....你係鰲拜嘅後人?」

「冇錯，滿清第一奸臣」

「咩呀!咁索額圖叫咩呀!!你地鑲黃旗想爭滿清第一奸臣?行開啦!!」

「郡主咁講野架」

「你都唔似徐錦江嘅?」

「關雷神咩事呀!？」

「一講起鰲拜，就諗起徐錦江架啦」

所以我一直唔同人講我係鰲拜後代，因為鰲拜=徐錦江=X樣

即係我=X樣

所以點都唔可以同人講我係鰲拜後人!

「既然妳係郡主，咁有樣野我一定要做」

「係咩呀？」

我企起身，對住Jessie做出臣子對皇室嘅行禮

「臣參見郡主，願郡主千歲千歲千千歲」

我咁樣做搞到Jessie係到笑「喂呀!咁多年黎第一次有人對我咁做咋，平身啦」

「謝郡主!」

佢拍一拍我個頭「你呀!係練波時唔好咁做呀」

「嘛」

「你又嘛乜野呀!!!我睇你咪又係唔識講滿洲話」

「嘩...妳咁乜虎(潑婦)嘅?」

「巴來伊(放肆)!!!你就乜虎!!!」

係當日開始，我同Jessie關係拉近左好多好多

返到去屋企，打開左衣櫃，入邊有兩塊冇穿線嘅球拍

其實呢兩塊拍，係我舊年儲好耐錢想送俾當時嘅女朋友，九真羽毛球隊嘅Niki

可惜...佢俾人搶走了

對方真係名校生又靚仔，而且仲係喇沙嘅羽毛球隊隊長

與其由得呢兩塊拍係到等一個唔會回頭嘅主人，倒不如幫佢地搵個新主人仲好

但係Jessie會唔會咁易接受呢?佢似乎係幾硬頸

不過都係幫兩塊拍穿左線先算

係下一次練波，教練宣佈左一個消息

「我地下兩星期個訓練營，會搵埋呢兩位男同學一齊去，大家有冇異議？」

「冇!!!」佢地當然冇啦，冇人俾佢地點做野嘞

文浩舉一舉手「呀教練，請問妳地個camp去邊到呢？」

「去北潭涌者，3日2夜，你同Chloe唔好諗住同房呀」

現場傳出無數歡呼聲

「入營費位位150蚊，多謝」

我係休息時，走去Jessie身邊

「郡主妳去唔去呀？」

Jessie反白眼咁對住我「你都見到我屋企啦，我邊有閒錢去」

「咁呀...」

「而且我仲可能要教小朋友功課呢」

「暑假仲有人補習？」

「我會去做下義工咁架嘛」

我眼前呢個女仔，原來仲會幫其他小朋友

我係銀包拎出300蚊，然後捉住佢一齊去教練面前

「教練，300蚊，兩個人」

27.我送俾佢的球拍

潘教練望一望後「你地兩個男仔?」

「唔係呀，我同Jessie架」

「下!?!」

「放心啦，我請妳去」

「喂呀!」

「拍檔黎架嘛」

教練見到有錢就照收，完全唔問咩事

Jessie拉我去一邊

「你個阿哈(奴才)、包衣搞咩呀...做咩幫我俾錢呀」

「妳都識講我係阿哈啦，我幫主子妳俾錢好正常者」

「但係...」

「我知妳想去架，係唔係?」

Jessie好尷尬咁點一點「只..只係今次咋!」

「過黎丫郡主」

「又做咩呀?」

我係球拍袋到拎出兩塊穿好線嘅球拍

「啦，送俾妳」

今次Jessie反應更大

「你...你做咩呀?無啦啦送拍俾我，一陣其他人誤會就...」

我同返Jessie佢解釋

「呢兩塊拍，我有用，我見妳仲用緊公家拍，所以就幫妳穿線，送俾妳用」

「不過...」

「妳唔試下塊拍？」

「呢兩塊...係Niki嘅？」

我真係好奇，點解佢會知道？

「妳識Niki？」

「咁...你之前同佢拍拖時，我都見過你地兩個嘅，我都知佢係九真嘅羽毛球隊」

「咁所以...妳就幫我...」

「真係冇問題？始終塊拍...」

「妳係郡主，妳冇資格用，仲有邊個有？」

Jessie係我面前笑左一笑

「多謝你，我都唔知點報答你」

「報答我？陪我去街囉」

「下...你講真？」

「呃妳做咩？不過妳唔好咁孤僻會更好」

「真係？你唔介意？」

「練波啦，怕咩丫」

Jessie當日練波練得好開心，而且一個球員，唔止技術要好，佢嘅工具都需要夾到佢自己

郡主拎起兩塊拍時，佢已經好鍾意。到佢正式用黎練波果時，佢嘅發球同殺波都比佢用公家拍時更好

休息時間，佢開始坐係我身邊

「塊拍好用嘛？」

Jessie摸下塊拍「真係好輕，打果時好舒服」

「妳鍾意就得」

「當時....你揀左好耐？」

「嗯，而家呢兩塊拍搵到妳呢個主人，係佢地嘅福氣」

「咁好啦，我陪你去一次街啦」

文浩同Chloe見到Jessie坐係我身邊同我傾計，佢地又走過黎八掛埋一份

「喂喂!!!妳地有咩咁好傾呀?」

「冇，我同Jessie傾下佢塊拍好唔好用者」

「Jessie妳有私家拍?」

Jessie面紅紅咁點頭

「可唔可以借俾我睇下呀?」文浩見到塊拍後望一望我

「嗯...好呀，小心d啎」Jessie將塊拍遞俾文浩

文浩揮左幾下拍之後還返俾Jessie

「妳先係呢塊拍嘅主人啦」

「點...點解咁講呀?上一個...」

「Niki冇妳咁錫d球拍，佢一發脾氣就會扔拍。但係妳頭先叫我小心d，就證明妳係好細心，好愛惜任何野嘅人，所以妳比Niki更加值得拎起呢塊拍」

Jessie聽到後望一望我，我都點一點頭

「同理Jessie妳可以同其他人多d交流下，咁會開心d」

「係...我知啦」

Chloe就係呢個時間順勢約Jessie去食飯

「今日同埋我地幾個一齊食飯?Polly都去啎」

「下...哦....好呀」

呢個郡主真係終於開始有返d社交啦

係餐廳內，Chloe拎住份入camp嘅名單係到睇，然後佢同Polly就一齊望一望Jessie

28.我地第一次去街

「做...做咩望住我呀?我有野係面上?」

Chloe向Jessie解釋「唔係呀，我真係第一次見妳會參加集訓，要諗下有咩環節適合妳」

「環...環節?」

「喂，Chloe，咪咁玩Jessie啦。我地個集訓營唔係單單練波咁簡單，仲有其他團隊訓練之類」

「咁我地兩個男仔呢?係咪混入去同妳地一齊玩?」我真係諗起都覺得興奮

Polly一臉輕視咁望住我地「你地兩個呢，就要幫手做阿四，擔擔抬抬，放心啦，我地會俾飯你地食架啦」

然後Polly對住Jessie「今日用新拍覺得點呀?」

「妳...見到?」

「係呀，妳有兩塊新拍，一塊快攻，一塊標準」

「唔...用新拍係好d嘅」

「乜傑仔你咁大手筆呀?」

而家到我尷尷尬尬咁樣

「呀...兩塊拍我係屋企冇用...咁所以呢...即係....」

Polly一面花生樣對住我「知啦，幫塊球拍搵新主人丫嘛」

「咁塊拍擺係我屋企又冇用」

係我地堆單果時，我好順手咁幫Jessie俾埋錢

佢地三個見到都冇出聲，而當晚，Polly就打黎同我傾電話

「喂喂，你最近同Jessie好close咁嘅?」

「咁...同佢拍檔嘛」

「但係之前你同佢勢成水火咁嘅」

「唔...點講呢?上幾次練完波，我見佢係街到拗到，咪送佢返屋企囉」

「你預佢呀?」

「係...係呀，送佢返屋企，幫佢煮野食，再傾下計咁囉」

「都好嘅，可能你幫到我手呢」

「幫咩呀？」

「幫Jessie復出囉」

「咁佢而家都答應落場比賽啦」

「佢未正式比賽過，第一場會唔會驚呢？」

「既然係咁，妳地可以安排友誼賽俾佢當熱身」

「嗯...都不失為一個好方法，等我考慮下先」

「我都打算睇下妳單打啫」

「我...我單打？」

「咁妳一直都係單打主力嘛，表演下俾我睇囉」

「嗯...其實呢...點講好呢....」

「有問題？」

「即係....唔...都係冇野啦，我地遲D再傾啦」

一講到落場單打，Polly就變到有d奇怪，佢好似好唔想落場咁樣，難道佢因為要讀書而唔打波？唔會丫，佢成績唔錯呀，而且F.5係最佳搏殺年度，好多學生都會係F.5學年大展拳腳

係我諗緊野果時，Jessie打黎俾我

「郡主妳好」

「你....係咪想我陪你去街呀？」

「下？妳認真架？」

係電話中傳出佢怕羞聲音「咁...咁你送左兩塊拍俾我，禮貌上都要多謝你，咁你又想我陪你去街....所以...」

呢個表面上非常高冷嘅郡主，原來係咁怕羞

「咁妳想去邊呢郡主？」

「下....定左日子先啦好嘛？」

「唔....星期五?有冇問題？」

「好...好呀...」

就係星期五當日，我依時去到Jessie樓下等佢，佢亦好準時咁落樓

「你等我好耐？」

我轉一轉身見到嘅係另一個Jessie

29.問題少女的新形象

今日嘅佢著件t shirt加條長裙同埋平底鞋，佢將佢對孖辮拆左，長長嘅頭髮放左落黎

「妳...今日...」

「好肉酸?」Jessie微笑咁講

「好靚...」

「話晒我都係郡主㗎，當然靚啦」

「妳男朋友冇讚過妳靚咩?」

Jessie面紅紅咁樣覆我「我...我邊得黎有男朋友，見到我屋企都嚇到調頭走啦」

「唔...梓晴妳想去邊?」

「我呀...唔...」

「睇妳都唔鍾意行街睇衫架啦」

「你又會知嘅?」

「直覺囉」

「都唔係嘅...係我有錢買者...我呢d衫都係花園街買架咋」

「唔...老闆未開門...咁呀...」

「老闆?」

「我知妳成日去人地舖頭門口睇野，今日我就俾妳親身試下對羽毛球鞋」

「我...我邊有錢呀?」

我拉起佢隻手「黎啦，行下街先啦」

當然，我好快放開佢隻手。佢係郡主，我係臣子，我邊可以同佢有肌膚之親呢

我帶住梓晴四周圍行，原來佢有好多地方未去過，今日我同佢只係行尖沙咀，佢已經好開心

特別係冒險樂園入邊，佢玩拍蟹時嘅笑容好天真，同佢平時好cool個樣係完全唔同

我當時心諗，真光女書院羽毛球隊兩大主力，原來性格都差唔多，佢地分別在於一個係有錢女，一個係窮家女(不過係帝皇血脈)

我地兩個之後去左玩具反斗城到玩，我地真係玩架咋，邊有地方放玩具呀

行左好耐，我同梓晴食左少少野，就坐係海邊食雪糕，一人一杯

「喂，多謝你呀」梓晴望住海中對我講

「做咩多謝我呀？」

「自從阿瑪同額娘走左之後...我未試過去街，係真...未試過咁開心」

「妳平時假日都係屋企？」

梓晴點一點頭「我錢又唔係多，假日不如留係屋企溫書練波仲好，減少用錢。有時我都好羨慕d同學，放假去玩去旅行。我阿瑪同額娘最多帶到我去九龍公園玩，我地一家三口唔好話出國旅行，就連澳門都未去過」

梓晴開始流眼淚

「係小學果時，我俾人發現左係滿族人，d同學開始歧視我。之後到阿瑪過身，我受好大打擊，開始收埋自己...」

「不過Polly話過，係佢...」

「唔關佢事...當年果球...係我專登失手，去報復全班同學。係我利用左Polly...不過佢真係好好朋友，佢仲同老師黎我屋企家訪。一個千金小姐...竟然去天台屋到探一個同學」

「妳有冇同Polly講返？」

「五年黎我都冇同佢講，我不斷收埋自己、避開佢就係因為咁樣...」

梓晴用一對充滿淚水雙眼望住我

「點呀？我似唔似滿清第一奸臣索額圖？」

「郡主...妳地係我祖上面前只不過係一粒塵都不如」

「你連奸角都要同我爭呀!？」

「爭咪爭囉！洗怕妳呀！」

「好啦！之後去邊呀!?第一武將！」

「去老闆到啦」

「真係？」

「佢係正白旗，仲係蘇克薩哈後人」

「咁佢仲唔殺左你?!」

「哈，佢又唔會嗰，我阿瑪一直都係幫襯佢，佢邊捨得殺我地呀」

我帶住梓晴去到老闆間舖到，那老闆一眼就認出梓晴

30.第一次踏入舖頭

「呵，小妹妹，妳終於肯入黎啦」

「那...那老闆你好」

老闆笑笑口對住梓晴

「聽傑仔講，妳都係滿族人？」

梓晴好怕羞咁答老闆

「係...我係佟梓晴，大連赫舍里氏，正黃旗，祖上係索尼...」

「呵呵，我係盛京那拉氏，正白旗，祖上係蘇克薩哈」

「那前輩你好...」梓晴仲係好怕羞

「妳唔洗咁怕羞啦，有d野我一定要做」

「係？」

「臣參見郡主，願郡主千歲千歲千千歲」

老闆好快向梓晴行禮，搞到佢好尷尬

「呀...老闆...你....平身啦」

「謝郡主」

「其實...老闆你係前輩...唔洗向我咁做」

我指一指自己「我呢？」

「你次次都要！」

「呵呵，都係祖上傳落黎嘅儀式。梓晴，今日我就教下妳兩個打波啦」

「教打波？我地著到咁樣...」

「練波未必需要落球場嘅，跟我黎」

老闆叫左員工睇舖之後，就帶左我地上閣仔，開著電腦同拎出白板

老闆播出一D比賽片段俾我地睇，再係白板上邊寫低D重點

佢好似教書咁問我地兩個，係段片到停一停

「呢個情況下你地會點打？」

梓晴諗左一諗「嗯...輕輕回俾對面場，即係...挑波」

老闆聽到後點點頭

「嗯...呢個係其中一個方法，不過係咪真係最好方法？會唔會有其他？」

「你諗唔諗到？」

「如果打大斜線呢？瞄住底線大力殺過去」

係指一指個mon一個位置

「大約呢到落，後場果個未必夠快」

「不過睇佢幾球，佢出手都好快」

我地兩個一齊望住老闆，話佢知我地諗唔到答案

「呵呵，睇下人地點打啦」

老闆揸個Play後，進攻一方殺個波過對面，係正中間，係瞄住兩個人中間一條好窄好窄嘅空位打過去

「有時候你地諗到嘅打法，對方都一定會諗到又燒打對角呢d招數一場比賽用一至兩次就夠，經常用同一招嘅話，好易會有破綻。用死一招唔係唔得，不過正如李小龍話齋『我唔怕一個識一萬種踢法嘅對手，我只怕同一踢法練一萬次嘅對手』如果一招必殺唔係練到有肌肉記憶，就唔可以靠死一招」

「嗯....老闆你都有道理...」

「傑仔你打波，永遠不停向人猛攻，務求以短時間內，同對手比分距離拉到最遠。不過你一遇上逆境波你就唔識打」

「係...」

「梓晴我未見過妳打波，不過妳應該係比較謹慎果類球員，會摸清對方底細先會進攻，妳屬於心意細密果類人」

「嗯...都係嘅」

「所以你地兩個暫時都係靠技術互補不足，所以呢你地夾果時，梓晴妳要帶住傑仔打」

梓晴望一望我，個樣同我講，要聽佢話

「如果單打呢，妳都可以沉住應戰。不過妳鍾意用挑波，食人又燒，咁打法好易俾人打反擊，所以妳

練挑波之餘仲應該練下其他」

「知...知道」

「當然，你地各自擅長嘅就唔好放棄，要不停咁練習」

我地兩個不斷係到睇片，不停研究，直到4點左右

正當我地準備離開老闆舖頭果時，老闆叫停左我地

「梓晴，妳過黎丫」

「係」

老闆帶佢去到一堆羽毛球鞋前邊

「妳揀一對」

梓晴一直好想要一對羽毛球鞋，佢經常係舖頭門口左睇右睇

「老...老闆，點得架!!!」

「有咩唔得?」

「你都要賺錢架嘛」

我見老闆同梓晴係到互相推讓，我索性幫佢揀

「老闆，佢要呢對，佢著.....」

我除左梓晴隻平底鞋睇佢碼數

「36號丫」

老闆好快拎左對36號俾梓晴試上腳，出奇地，啱著

梓晴拎住老闆送俾佢嘅野，喊住咁多謝老闆。我同佢返屋企放低佢嘅野

31.親自下廚嘅拍檔

「妳而家有晒裝備，似返個校隊成員啦」

「你地....對我咁好....我可以點報答你呀？」

「下?我幫妳都有話要求回報」

「不過阿瑪講過，人地幫左我，一定要報答人...」

「咁呀...妳請我食飯囉」

「嗯...好呀，如果你唔嫌我屋企細同亂」

「我都上過去啦，買上妳屋企食？」

「我煮俾你食」

「咩...咩話？」

我係咪聽錯?梓晴佢話煮俾我食?佢煮飯俾我食?

「妳煮？」

「係呀」

第一次聽到有女仔話煮飯我食，我個心跳得好快。上次拍拖，唔好話煮，Niki連掃下街都唔肯。如今，梓晴話煮俾我食

「不過有條件架」

「咩呢？」

「你洗碗囉」

「成交」

於是我同梓晴去左買餸，再返上佢屋企，兩個人煮飯仔

估唔到佢煮起飯上黎有版有眼

「做咩望實我呀？」

「冇，估唔到妳煮飯咁叻者」

「下?我自己照顧自己幾年啦，點會唔識煮飯呀」

梓晴佢整左幾樣餸出黎，每樣都好好食

「妳真係入得廚房出得廳堂，邊個娶到妳，真係佢福氣」

真係，梓晴煮野好好食，係呢個時候睇真D，佢面紅紅咁望實我

「你...無啦啦咁講做乜」

「讚妳囉，唔通踩妳咩」

「算你啦」

我地兩個食完晚飯，我就乖乖地去洗碗，然後先離開梓晴屋企

今次真係第一次有女仔煮飯我食

係入camp前，係唔洗練波嘅日子，不過梓晴同Chloe佢地要補課

我同文浩就要為入camp而準備

「羽毛球」「齊」

「球拍」「齊」

「計分板」「齊」

我地兩個男仔幫班女仔係到點行裝

估唔到班女仔唔止帶好多裝備入去，佢地仲帶左

「麻雀」「齊」

「啤牌」「齊」

「UNO」「齊」

其實我地係一齊去練波定做打雜？

Polly係我地身邊一齊點野

「點解妳唔洗補課嘅？」

「唔？我尋日補完啦，做咩呆左咁望住我呀？」

「我...我第一次見妳著校服」Polly著起套校服，同佢著運動服同便服果時係完全唔同

Polly著起套旗袍校服時，佢同我心中嘅女神好似樣

「做咩呀?你第一次見我著校服咩?」Polly對住我笑住講

「套校服...好襯妳」我俾面前嘅Polly深深咁吸引住

今次到Polly面紅「你鍾意...你可以日日接我放學架，咁咪日日有得睇囉」

「傻...傻啦.....妳咁多人追」

Polly伸出隻手捉實我個鼻，之後轉身就走左

然後文浩拍一拍我膊頭「犀利啲...連Polly都俾你收伏到」

「你...咪亂講呀....Polly唔係我可以高攀得起」

「定係咁講呢，除左Polly之外，仲有個俾你揀」

「邊個呀?」

「Jessie囉」

「傻啦...佢地d真光妹唔係我高攀到嘅」

「你仲掛住Niki呀?你連果兩塊拍都送埋俾Jessie啦」

「唔....即係...」

「我明嘅....初戀係難忘d嘅。你都可以開始段新感情」

「你呢D熱戀中嘅男人，點會明呀」

呢句野未講完，Chloe已經唔理呢到係佢學校範圍，飛出黎拖實文浩

而梓晴就係我後邊拍一拍我

「喂，係到準備緊?」

我一轉身望到著住真光校服嘅Jessie，佢俾我嘅衝擊比起Polly更大

Jessie扎起左佢地學校傳統嘅仔辮，係佢白白嘅皮膚下，露出左個微笑

Jessie同Polly嘅美貌係不分上下，只係Jessie有個眼袋，始終佢係窮家女，冇Polly有咁多護膚品

32.其實拖下手唔代表乜野

「頭先你俾Polly吸走左呢？」

「下....妳咪亂講啦，冇妳係到，我邊會咁易俾佢吸走呀？」

「真係？」

「做臣子點會呢郡主呢？」

「如果你想搵Polly做福晉，我唔會介意㗎」

「點會呢？我只想係郡主身邊侍候郡主」

可能梓晴冇諗過我會咁講，所以佢聽到之後面紅紅咁

有一d應該係梓晴同阿靜嘅同班同學黎左，應該係黎睇文浩架啦

但係當佢地見到我同梓晴傾計係到笑果時，佢地都表現得唔知講咩好

因為梓晴係其他同學眼中係一個好Cool、唔識同人相處嘅怪人

但係今日，佢竟然會同我傾得好開心

阿靜走埋去佢d同學身邊

「呢個呢，就係文浩同班同學傑仔，佢係亦都係Jessie混雙拍檔」

「喂喂阿靜，仲有果樣呀...」

「哦...係㗎，佢仲係第一個可以係羽毛球場上打低Jessie嘅人」

「佢...可以打低Jessie?冇可能㗎」

梓晴出奇地同其他同學講野

「冇錯，我係單打上輸左俾佢，不過呢...」

梓晴望住我

「我終有一日會贏返佢一次，一定」

即係下戰書啦嘍？

「嘩嘩嘩，我地冇眼福啦，我地就等Jessie妳嘅反擊戰啦」

之後阿靜補左一句

「但係妳唔會愛上佢架呵？」

我地兩個同時聽到阿靜咁講後，一齊面紅

而佢其他同學係到加把咀

「好難講呀，難得有個男仔咁襯Jessie，可以融化左佢」

「妳...妳地唔好亂講...」

「定係傑仔你仲掛住Niki呀？九真果個Niki？」

「嘩...你連ex都係我地姊妹校架？」

「我..我冇掛住佢呀，咪玩啦喂」

「定係你鍾意Polly呀？」

阿靜咁講，其他人立即起哄(包括梓晴)

「好啦好啦，放過我啦」

「算數!放過你」

再係羽毛球隊房內點算物資，應該差唔多齊晒

梓晴今日都係要幫人補習，所以佢要走先

係我正諗緊呢幾個鐘係咪去老闆到打薑果時，Polly係我後邊拍左一拍

「喂，陪下我丫」

「唔?妳想去邊？」

「冇所謂啦，你一陣有咩地方去？」

「唔....我冇野做呀」

「咁陪我行街啦」

Polly同Jessie睇嘅野係有唔同。梓晴佢鍾意睇嘅係實用d嘅野，或者書，而Polly鍾意睇衫同精品之類。呢個可能同佢地兩個嘅家景唔同有關

係商場內，我同Polly兩個人係到行，有時Polly會撓住我

我下意識望一望佢隻手，而Polly亦同我對望

「你怕Jessie唔鍾意？」估唔到佢第一句就單刀直入咁問我

但係我同梓晴又冇咩關係，怕咩呢

「唔？我同Jessie有咩事？」

「冇呀，見你地兩個最近冇晒D火爆場面，而且close左好多，有時又一齊出現，你同佢唔係拍緊拖咩？」

「唔係唔係，我同佢係拍檔...上次我幫左佢，佢慢慢開始接受我同我熟絡者」

「真係？你同佢拍拖我冇所謂啫」

其實當時Polly已經由撓住，變成拖住我

我又再望一望我地隻手

「拖下手唔代表咩d者」

Polly拖住我係商場到行，佢亦都乘勢問我其他野

33.點解你會揀佢?

「其實點解你當初會同Niki拍拖嘅?」

「下....當初呀?」

「嗯，你地點識架?」

「即係咁....我同佢係球場上識嘅...」

「唔?點樣?」

「唔.....有次我地去一個同學屋企個會所打波，果時我又係場邊休息。然後見到Niki自己一個人坐係到悶緊，佢又見我坐係到，所以佢就問我打唔打波」

我停左一停再諗返當時情況

「我見佢有D悶，所以咪起身陪下佢打波囉」

「然後就鍾意左人地啦?」

「都唔係嘅，之後有一日放學我要去又一城買野，突然有女仔拍我膊頭，我先認到係佢，然後我送佢返屋企再交換聯絡方法咁囉」

「咁由認識，到拍拖，用左幾耐?」

「用左呀....唔...大約一個月囉」

「咁都好正常」

我地兩個坐係Starbucks到飲野

「妳呢?妳d男朋友s又點呢?」

Polly啜一啖果汁

「佢地?唔...有d係補習識，有d係網上識咁囉」

「妳識得嘅一定非富則貴」

「咩呀，唔係架，我之前同個大學生拍拖，佢唔係好有錢架咋」

「呀...其實妳屋企做咩，點解可以係京士柏有兩個單位?」

「我屋企?我屋企開餐廳同糖水舖囉」

「Woo~生意人」

「咁你屋企呢？」

「我呀?我爸爸係工程師，媽咪係普通文員」

「咁你點解會打波嘅？」

「我呀?受爸爸影響囉」

「你爸爸教你打波？」

「係呀，我所以技術都係爸爸教我」

「但係佢而家仲有冇打波呀？」

「冇lu，佢係十幾年前斷過十字韌帶，球員生涯結束左啦」

「佢咪好失望囉」

「佢又冇嘅，起碼佢試過係公開賽拎過獎丫」

「香港公開賽？」

「係呀，佢拎過第三」

「咁你係佢傳人啫」

「我仲未學晒佢嘅技術同臨場心態，我之前試過同佢打過，我仲係輸俾佢，仲係俾佢大炒果隻」

「唔...睇你打波，你真係好有攻擊性，發球果一下已經係攻勢，真係心血少D都會嚇親」

「真係好有攻擊性咩？」

「點會冇，一回個波俾你，你下一個動作通常就係殺波，仲要非常快果隻。如果企唔啱位，肯定救唔到波」

聽到Polly咁講，我又諗起梓晴所講嘅野

「其實我爸爸好易就破到我嘅打法」

「真係?點破呀？」

「唔講妳知，等妳自己諗下」

「哼!我一定會諗到嘅」

破我打法唔難，爸爸每次都係以慢波黎破我招數，或者猜空兩邊，等我唔可以踏順步伐去殺波。然後慢慢將節奏帶返去佢到，再突然間快攻

咁就可以贏到我

佢話過我嘅打法，出到去公開賽，最多去到八強

因為一遇上同我類似打法嘅球員，我會變到好心急

今次俾人呃左黎打混雙，希望可以改下我d打波比賽心態

「你爸爸應該教左你好多野喎」

「係呀，由握拍開始，教左我好多野」

「握拍都要教？」

「每次都要由基本功開始練習」

「所以你基本功就咁扎實啦」

我飲一啖咖啡

「妳功力都唔差呀，我見妳上次練波都好輕鬆」

「同你差唔多者」

「係喎，今個訓練營會有咩搞作架」

「唔.....第一日入到camp咪俾大家放鬆下，玩下遊戲，當晚可能由教練下廚。第二日開始有d團隊遊戲同練波，夜晚bbq。最後一日就係例牌影相之類」

「教....教練下廚?佢會煮d咩架」

「唔知架，應該都食得嘅」

我同Polly行到咁上下，我又送佢返屋企

佢屋企我都去過幾多次，次次都係送到佢大堂就走

送完Polly之後，我走去梓晴屋企。去到佢自己整嘅羽毛球場，自己係到練發球

34.佢係我個拍檔

係露天球場練波，係有一定挑戰性係到

要睇下風向風速，上風位定下風位，十足十狙擊手咁樣

我發完一球又一球，發晒一筒波，又去執返，然後又發過

足足發左唔知幾多球

「你好勤力練波啲」

我一轉身，就見到梓晴坐係到望住我。係佢坐係到時，佢底褲顏色同款色走左入我眼內

「阿...阿晴呀...妳坐好d先啦...妳走光啦」

梓晴果刻先發現自己走光

「我...今日咩色!?!」

「粉藍色喱士邊」

「死變態佬!!」

「妳自己俾我睇咋啲」

「哼!」

「妳執好野未?」

「我差兩塊拍未執咋，不過我又冇袋入佢地...」

「我幫妳袋啦」

「咁你今晚係唔係到食飯?」

「妳煮?」

「咁你肯食...我煮有咩所謂」

「不如咁丫」

「唔?」

「妳黎我屋企食囉」

「去你屋企?我又唔係你....」

「怕咩丫!!行啦」我拖起梓晴隻手行去我屋企

「我咁著會唔會好失禮呀」

「老實講丫，妳著校服個樣好靚」

「真係?」

「我好鍾意女仔著旗袍架」

「你呀!口甜舌滑呀!」梓晴笑住咁講

我帶住梓晴去到我屋企，其實我地屋企相距唔係好遠

一打開門，就已經見到今日早左放工嘅爸爸同媽咪

「額娘!我今日有朋友黎食晚飯呀」

係廚房傳出「咪又係文浩一個!」

不過爸爸係廳行過黎果時見到梓晴，佢已經上下打量緊佢

「老婆我諗你都係出黎睇下咩事好」

「你估個仔會帶女仔上黎食飯咩!!」

「妳都係出黎睇睇啦」

當阿媽係廚房出黎見到梓晴時，阿媽都呆左

「uncle·auntie你地好...我係傑仔混雙嘅拍檔，我叫佟梓晴」

「哦...羽毛球拍檔者」

我微微一笑「唔止啦，妳係咪應該去佢地兩個面前行禮呀?」

梓晴去到佢地兩個面前，行左半蹲禮

「梓晴向兩位馬法請安」

「半蹲禮?妹妹妳點識架?」

「其實...」

「佢係滿族人，大連正黃旗赫舍里氏，索尼係佢祖上」

佢地兩個又係到計輩份，仲要計得好煩下

「唔洗計啦，佢係帝皇血脈，滿州郡主」

「咁，妹妹妳仲向我地行禮？」

「呀...額娘同阿瑪講過，要尊重長輩」

「佢地而家呢？」

「呀...佢地唔係到啦...呢幾年都係我自己一個生活」

阿爸阿媽好驚訝，一個小妹妹可以自己照顧自己幾年

佢地邀請梓晴坐低，沖左杯滿洲奶茶俾佢飲

「咁梓晴妳自己住邊呀？」

「我..住上海街d天台屋」

「下!天台屋?妳一個女仔點可以架」

「佢自己有個私人羽毛球場，有咩唔可以」

「呀...只係用膠紙貼出黎...」

「梓晴妳係傑仔混雙拍檔？」

「係呀Uncle...」

爸爸望一望我

「妳同佢打過單打未？」

梓晴點點頭「佢一開始就猛攻」

「妳識唔識化解？」

「用慢打快.....引佢上前或者將個波打去兩邊...」

爸爸望住我「似乎你仍然改唔到個打法」

「Uncle你都識打羽毛球？」

我同阿媽想阻止都阻唔切

阿爸聽到打波就立即興起

「呵呵!阿妹妳跟我入黎書房睇睇」

「係!」

阿爸又係到講歷史啦

35. 水煮餛飩

阿爸俾梓晴睇睇佢以前打波時嘅獎

梓晴睇到目定口呆

「uncle你以前咁犀利」

「可惜丫，我斷左十字韌帶，所以我冇打比賽好多年」

「咁傑仔前年....」

「佢嘅老毛病，唔識打逆境波。梓晴妳呢?學界去到邊?」

「其實uncle...我未打過學界」

「今次係第一次上場?」

「嗯...我之前仲用學校公家拍練習，我屋企好窮，冇錢買拍買鞋，上個月我仲著緊白飯魚打波」

阿爸見到梓晴果兩塊拍

「妳俾妳果兩塊拍我睇睇丫」

梓晴一拎塊拍出黎，阿爸就立即認得

「傑仔送俾妳架?」

「係...係呀...佢話呢兩塊拍冇主人，所以送左俾我...」

「d線應該係那Sir果到拉?」

「係....係那老闆拉...」

阿爸摸一摸塊拍

「如果俾妳，對方狂攻過黎，妳會點打?」

梓晴諗一諗

「我會先輕輕化解個波，回過對面場，之後用最擅長嘅挑波，打個叉燒」

「妳唔會同人對攻?」

「我會嘅，不過我通常會去到最後，對方節奏亂晒先會突擊，首先我要立在不敗先」

阿爸望一望我「傑仔你搵到個好拍檔，梓晴正正係你需要嘅人」

「uncle你太過獎啦」

「我講事實，妳同佢拍檔一定要好好帶住佢黎打。梓晴妳打法似係小心果款，而傑仔係猛攻果款，你地兩個加埋正好可取中庸」

「知道uncle」

「估唔到，又係一個真光女仔同佢打波」

「uncle你係指...九真嘅Niki?傑仔個ex?」

「呀..妳都知道呀」

「大家都係真光，我都識少少其他真光校友嘅」

呢個時候，媽咪係廚房大叫出黎

「開飯啦!!!仲係到想當年!!!」

梓晴想入廚房幫手果時，佢俾媽咪趕左出去，話晒過門都係客

今晚餐飯，係食水煮餛飩，即係餃子，仲有其他小菜

「佟郡主，小人煮得唔好食，望郡主唔好介意」

媽咪咁講，立即嚇到梓晴彈起

「馬法，妳唔好咁叫我啦....我只係血脈上係郡主，妳當我普通人得架啦」

「媽咪妳咪玩佢啦，佢細個俾人發現係滿洲人，之後俾同學欺凌過」

梓晴點一點頭

媽咪摸一摸梓晴個頭「辛苦妳啦...」

「一d都唔辛苦」

梓晴望一望d水煮餛飩，又開始流出眼淚

「傻妹，掛住額娘同阿瑪?」

梓晴點一點頭

「如果妳唔介意，妳可以每日都黎我地到，我地會照顧妳架」

「但係....」

「妳都要人照顧下妳，妳睇妳，幾大個眼袋，又瘦」

我係背後靜靜地講

「佢邊忽瘦?都不知幾重....」

阿媽伸個頭黎我到

「你點知呀?」

「上次佢拗到腳，我預佢返屋企，行足五層再上天台，我點會唔知」

我地四個坐低食飯

「梓晴妳問天台屋會唔會危險?」爸爸邊食邊問

「其實...有時打風落雨會滴水...太大風我怕會吹走屋頂...冬天有時會入風，而且電線我又怕有d危險...」

「妳唔怕?」

「冇辦法啦，屋企窮，我要出去幫人補習先賺到屋租交租」

「咁樣啦，我地去睇睇妳屋企，我應該有方法幫妳加固。如果唔得，我就搵地盤師傅幫妳整整間屋」

梓晴聽到後好開心

「多謝馬法!!!」

36.我們的合照

果晚食完飯後，阿爸上去睇。即場幫梓晴屋企加固左少少先，電線果到問題唔大，但最大問題係打風果時，危險程度會好高

有一晚，阿爸係屋企望住間細房，我地屋企係屬於大單位，可以間到四間房。當年阿爸阿媽請左工人，所以整多間房。但係近年工人年紀大，回鄉養老，我又大個唔洗照顧，所以間細房就用黎放雜物

「傑仔呀，過黎丫」

「咩事呀？」

「梓晴屋企唔多野，所以我想...」

「你想將佢d野放係細房，你咪放囉」

「唔係呀，我同媽咪傾過。我地想叫梓晴黎住，我地有多間房，唔收租金」

下!!!你搵d咁嘅野黎搞?俾人知道咁點呀

「無啦啦...叫佢黎住...會唔會唔太好呀？」

「呢個任務交俾你啦」

就係入camp果日，我亦都一早就去到梓晴樓下接佢

首先，我同佢去食左早餐先

我叫左我最愛嘅沙牛麵，佢就食火腿通

望住梓晴，又諗起尋晚阿爸嘅說話，叫佢搬黎我地屋企到住

所以今日我對住梓晴就尷尷尬尬咁樣，而佢都發現左我有D唔妥

「你做咩呀?心不在焉咁嘅？」

「下....呀...冇...冇呀」

不過梓晴佢點會咁易放過我呢

「鰲先生....」

「妳...妳聽到之後都應該會尷尬...所以」

「係咩事先呀」

「其...其實阿爸前排咪黎過妳屋企幫妳加固嘅?」

「係丫，而家好左D啦」

「佢話妳屋企打風果時仲係會好危險...所以..」

「所以咩?」

我鼓起勇氣對梓晴講

「阿爸叫妳搬黎同我地一齊住」

佢聽到之後，個腦一片空白

「同...同你一齊住?即係同你同居?」

「係...係呀...」

「我同你...邊係呀...就算係都唔可以咁快呀...唔...我...唔...其實...」今次梓晴塊面紅到呢

睇佢個樣，唔知佢諗到D咩

「阿爸話將間雜物房改裝，俾妳住，直到妳嫁人為止」

「嫁人?其實...呢...我就...」

唔通佢係不婚主義者?定係佢又諗錯邊

「咁...你想唔想我搬黎同你住?」

「如果妳屋企真係危險嘅話，妳搬黎會好D」

「等..等我諗下先啦，不過...你唔介意?你唔怕Polly唔鍾意?」

「佢又唔係我邊個」

「咁....我...遲d先答你啦」

係旅遊車上，一大班女仔係到大叫

文浩就好乘坐係阿靜身邊，做佢身後嘅男人

而我就坐係Jessie身邊

我係到睇返D相，佢亦八卦伸個頭黎睇。然後...佢就見到我同Polly張合照

「唔?」佢發出聲音之餘，仲有少少不滿咁

佢隊部電話去我面前，審問

「咁親密嘅？」

「呢張呀....唔.....初期影嘅」

佢鼓成泡腮諗左一諗，就雙手撓實我

「我同你又影一張丫」

佢咁樣算唔算係羨慕Polly呢？

就係咁，我同梓晴第一張合照就咁影左

37.牛歡喜炒咸酸菜

成程車班女仔係到嘻嘻哈哈，好快就到左目的地

一落車已經見到Polly係到準備好晒所有野

首先佢地一班女仔就分好房，而我同文浩呢？就兩個男仔瞓一間雜物房

有人敲一敲我地房門，原來係一班女仔放好野之後，過黎捉我地出去玩

佢地揀左去射箭

我同梓晴坐係到睇佢同學射箭

「咁渣嘅」我係到評論佢地射箭技術

「難道你又好好？」梓晴係到串我

「同妳比一比？」

「你係滿清第一武將㗎」

「玩下者，黎啦」

首先係我射箭先

身為滿洲人，點可以唔識射箭

拉弓，睇定睇定....放!!!中呀!!!不過唔中紅心

再拉弓，再瞄....又中呀!!

我嘅命中率唔差架，然後輪到梓晴上場

佢好輕鬆咁拉弓，第一箭，中紅心

第二箭，中心

第三箭，紅心

我望住梓晴嘅箭靶，再望一望佢

好，我今次唔知又輸左咩俾佢啦

「Jessie估唔到妳射箭咁叻架㗎」

「我撞彩者，好啦，夠鐘去廚房啦」

佢地一齊入到廚房幫手，Polly仲幫教練手煮飯

「估唔到你呢個千金小姐會落手落腳煮飯架喎」

「當然啦，你以為只係得Jessie識煮飯咩」

「咁你識煮咩呢？」

「炒下菜呀，炒下蛋囉，唔...仲有牛仔骨囉」

梓晴亦係我身邊出現

「總之你地兩個今日有口福啦，除左Polly，仲有教練煮野俾你地食」

教練係一邊炒緊咸酸菜，仲要幾香咁

我地成班圍住教練

「教練，你煮咩呀？用咸酸菜炒嘅？」

「呢樣餸係我專登煮俾兩個男隊員食架」

「呀!!!!教練你偏心呀!!!!」

「放心啦，我會叫左糖水俾你地架啦」

「咁就唔同」

到左開飯時間，大家都坐埋一齊食

我地都係兩圍檯者

首先由教練開始講下野先，然後大家就排隊去Polly到裝飯裝湯

「啦，你地兩個，呢樣係我專登煮俾你地食架，真係要食晒呀」

「咩黎架？」

「牛」

一聽到牛，文浩同我都好開心

「牛我啱呀喂，真係正」

一夾起，再放入口，塊肉又好爽

「丫...條牛筋又幾咬口，又彈牙」

「係囉，粒牛丸又似午餐肉喎」

「嘩...你睇，呢個起邊，好彈牙，好正，配埋咸酸菜真係一流」

「個牛肚又幾煙韌喎喂，教練妳煮得好正喎」

成班女仔見到都好想食

「敢問教練，呢d係牛嘅邊個部位呢?草肚丫?牛筋丫，定係牛肩脊呢?」

「哦...呢d咪...牛歡喜果d囉」

「牛歡喜?即係咩呢?」

「牛歡喜咪...牛閩囉」

牛...牛閩?咁其他...

「呢條咪牛鞭，呢個係牛波子，呢個係牛春袋，好補架，我特登叫人留俾你兩個架」

成班女仔聽到之後哈哈大笑，特別係Polly，因為佢屋企係開餐廳，所以佢一定知道

「嘩!!你兩個做咩要咁補呀!?Chloe妳今晚唔洗馴囉!!!」

38.不如收妳做契女

我夾起條牛鞭，係文浩面前....

「我地係咪含緊呀？」

我隊條牛鞭出黎俾Polly「牛鞭應該係女仔食架啎」

「點解呀？」Polly不明所以

但係其他女仔就笑到流眼淚

諗左陣佢終於知道係咩意思

「妖!你變態架!!」

我再夾起舊牛歡喜

「拿...我地應該要奶呢舊啦」

「好啦!你兩個咪玩啦，呢堆野好貴架」

「不過，唔，教練妳煮得真係幾好食」

梓晴望住我地碟牛，好似想試下

「梓晴妳想試下？」

「呀...少少咁啦」

我夾起左4樣俾佢試一試

佢好大膽咁食

「其實...冇咩野，真係幾好食」

「係呢!妳地班女仔將來都要試下架啦」

「妖!!!你個死變態佬!!!!」

佢地成班口講變態佬，但係又圍住我地碟野係到食

然後教練同大家講

「男食呢，會補身，女食呢，皮膚會更滑」

教練講完之後，更加冇我地兩個嘅位置

Polly係我身邊問

「點呀?除左呢d咁補身嘅野之外，邊樣餸最好食呀?」

我諗左一諗

「蝦仁炒蛋囉，好食呀」

「真係?」Polly非常開心

「做咩咁開心呀?」

「你讚我煮野好食囉」

「咁我講事實者」

係我同Polly傾緊計果時，梓晴好似搵緊我咁

Polly見到咁樣，就笑笑口咁對我講

「Jessie搵你呀，過去啦」

不過唔洗我過去，佢已經走左過黎，而且佢手上仲拎住糖水舖嘅紙

「喂!卡比獸!!你食唔食糖水」

係我考慮緊果陣，梓晴已經幫Polly落order

「Polly應該食返.....士多啤梨西米露?」

「妳真係好好記性，妳仍然係食楊枝甘露?」

「冇錯丫」

佢地兩個同時望住我，然後互相對望住

「妳地...冇野嘛....」

佢地一齊望住我

「等緊你呀!落單啦!!肚餓啦!!!」

如果佢地兩個一齊打女雙，一定會好好睇

我揀左個西瓜涼粉後，打電話落單

一粒鐘之後，我地成班係女仔房到食糖水

佢地間房真係亂到呢...胸圍周圍擺，有人仲要真空添

搞到我地兩個唔太不好意思

梓晴係我隔離食我兜涼粉，我又去食Polly兜西米露

「嘩...你地三人行呀？」文浩見到呢個場面

然後我地一齊去食佢碗豆腐花

「我洗唔洗行開個幾鐘呀？俾D時間你兩個」

「唔洗呀!!!」Chloe面紅紅抗議

食完糖水之後，大家各自沖涼，我係沖完涼後走出去外邊散步

同一時間，梓晴都著住拖鞋行出黎

「沖好涼啦？」

「嗯，你呢？」

「出黎行下囉」

「一齊丫」

我地坐係公園，而且我仲買左杯雪糕俾梓晴

佢邊掏佢對人字拖邊食雪糕，而且仲餵左我幾啖

「點解....你阿瑪想叫我去你到住嘅？」

「佢怕妳自己一個住危險掛」

「哦....我仲以為佢有咩意思添」

「妳考慮成點？」

「咁都要住埋呢個月先啦，話搬就搬咩」

「丫...妳估佢地會唔會收妳做契女丫啦」

梓晴一聽到咁樣，佢立即拒絕

39.勇闖女仔房

「唔...唔得架，我....我唔做你妹妹架...唔可以」

「點解呀？」

「總...總之唔可以啦，係咪連郡主說話都唔聽呀？」

「妳今日咁怪嘅？」

「你睇下個天丫，好多星星呀」

我抬頭望一望個天，係比市區多好多星星

「你有冇返過哈爾濱睇星星？」

「我當然有啦，果陣仲要係冬天」

「凍唔凍呀？」

「零下18度呀，妳話凍唔凍？」

真係俾呢位郡主激死

「我屋企冇你果到咁凍，零下4度」

「妳掛住關外？」

梓晴望住我「邊到仲有我容身之所？我地滿洲人同漢人一樣，重男輕女」

「妳打算點呀？」

「咩打算點？」

「中學畢業之後囉」

「我想申請獎學金讀大學，你呢？」

「郡主妳去邊我去邊囉」

梓晴面紅紅望住我

「真係？」

「嗯，我讀唔讀大學都冇所謂，只要我過得開心就可以」

「你同我一齊果陣好開心？」

「同妳同Polly相處果陣，都好開心」

「Polly呀.....」

「做咩呀？」

「佢好似怪怪地咁，佢又吸返藥」

「吸藥？」

「佢小學氣管好差，有時打打下波要吸藥」

我諗返起上次佢同我講嘅野

「上次...佢問我可唔可以留低，幫妳手帶領羽毛球隊」

「我帶？」

「係呀，唔知佢做咩事」

梓晴靜靜地望住個天

「如果你想知...你可以去問佢丫，佢一定會答你」

「點解妳咁講呀？」

「Polly對你有意思呢.....」梓晴邊掬住著人字拖嘅雙腳邊講

Polly呢個千金小姐對我有意思？

「妳會唔會....誤會左呀」唔知點解，我好怕梓晴會唔開心

梓晴擰埋一邊講「我見過你地兩個撈手行街」

「但...但係我同佢真係冇拍拖㗎」

「呃人」

我走到佢面前

「我冇呃妳呢」

梓晴再擰過另一邊，嘟長個咀以示不滿

「我又點敢呃妳呢個郡主呢」

「咁點解佢可以撓住你嘅?」

「呀....呢層」

咁我又係衰嘅，自己享受俾Polly撓手嘅時間

「哼!你一定係想抽人水」

「唔係呢...」

今次水洗都唔清

「坐返上黎」

「喳」

當我坐上去梓晴身邊後，佢就雙手撓實我左手，個頭挨住我膊頭

「借黎用一用先」

「喳」

然後梓晴就有出過聲，直到佢返房喇

不過我同佢返到房時，就發現好多人係我房門口等緊我返黎

「嘩，搞咩呀?成班企係到」

Michelle就代表成班女仔問我一件事，可唔可以做

「妳講啦，我盡可能幫下妳地啦」

大家一齊望住Michelle

「Chloe想同你交換房喇....有冇問題?」

就咁咋?

「Chloe咪過黎囉，我最多當聽唔到啦」

「但係人地怕尷尬㗎」

文浩呢個有異性冇人性嘅人渣，為左同阿靜二人世界而犧牲我

「咁妳地叫Chloe過去啦，唉，我今晚喇大廳啦」

「唔洗瞓大廳，你去Chloe之前間房瞓咪得囉」

叫我入女仔房到瞓!!!!俾我學校知道會殺頭架啎!!!

「喂喂喂，俾學校知道...會殺頭架啎，而且教練佢又係到」

「教練默許架啦，唔好出事就得」

此時教練行過，佢見成班女仔係我房前都估到咩事

「唔好出事呀」講完佢就返左房

「入黎啦!!!」Michelle一手扯左我入房

40.我一家贏妳地三家

原來佢地已經將我嘅行裝放入黎，而我張床，即係Chloe之前張床，就係梓晴隔離

梓晴一望見我入黎，就好似唔知發生咩事咁，矇下矇下

「做咩事你入黎女仔房呀？」

「Chloe囉...要過去二人世界，我咪俾佢地拉左黎喇」

「你...你有冇鼻齣架？一陣你嘈住我地成班喇呀」

「我喇覺好靜」

我走到原本屬於Chloe張床，喇係下格床，而上格床早就俾人用黎放羽毛球拍之類

係床上我拎出本書黎睇

「估唔到你連入Camp都帶書㗎」

「妳都係者」

我同梓晴一人拎住一本書係床上睇，而其他人就玩UNO之類

終於Polly都沖完涼入黎，佢張床係我對面

我經常覺得俾佢地一大班女仔望實

果然，佢地成班望住我

「做咩呀？」

之後Jeanie走過黎好好咁講

「打牌啱唔啱呀？Cash㗎」

真係.....成班挑起我條癮

「同妳打呀？唔早d講!？」

好快，佢地就Set晒場地，Polly同梓晴兩個因為八卦而坐係我身邊

「嘩，傑哥仔，我地羽毛球隊兩大美人都坐係你身邊㗎，乜你咁快手追到佢地啦？邊個大邊個細呀？」

正當我想講野果時，梓晴開聲幫我

「我地只不過係睇下我地嘅投資點者。贏就我地嘅，輸就佢嘅」

湊緊四個人，開檯

「打幾多圈呀？」

「八圈？」

「唔打咁耐啦，36個東啦」

然後大家都靜晒

我地打得好興奮，大家都非常興起

直到我贏左三家錢

不過佢地又點會咁順攤丫

「隊長呀~~~~傑少佢蝦我地呀」

Polly望住我上下打量，然後轉過去同梓晴講

「Jessie呀，班姊妹輸左錢呀」

「得啦，佢聽日會請大家飲野架啦」

「多謝傑少~~!」

其實我一直唔明白，點解D女仔咁鍾意拍埋D床一齊馴

佢地成班係到拍床，但係又著D鬆身衫，入邊又真空，下身又真理褲，搞到我要面壁

唔單止係其他隊員，就連梓晴同Polly都係咁著

梓晴係羽毛球隊，有第一美腿之稱，佢由大牌到腳趾都係咁靚

而Polly就有最美身型稱號

而家佢地著住真理褲咁行黎行去，我只可以當睇唔到，合理雙眼扮馴覺

唔好以為合理眼就冇事呀

佢地會發出令人興奮嘅聲音架

好彩佢地只係玩，如果係摔碟嘅話我就真係唔知點好啦

成班嘻嘻哈哈，仲未馴，仲要係到玩大富翁

如果下次有機會，我都係唔好同班女仔同房

咁就要睇下文浩今晚交唔交到功課啦

終於我都瞓著左啦，同班女仔同房真係難難頂下

不過第二朝先係戲玉

41.食早餐啦喂

我自己去刷完牙洗完面之後就返入房，然後班大小姐先慢慢去梳洗

梳洗就進入主菜啦!!!佢地唔知係專登定係唔記得左我係房中

佢地就咁係到換衫

「喂喂喂!!!!!!妳地就咁除呀!?!」

佢地好似好習慣咁

「係呀，你擰轉面啦，我地除架啦」

「呀....」

「定係你想睇我地換衫呀?」

避免尷尬，我決定擰轉身面壁

五分鐘後，佢地終於都換好

我地就一齊行去食早餐

「其實你頭先出房咪得囉」Polly係我身邊講

「呀...」

「定係你想睇我地換衫呀?」

Polly望住我嘅眼神有D奸

「呀....呢層....」

其實都有d想嘅，試諗下，一班青春少女係你面前換衫，有邊個唔想睇?

「你曳啦你，咸濕仔」Polly輕輕力扭我耳仔

「咁其實呢...就...」

「你咁想睇，咪好似文浩咁，追我地D同學囉」

「唔係呢....」

此時，梓晴亦伸出佢嘅右手，扭我另一隻耳仔

「死變態佬」

兩圍檯一齊食早餐，真係好嘈

「喂喂，傑少，幫我裝通粉丫」

「喂喂，傑少，幫我夾炒麵丫」

「喂喂，傑少，幫我斟野飲丫」

我不停咁服侍呢班小妹妹，而梓晴同Polly就係到傾計，之後又望住我笑

到我坐低果時，梓晴已經幫我準備好一碟炒麵

「唔該晒妳」

「唔洗客氣」

講完佢就將大量芽菜放上我碟麵到

「喂喂喂」

「我唔鍾意食芽菜呀」

「唉....呵呵(女人)」

「你都係呵呵生架咋，難道你額娘係哈哈(男人)」

「嘩!妳地兩個做咩咁親暱呀?」

「只係佢將佢唔鍾意食嘅野俾我食」

終於可以食早餐啦

然後我見到梓晴遞辣醬俾Polly，而Polly又遞甜醬俾梓晴，佢地兩個都將甜醬辣醬撈埋一齊食

「好唔好食架?」

「你試下咪知囉」

佢地一齊夾麵餵我食

「嘩....傑少好犀利喎」

原來...甜撈辣，係有少少酸味

早餐過後，就係我主持嘅節目

成班女仔分為兩組，Polly同梓晴係同一組

冇咁靚嘅係一組

「ok!!而家我面前，有兩個唔同顏色嘅波，一陣大家一條直線坐好。記住，紅波，係大家嘅右邊，只可以用左手拎。而藍波就係左手邊，只可以用右手拎。一陣妳地每條隊最後果個會去文浩到睇下拎咩色，之後妳地唔可以出聲，要通知最前果位隊員搶波去到我面前。大左邊膊頭就係拎右邊個波。仲有!!!麻煩妳地坐好，好多人走晒光啦。準備....開始!!!」

其實呢個環節係考驗下佢地嘅臨陣應變方法

兩隊都好聰明

Polly佢地隊美女隊好快就搶到個波去我面前

熱身者，熱身者

「好!!我地增加難度。而家，妳地雙手唔可以掂到隊員身，妳地有一分鐘傾下點做。」

一分鐘後...「準備...開始!!」

梓晴一見到文浩指示要拎咩色波，就好快拍左兩下手，坐頭位嘅Chloe一聽到就彈出去搶波

另一方面，隔離組用頭掂對方身體.....

「拿，Polly呢組好好，識用拍手呢下去指示隊友。仲要唔洗一個個傳，就已經令第一位隊員知道指示。至於另一組嘛.....我都唔知妳地點諗出黎，真係天馬行空，用頭撞前邊果個，俾個Like妳地!!再加On99獎一個」

完左個遊戲後，我地就去練波

42. 友誼賽的對手

隨住教練嘅哨子聲響起，大家立即集合

經過短時間熱身後，又再一次開始對賽。不過今次好奇怪，梓晴安排左去單打

而我就去負責幫Michelle同Jeanie練雙打，而我嘅拍檔就由梓晴轉為Polly

Michelle同Jeanie見係Polly落場拍我，佢地都唔敢掉以輕心，始終Polly都係首席球手

不愧係Polly，佢用單打技術黎對付對手，佢可以成為首席球手，完全係靠實力

如今出現左一個可以挑戰佢首席地位嘅人，佢就係梓晴

梓晴係單打練習果一邊，一樣係將對手殺個片甲不留

訓練營嘅練習內容，其實同平日訓練嘅水平差唔多

又一次係到練接發球，每一次都要練基本功

大家又係排晒隊係到接我嘅發球

到左食完午飯之後，呢一班魔女再一次向我伸出魔爪

一如以往，首先發動襲擊嘅係梓晴

「喂，我想食雪糕」梓晴係我身邊撒嬌，捉住我隻手係到掏

其他魔女見狀，亦不甘後人，成班人一齊過黎

「喂呀!!我地又要食呀。買俾我地啦」

一時間，我俾大量女仔包圍住，然後我銀包就唔再屬於我

成班女仔一人拎住一枝甜筒雪糕返去房，準備下晝節目

「唔該晒你啦，請我地成班食雪糕」

Polly行埋我身邊，食住佢手上嘅雪糕講

「唔緊要啦，d錢都係尋晚我贏妳地」

「咁今晚都要拜託你啦」

係Polly走左去房果時，梓晴係我身邊拍一拍我

「點呀郡主，食得開心嘛？」

「幾好呀」

不過佢食到成咀都係，所以我都拎紙巾幫佢抹咀

「喂呀，我唔係細路女啦」

「妳唔係細路女？」我認我諗錯隔離，而梓晴都知道我諗緊咩

「死....死變態佬!!!」梓晴面紅紅咁抗議

「喂喂..係妳自己諗錯隔離...」

「我...我都未拍過拖....點會....」

「得得得，妳唔洗同我講」

梓晴擰埋一邊自己食雪糕下火，然後佢又望一望我，再餵我食雪糕

「打開口啦」

我睇住杯雪糕「咁我同妳咪....」

「冇所謂啦!!!!」梓晴隊枝甜筒埋我口

我地一行人返到入房，睇返以前比賽D片

大部份都係睇主要對手嘅片，而教練都宣佈左，將會有友誼賽

「好，各位同學。下個月將會有友誼賽單打、雙打同混雙都會有比賽」

「對手係邊個呀教練？」

「對手嘛...Polly妳同大家講」

Polly企出黎同大家講

「係九真同埋喇沙」

九真同喇沙....即係會遇上Niki?

係我聽到之後，個樣變一變，呢個只係幾秒嘅動靜，咁就俾Polly同梓晴收入眼底

「Polly呀!!出場陣容呢？」

「我地會隨時係比賽期間換人，俾大家都有機會去比賽下，所以係冇任何正選陣容」

大家都低頭沉思緊，然後Polly再講

「大家要明白，我地係四校比賽果時係殺盡其他姊妹校，但係學界到我地就排第二。九真係我地最大假想敵之一，我知道大家都有朋友係九真到讀，但係希望大家都可以盡力比賽，保住二家姐呢個招牌!!」

「嗨!!!!!!」佢地氣勢好勁下，如果佢地改為打泰拳應該會更好睇

好快教練播出左近年九真係學界嘅片俾大家睇，商討對策

混雙會對上Niki....

係我自己諗野果時，梓晴企係我身邊

43. 出盡全力打低舊愛?

「洗唔洗用全力打低對方?」

「妳指友誼賽果時?」

「嗯」

「唔需要嘅，大家交流下者」

「但你唔怕人地示威咩?」

「呵，我邊洗怕佢，我有妳係我身邊幫我手」

梓晴聽到後好開心

「咁信我?」

「唔信妳我信邊個?」

「賣口乖」

我好專心睇住比賽嘅片段，到Niki d片播出果時

不自然諗起同佢打波嘅日子

果時都叫做開心，兩個人打完波後行街睇戲

如今下一次見面，就會見到佢同新歡組成嘅混雙比賽，感覺有點兒哪個

Niki打法仍舊冇變，佢嘅小毛病仍然係到

佢係唔擅長用反手打波

「你個腦中已經有對策?」

梓晴係我身邊望住我

同時我望住片中Niki

「應付Niki，我綽綽有餘，不過唔知佢拍檔係咩實力」

「咁不如果日...我地示弱?第一局?」

「妳想試探下對方?」

「冇錯」

「妳打完單打仲會有力?」

梓晴好有自信

「咁我可以留力嘛」

大家睇左好耐片，仲係唔飛果隻。感覺上就好似睇av唔飛，由頭睇到尾咁樣

睇成幾個鐘，真係唔好話唔劫

睇完片後，大家準備今晚嘅bbq活動

我同文浩兩個係到起爐

「友誼賽你會同Niki對壘，你有冇問題?」

「我似有問題咩?」

我地兩個搬野食出黎，慢慢放好

「不過話時話，你近黎同Jessie親近左好多」

「唔...大家拍檔嘛」

「但係你地之間又好似從中殺出個Polly」

「喂喂喂，你諗咩呀?」

「拿...唔係我睇到架，係Chloe講架」

「阿靜佢講咩?」

文浩睇過周圍冇女仔果時同我講

「有傳聞，你同Jessie同Polly其中一個拍緊拖」

嘩!邊個咁大整估?

「無啦啦點會有呢d消息出黎呀?」

「佢地兩個經常係你身邊出現，好難唔俾人傳嗰」

我地放低今晚嘅野食

「總之呢，你非常有桃花命啦」

我指一指係遠處嘅阿靜

「你都唔差呀，尋晚....」

文浩低頭不語「唔....其實...」

佢唔係咁大膽係Camp到同人啪啪啪呀？

「尋晚你同Chloe....搞左呀？有冇用套？」

文浩口窒窒咁係我面前講

「傻...傻啦....萬一你地突襲咁點算!？」

其實我地尋晚真係有諗過走去隔離房睇真人四仔

「咁你兩個...」

「呀....上個月考完大考之後...放學去左我屋企...然後...」

得!!明晒!!!!校服誘惑

我用一個好奸嘅眼神望住佢

「大個仔啦喎」

「咁...拍拖...好正常者...」

「爽嘛??」

「有咩爽唔爽，你搵Polly或者Jessie試下咪知囉。唔通當時你冇同Niki....」

「冇...冇呀，而家你經驗多過我啦」

「你...你有咩想知？」

「你點氹阿靜架？」

「咁...上到去我到...又冇人...佢都預左，好快就...」

我拍下佢膊頭

「專家!!你而家係專家啦」

「邊...邊到係呀」

「睇得多av果然係唔同D」

我地兩個陰陰咀笑嘅樣，俾Chloe見到，佢一見就知我地講緊三級野

所以佢好快走過黎我地身邊

44.我地嘅三角關係

「作死你地呀!又講咸濕野」

「冇...冇講」

Chloe行近我，然後繼續話題

「你揀Polly定Jessie呀?」

「做...做咩咁問呀?我地三個冇野架喎」

「次次話冇野，到最後咪又一齊左」

咁阿靜又真係冇講錯嘅，上次我同Niki都話冇野冇野，點知一見佢著校服個樣就中左落去

Chloe繼續追問

「兩個都係美女，你點揀呢?Jessie就第一美腿，Polly就身型平均」

為左打圓場，或者終結呢個話題，我決定亂答Chloe

「到時先算啦，到時妳就知架啦」

極速走返去Polly身邊

「嗯?做咩事呀?」

「冇呀....」

「講俾我知好嗎?」

「呢層...關於妳同Jessie」

我咁樣講，Polly立即知咩事，所以佢帶我去到小海邊

「你係話我地傳聞三個嘅關係?」

「妳...妳點會知架?」

果然係女校，呀...應該話係女仔圈...呢d八卦野傳播速度係非常快

「我係主角之一，我點會唔知」

我好尷尬咁企係Polly面前，低頭不語

「你唔洗咁尷尬丫，即使Jessie都知」

「佢...佢都知?點會...」

「女更衣室同洗手間係一個收集情報嘅地方，亦都係最多是非聽嘅地方」

「真係唔好意思....突然間搞d咁嘅野出黎....」

Polly低頭面紅紅咁講

「你唔洗唔好意思....係我叫Jessie返黎先嘅.....」

「咁...有問題?」

「呀...冇...冇呀」

當我返到去準備叉果時，梓晴就行埋我身邊

「頭先同Polly咁好傾嘅?」

「唔.....即係.....點講好呢.....」我係梓晴面前支吾以對

「我知我地三個有緋聞」

果然梓晴都已經知道左

「妳係邊到聽到架」

「係學校...練完波後嘅更衣室」

「佢地點講?」

「唔....佢地咪話，見過你同Polly行街，又見過我同你行街咁囉」

「唔...」

「其實...唔代表d咩者....如果我真係去你屋企住...咁咪仲驚訝?」

「都係嘅...」

「人地鍾意講咪講囉...決定權係你手上」

唔?即係點?

「燒野食、燒野食」梓晴好快走到爐邊燒野食

而我就仍舊坐係佢地兩個中間，而佢地兩個都好唔客氣咁，將我用到盡，我不停幫佢地叉野燒野

「我要雞翼!」「我要金沙骨」

「牛扒」「雞扒」

「Jessie妳仲想食咩?叫傑少幫我地燒就得」

喂喂喂·我真係變左下人咁·其他人都不甘後人

「牛丸!」「魚旦!」「獅子狗!!」「魷魚!!」

「加炭呀!!!!」

不過呢·辛苦過後都總係有回報嘅

係我個碗內·有滿滿一大堆野食係到

「見你咁幫我地·呢到全部野係一大班姊妹幫你燒架」Michelle咬住條金沙骨講

真係咁客氣呀·我拎住兜野食·坐係梓晴身邊食

食到好開心·連我地兩個個fuda跌左出黎都唔知

「Jessie妳跌左銀包呀?」

「係?」

梓晴順住佢自己條白滑美腿睇落去·果然有個fuda係地上。當然佢拎住野食·唔方便執·Jeanie就幫佢執起黎

「Jessie妳個銀包咁特別嘅?人手整架?」

梓晴點一點頭

「係呀·係我媽咪以前整俾我架」

「咁靚嘅·好特別嘞·妳家傳之寶?」

「又唔可以話係嘅」

「上邊有d....符號...係邊到見過呢...唔...」

大家一聽到之後就圍埋黎睇

45.參見郡主

「好得意啲...」

「呀...其實...」

「似唔似故宮d字呀?」

「少少啦」

大家望住梓晴「莫非Jessie妳係滿族人?」

「有可能啲，滿族女仔好白架啲」

「咁Jessie妳係唔係滿洲人?」

大家望實梓晴，同時Polly向佢點一點頭

梓晴望住其他同學，向大家講出真相

「係呀，我係滿族人，上邊d字係祝願平安嘅意思」

大家聽到咁樣就非常好奇

「係啲，Jessie妳姓佟，係一個好冷門嘅姓氏」

其實我都差唔多者

「咁Jessie妳係滿洲個姓氏係咩呀?」

「我?我滿族姓係赫舍里，我全名係赫舍里·梓晴」

「估唔到Jessie妳咁白，係有原因嘅」

「真係美白都唔洗用囉」

佢地同時再睇睇個fuda

「咁呢枝旗仔呢?代表d咩呀?」

梓晴睇一睇

「呢個嘛....係代表我旗藉」

「咩係旗藉呀?」

不過一d修中史嘅同學就知道啦

「莫非...Jessie妳唔單止你滿族人，仲係滿族旗人？」

梓晴佢微笑咁點一點頭「嗯，我係正黃旗，三朝元老索尼係我祖上」

「咁即係Jessie妳應該係....唔...格格？」

「唔...唔係呀...格格係帝皇血統....我最多只係郡主」

「估唔到有個滿洲郡主係我地學校嗰」

大家同梓晴一齊笑得好開心

「估唔到有滿清後人係到，妳好呀Jessie郡主，我祖先係袁崇煥，幸會幸會」

「拿.....滅你大明唔係我地滿洲人呀...係大順嘅李自成呀...唔好屈我地呀」

「哈，我都有讀過中史嘅」

有文科嘅隊友睇真d「Jessie呀，不過...呢個袋上邊明明係鑲黃旗嗰」

「鑲黃旗?俾我睇下」

我摸一摸褲袋，原來果個fuda....係我架

梓晴望真d

「係嗰...係鑲黃旗」

「咁即係話，仲有第二個滿洲人係我地之中？」

梓晴點一點頭「嗯」

「擘!!!係邊個呀?係唔係妳呀Polly!？」

Polly微微咁笑「我邊係用冷門姓呀?而且我係廣東人嗰」

「係嗰，咁我地當中有冷門姓氏嘅應該係....唔.....」

大家你眼望我眼都估唔到係邊個

「Jessie妳知唔知佢係邊個呀？」

「我...我....」

梓晴偷偷望我，我都點一點頭。無謂要大家估估下啦

「我知道」

「佢係邊呀？」

梓晴想開口講果時，我走到梓晴面前

「大家行開先」

「點呀傑少，你知呀？」

「我當然知啦」

「咁佢係邊呀」

「係呢到。臣鰲拜之後參見郡主」我向梓晴行禮

「喂...你呀!!!平身啦」

「謝郡主」

我轉身望住大家

「呢個fuda係屬於我，我係哈爾濱瓜爾佳氏，清朝開國元老、滿清第一武士鰲拜係我祖先。我全名係瓜爾佳·少傑，鑲黃旗。我同郡主一樣，屬於大清皇帝親兵」

然後佢地就一齊大叫

「原來你地兩個係咁嘅關係架!!!」

「我係Jessie臣子，佢係郡主」

此時，文浩走埋黎我身邊

「點解你唔一早講呀」

「你都有問」

佢伸個頭望真d我

「你係鰲拜後人？」

「係呀」

「點解你唔似徐錦江架!？」

大家聽到咁樣，個個笑到肚痛

「係嗎!!! 驚拜即係徐錦江嗎!!!」 「開機關!!!!」

我用一面無奈嘅樣望住梓晴

都話左會變徐錦江架啦

BBQ時，我地用火煲糖水，係其他隊員一齊煲嘅紅豆沙

大家一人幾碗，估唔到其他人煮野都有返咁上下

清理完所有野，大家各自返房休息

照舊，我今晚都會係女仔房到瞓

佢地仍然係成班著真理褲周圍行，直到個camp完畢為止

46.正式同居

“天文台將於明日下午考慮發出一號戒備訊號，超強颱風.....”

去完Camp後一星期，我係屋企房中做功課，阿爸叫左我出黎

「傑呀」

「係!」

佢指一指電視俾我睇

「今個風唔野少，梓晴屋企一定擋唔住，上次件事你有冇同佢講呀?」

「有呀，佢都要考慮下」

「佢幾多號交租?」

「好似兩日後」

「咁你而家立即去接佢黎先啦」

「你講真架?」

「呃你做咩?」

我係梓晴屋企到，幫佢收拾細軟

「你阿瑪真係我叫搬去你到?」

「係呀，間房都執好晒」

「不過.....怕唔怕俾人閒言閒語呀?」

「但係妳繼續住呢到，妳連今個風過唔過到都唔知呀」

「嗯...」

係個風未到之前兩日，我同梓晴執好晒佢屋企所有野，通知業主後，就搬左去我屋企到住

「梓晴呀」

「係!uncle!!」

「妳好好係到住啦，我地唔會迫妳走」

「知道晒，真係打搞晒啦」

梓晴係房到執好佢自己嘅行裝，佢慢慢將佢嘅野放係櫃入邊，仲有放係書檯上

我企係佢房門前望住佢放行李

「你做咩企係到？」

「冇呀...冇諗過竟然會同妳同居」

「如果...俾人發現左咁點呀？」梓晴應該有少許擔心

「放心啦，到時我會同人講我屋企租左間房俾妳住」

「咁我地洗唔洗前後腳返去練波？」

「邊洗丫，我地又唔係同校」

梓晴放好行李後，又開始溫習

另外佢都抽時間睇下比賽片段

有時阿爸會加把口入黎，所以我地兩個練習時間，係變相長左

而梓晴同我之間，又再親密左一步

阿爸阿媽叫得梓晴黎住，都會好好照顧佢，就連衫都幫佢洗埋

結果，我屋企開始出現少女胸圍、底褲，同埋佢果套長衫校服

我地練完波之後，已經係三號風球

今次個風真係好犀利下，三號波嘅威力同平時三號完全係兩回事

一出學校門口就差D企唔穩

同梓晴一人一把遮，冒住大風雨咁返到我屋企樓下商場

「嘩，今次個風真係好犀利，如果我仲住天台屋都唔知會點」

「好彩叫左妳黎咋」

「我間舊屋一定不停滴水」

我地行到樓下間惠康，梓晴就問洗唔洗買定D餸

「係喎，睇個勢呢個風影響好大」

我地入到惠康一齊推住手推車買野

「蛋...要買，屋企冇啦」

「妳點知架？」

「唔?打開雪櫃囉，唔...要買菜，你食咩菜多？」

「我唔食芥蘭」

「今晚佢地會返黎食？」

「當然啦，阿爸今日係site到整完防風就會返，阿媽都好快返」

「你記住同佢地講我地買左餸啦」

「得啦!講左啦」

「唔....買定d魚旦牛丸，我知你鍾意食烏冬」

「丫...妳又咁瞭解我嘅」

「我叻囉」

梓晴的確好叻女，佢係一班師奶黎買野之前，就買好成個星期嘅野，仲存放得好好

係佢搞掂廚房野之後，再煮埋午餐俾我地

當然碗又係我洗啦

47.去麥當當買雪糕

食完午餐，我係房上網果時，梓晴走入黎

「做咩呀？」

「叫你開d比賽片黎睇嘛」

「妳真係好鍾意打波」

「你都係者」

「妳今次想睇邊個對手？」

估唔到，梓晴想睇嘅係自己人

「我想睇晒我班隊友比賽嘅片」

片中嘅隊友技術唔差，只不過真係對手太強勁，佢地先會八強止步

梓晴好留心每一場比賽，每一個對手

我坐係佢身邊同佢一齊睇片，而且我同佢愈坐愈近

開始，佢雙手都撓實我，將個頭挨係我膊頭上

果時先發現，佢個樣好叻

「妳眼瞓？」

佢摔一摔隻眼「嗯，個天好黑，所以搞到我有D眼瞓」

「咁不如妳返房瞓下？」

「唔....其實...」

「咩事？」

梓晴尷尷尬尬咁笑住講

「我仲係未慣張床...」

「仲有冇呀？」

「同埋....唔慣打風間屋咁靜...」

我地兩個呆左係到

「係咪好怪呀？」

我係到諗緊有咩方法幫下佢

「不如咁啦，我幫妳打開個窗，俾妳感受下個風，咁妳就慣架啦」

「喂!!你咪傻啦!!!，一陣整濕我D野呀」

梓晴不停用雙手打我

「嘩!妳咁粗魯嘅，小心俾妳男朋友見到添呀」

梓晴聽到我咁樣講之後，就面紅紅對住我，佢仲口窒窒添

「我...我邊到得黎有男朋友...冇...冇呀...」

我伸個頭埋佢到，佢嚇到退一退後

「真係冇？」

「冇...冇呀...點會有」

「妳同Polly兩個係隊中兩大美人㗎，冇理由佢冇/拍過拖，但係妳冇㗎」

「Po...Polly點同呢.....佢人又靚又係有錢女....我呢d...我呢d...」

我見佢怕怕羞羞咁樣，所以就摸下佢個頭

「得啦得啦，信妳冇男朋友啦」

最後佢仲送返幾拳俾我，扁起個咀

「蝦我嘅，應該將你棄市」

「饒命呀郡主，小人知罪」

「哼!你知驚架咩」

梓晴講果時仲係雙手撓實我

「我要食雪糕」

「好啦，我去拎俾妳啦」

「唔係呀」佢一手捉住我

「做咩呀？」

「我想食麥當當果隻呀....」

「麥當當呀？」

「嗯」

不過而家外邊三號風球....但係又冇雨

「我出去買啦」我起身講

「同你一齊去啦，你買到返黎都溶晒」

於是梓晴著起對落街用嘅人字拖，同我一齊去附近間專記食雪糕

好彩冇遇到同學，否則我地兩個水洗都唔清

「點解突然想睇返隊友比賽D片嘅？」

我邊食住我杯double朱古力新地問梓晴，而食緊double士多啤梨新地嘅佢好快都答到我

「首先我想睇下自己隊友實力去到邊先」

「唔？妳平時打波練波見唔到咩？」

「我相信比賽果時，每個人嘅發揮同平日係唔同，所以想睇下大家比賽時嘅實力同埋當時嘅氣氛係點」

「每場比賽都唔同㗎，妳打真光聯校賽同校內賽氣氛係點呀？」

「氣氛呀.....」梓晴面有難色咁樣

「有問題呀？」

梓晴擰擰頭「唔係呀...不過....」

「妳有冇片可以借俾我睇下？」

「有嘅.....不過你真係想睇？」佢果時個樣變得愈來愈尷尬

「係呀，睇下點樣成場都係長衫妹都好呀」其實我期待左好耐

「你...唔係期待我地會撲蝶呀？刺繡咁呀？」

「咁會有咩睇？」

返到屋企梓晴一打開電腦，開條片俾我睇下。係舊年嘅四真聯校賽

一打開就聽到...

48.女魔頭真正面目

「D!!!!食屎啦妳!!!」

我用一個好懷疑嘅眼光望住梓晴

「邊...邊個講架?」

「你唔認得把聲?」

鏡頭一轉，就係片中見到棟高隻腳，頸頭粒鈕解開，將件長衫拉高，露出一對玉腿嘅Polly不停向對方叫囂

「我...我有冇睇錯?佢係Polly?」

梓晴好尷尬咁點頭

我再睇多陣，就見到有條P褲扔左出黎

P褲之外，仲有薯片袋、糖紙之類

然後就係大量粗口，仲有....

「喂!!!M到呀D!!!邊個有M巾呀!!!長果隻呀!!!今個月大豐收咁滯!!!!」

「邊個玩彈bra帶呀!!!!!!!!!!!!!!」

我呆呆咁望實片中嘅佢地，原來係個camp入邊，呢班女仔已經收儉左

如果要佢地發揮平日嘅水準，佢地會做d咩出黎呢?

「你....你都係睇比賽啦」梓晴好快咁飛去比賽片段

首先我地係睇九真嘅單打

我亦係片中見到Niki

Niki舊年係負責單打，佢對住嘅係梓晴

片中嘅梓晴，佢嘅球路好狠，Niki完全係冇任何反擊機會

每一次殺波，Niki都擋唔到。就咁睇片都聽到殺波嘅聲音，如果係現場，一定會更加震撼

「好少可見妳咁打法喎」

佢成個人坐係我張床到睇片

「咁對手唔太強，不如盡快解決佢，休息多d仲好」

片中比賽打3局2勝，梓晴係好短時間入就解決左Niki

「你初戀情人實力都係一般咋喎」佢望住我微笑咁講

「所以我果兩塊拍，佢咪襯唔起囉」

「咁....咁我就襯得起?」

「當然啦，妳先係佢地嘅主人」

「賣口乖」佢講呢句野果時個樣好開心咁

然後段片播出另一位隊員嘅單打片段，係Polly

Polly對上嘅對手都有返咁上下實力，不過仍然係佢之下

佢每一個動作都好優美，同梓晴一樣，唔會有多餘動作出現

比分仲係平手，雙方都有取分

然後...Polly開始攻擊，係快速果隻

輕輕一彈，個波好快就以高速飛過半場

對手勉強救到過半場，Polly就好似網球咁樣發球上網，去左網前輕輕舉高塊拍

將個波打返過對方前場

我全神貫注咁睇

「好一球發球上網」

「呢招係Polly拿手好戲」

窗外呼呼聲愈來愈大

就咁睇返佢地校內賽，佢地嘅實力真係名列前茅，不過出到去學界到，高手雲集，打到去八強都已經好好

睇完晒所有片後，我地兩個坐低休息

「唔?你唔會打機架咩?」

「下，我唔打機架」

「你係唔係男仔黎架?我補習d學生好鍾意打機架啎」

「每個人都有佢自己嗜好嘅」

呢個時候，梓晴個樣真係好奷

「妳返去瞓下先啦」

當梓晴返左去房到瞓，我都進入左夢鄉唔知瞓左幾耐，大約兩個鐘，一打開眼，外邊已經好黑好大風，應該係落緊大雨

起身去到廳果時，阿爸阿媽都返左黎，而梓晴都早我一步起左身，幫緊阿媽手煮飯

「練波好奷呀?瞓得咁舒服嘅?」

阿爸又係到串我佢經過話以前練波點點點。雖然，阿爸果個年代練波真係好辛苦下，通常未開始熱身，佢地已經跑左好耐出晒汗

其實咁樣係比較好，肌肉冇咁易受傷

但係而家邊有時間俾我地咁做呢

49. 10號風球嘅練習

梓晴&阿媽兩個人開好張檯，叫埋我地去食飯

新聞播出天文台最新消息

「天文台將於晚上九時左右改發八號烈風訊號....」

咩話，乜而家仲係三號咋？

電視周圍影市內嘅情況，影到深水埗長沙環一帶，果到D天台屋非常危險

「梓晴好彩妳肯黎同我地住，否則..」

阿爸指指電視

「我幫妳加固之後都未必過到呢個風」

「麻煩晒你啦Uncle」

「始終妳一個女仔住天台屋比較危險，而且今個風唔係講笑，佢坐巴士過黎」

「坐巴士？」梓晴望住我想幫我解釋下

「哦，即係巴士海峽。」

我走去指一指個地球儀

「台灣南部同菲律賓呂宋島之間果到叫巴士海峽」

「咁坐巴士會點？」

「如果個經過巴士海峽黎，佢會不停係海上吸水吸熱，而且仲要冇登陸過，佢嘅結構會好完整，如果開埋隻風眼，咁佢就叫一個靚颱風。香港咁多次10號風球，次次都會經過巴左海峽黎，所以我地叫佢做坐巴士」

阿爸望一望個風

「今次好勁下」然後佢就入房開始做野

「uncle做咩呀？入房開著幾部電腦嘅？」

「哦，其實佢除左鍾意打波之外仲係一個追風族」

「追...追風？佢唔怕危險咩？」

「佢追得好安全嘅，唔會去沙灘」

我同梓晴一齊跟入書房

「點呀？個風中唔中？」

「中呀，好大機會10號」

「10....10號？」

「ok...我去check下間屋先。然後再幫樓上樓下阿婆睇下」

我同梓晴解釋返，阿爸會係打風日子，幫d老人家執一執間屋，以免有危險

阿爸幫完其他人之後，就繼續追風，而我同梓晴就各自係自己間房到hea

之前瞓左晏覺，冇咁快咁易瞓著

外邊風勢愈來愈大，雨亦都密左好多

「天文台於9時01分，掛起8號烈風及暴風訊號，不排除改掛更高訊號。超強颱風正位於....」

我心諗：掛左8號，梓晴會唔會怕大風聲？

所以我走去佢間房到睇睇

阿爸就係電腦前不停入資料睇野

我走到梓晴房門口

「妳驚唔驚呀？」

梓晴當時坐係書檯前用緊電腦

「唔？我ok呀，冇問題」

「真係冇俾風聲嚇到？」

「冇啦，而家我又唔係住鐵皮屋」

「打緊風...有咩好做呢...」

「又想睇我地班女仔打波？」

「都好呀」

於是我地兩個睇左好耐波，直到大家眼瞓為止

打開眼，我地見到嘅，係10號風球

係窗門望出去，真係一次死城咁

垃圾吹到一地都係，仲有少少行人行得好狼狽

我地食完早餐之後，繼續坐係到悶

正想諗下有咩做果時，阿爸叫左我地拎球拍出去走廊

佢要我地係走廊到練下波

「係呢到可以妳到你地d反應嘅」

「真..真係架?Uncle?」

「當然啦，我以前仲要雙手雙腳加沙包黎練跳殺。我係用d比較舊嘅方法，冇計啦，資源唔夠」

阿爸係唔係好闊嘅走廊不停開波俾我地接，即使係咁窄嘅環境之下，佢發嘅波落點都仍然係咁好

「打返過黎，係，下一球」

我同梓晴兩個不停回波俾阿爸

「下一球開始扣殺」

「下?你講真?咁窄點殺波呀?」

「就係俾你地練習下，係咁窄嘅地方都可以扣殺到，快D!」

我地兩個人就係10號風球之下，係屋企走廊練波

50. 友誼賽開始

打完風後大約一星期，就係友誼賽嘅日子

當日我地一大班人返到去準備友誼賽D野。各人都為左今日嘅比賽而努力練波，雖然只係友誼賽，但係佢地都當正式比賽咁睇

Polly好細心咁打點所有野，我都幫佢安排晒好水同其他野係場邊

「大家集合!!!!」Polly一聲令下，所有隊員集合好晒

「好，今日係友誼賽日子，不過妳地大家都知，我地每一次同姊妹校之間嘅比賽，一定會打到好燦爛，所以大家要努力，每一位隊員都會有上場嘅機會，大家要當正式比賽咁睇!」

「draw!!!!」

Polly講完野之後，大家就散開

「妳唔好咁緊張呢」

「我激勵下士氣者」

「妳會落場?」

Polly扎起個髮髻

「我會呀」

「我期待妳嘅表演」

「你一陣點面對Niki?」

「有咩點，咪咁囉」

「你可以搵我同Jessie扮情侶啫」

「邊洗呀」

「佢地到啦」

我一轉身，就見到一班著住同梓晴一樣體育服嘅學生，一齊行入黎體育館

係人群之，一個熟悉嘅面孔再一次出現係我面前，同時佢亦見到我存在

對方一堆人好有氣勢咁行過黎，所以Chloe亦都帶住一班隊員企係Polly身後

未開波已經咁嘅氣勢，女人戰爭真係好可怕

佢地兩班人好似準備開拖咁企係到，然後，Polly行出去，對方隊長亦都行出黎寒暄一下

Niki係九真人群之人企係到望住我，佢身邊d同學有d都認得我

然後對方隊長Maggie同Polly傾完之後就行過我面前

「好耐冇見啲Clarence」

「大家咁話啦Maggie姐」

「我已經聽過你嘅事，今次你係混雙代表之一」

「估唔到妳收風都幾快啲」

「你Partner呢?係邊個?」

我轉身望一成班女仔

「我拍邊個都得，不過我拍慣Jessie」

「呵，Jessie Tung，咁我地唔可以留手啦。你知我地混雙代表係邊個?」

「就算係Niki我都唔會留手」

「一陣比賽見啦」

「一陣見」

Maggie帶領一班同學行去準備，Niki亦都行過我身邊

「好耐冇見」

我嘆一口氣「冇冇一年?」

「嗯」

「一陣我唔會留手啲」

「我都係丫，仲有..我想講嘅係....」

「咩事?」

「前年決賽果球唔係你責任」

「我放低左啦，如果唔係，我點會企係妳面前?」

「咁一陣見啦」

「妳拍檔呢?呀...應該係妳....男朋友?」

「佢就上黎·總之你地兩個...」

「放心啦·我有事啫」

「不過我怕你俾人打死呢」

「妳代佢向我下戰書呀?」

「我係指Polly同Jessie佢地·而家成班油真妹係你身邊好重怨氣啦」

的確·我feel到背後有恐龍嘅叫聲.....

Niki用手搵下我個鼻

「一陣見」

「你同佢仲好好傾咁啫」我轉身時·見到Polly撓實雙手好不滿咁

「哦....大家朋友者....唔係妳地諗果d」

「你唔會出賣我地架呵」

「唔會唔會·點會呢」

「係就好啦·過去準備啦」

係體育館一旁·我自己係到拉筋

Polly走到我地身邊同我地講

「第一場就係混雙·你地兩個有冇問題?」

估唔到咁快就要同Niki正面交鋒

「我有問題」

「我都有問題」

「教練話用平時7成力打就夠」

「留力?」

「噃，等喇沙唔好知道大家實力」

「我前年就係輸俾佢地，佢地一定知我能力去到邊」

「但係佢地唔知你冇退步過嘛」

我對Polly微笑

「拜託你地呢對滿洲八旗組合啦」

「冇問題」

51. 妳搶左我塊球拍?

“第一場，混雙，麻煩雙方出黎熱身”

我同梓晴兩個係到對猜，應該話係hea猜

因為我地兩個企定定係到，完全唔郁

“bb!!!” 球證係專登搵羽總派相熟又免費嘅朋友黎擔當，我有理由相信佢將會係今日最辛苦嘅人
擲左公字之後，決定由Niki先開波

我地互相握手之時，我同Niki現任男友，喇沙嘅Peter仔眼中有d火花

因為我前年就係輸俾佢

「復活啦?耶穌都係3日，估唔到你要咁耐喎」

「咁要睇下，你又要幾耐先復活到啦」

場外，Chloe係兩間學校之間收緊賭注

「我贏你就3賠1，你贏就1賠2，個賠率幾好咁」

「打打下就落飛架啦」

我地兩個言語間各不相讓，係Niki同梓晴果邊，女人互串都幾好睇

「Jessie Tung，妳轉形象?著羽毛球鞋?妳對白飯魚呢?」

梓晴不甘俾Niki暗串，佢都會反擊

佢上下望一望Niki

「咁對羽毛球鞋係Clarence送俾我，有咩所謂?」

Niki望一望對鞋，梓晴同我對鞋係同色同款

「呵，情侶裝呀?」Niki個樣心有不甘

「妳話係咪係囉，不過我手上呢塊拍又幾好喎，好彩佢遇上真正嘅主人。如果佢跟錯輸波會扔拍嘅主人就唔好啦」

Niki認出，果塊係佢一直好想要嘅拍。當時佢拉住我睇球拍，同我講好想要，我就話會送俾佢，點知我儲到錢買兩塊拍時，已經俾佢派左帽

帽唔怕戴，最緊要除得快

「妳.....妳搶左我塊球拍...」

「唔係搶，係傑仔送俾我。我會用呢塊拍再打低妳」

“bb!!!!”

首先Niki開波

佢開波其實一般，所以基本上佢開波時係送機會俾梓晴扣殺

“咚!” 佢為左打雙打，已經改左開短波，務求唔好一開波就俾人扣殺

不過梓晴又點會放過佢

梓晴踏橫一步，右手一揮，佢用橫身殺左一球出黎

Niki佢地方諗過有此一著，所以呢球佢地救唔到，我地先得一分

拎呢一分果時，全場都好靜

因為梓晴出名係問題少女，估唔到佢有時會唔依常理打波

我地1-0，之後到梓晴開波

既然係雙打比賽，梓晴都會開短波俾對方

一個短波，Niki輕鬆打返過黎我呢邊

我都依照教練所講，留力。本來呢球我可以殺過去，不過要留力，所以我都係猜返過去算數

“咚” 出現左新手擊球聲

Peter見狀，就想挑戰梓晴

佢一下殺波殺過去。梓晴估中球路，伸拍輕輕一擋，食埋佢叉燒。

因為Peter仲係後場，而Niki就老毛病，打雙打時會種左係到咁

2-0

梓晴再開波，個波俾Peter，佢為左搶分就挑高個波，想盡快搶返節奏

不過梓晴好快退後回返呢一球過去

Niki見狀，就一個殺波殺落去，直飛網頂

梓晴跳前，好兇狠咁殺左一下

個波通左Niki坑渠

3-0

好啦，呢場波勝負已分，因為Niki係頭5分內俾人咁攻擊的話，佢信心會全心。之後成場波會俾人揪住黎打

呢個同Niki性格有關，佢一向只打有優勢嘅波

梓晴之前同佢比賽過，所以一定清楚對方實力

第一局就以21-8，我地先贏一局

52. Polly的秘密

坐埋一邊休息果時，Polly行埋黎同我地講

「留力呀兩個勇士」

「我汗都冇滴喎，仲唔係留緊力咩，21分我先得果6分」

「Jessie呀...」

「我留左力架啦，係Niki自己問題」

第二局戰況仍然同第一局差唔多，我地今日鬆左手，所以比數係21-14

係女雙果方邊，Michelle同Jeanie同人地就互有勝負

係混雙完左之後，Peter仔已經好快離開現場，只剩低Niki一個

佢有少許尷尬咁望住我，佢有d想坐過黎

梓晴見到咁嘅場面，佢好快咁走去我身邊坐低

女單永遠係最受注目嘅比賽

Polly係到做左簡單熱身之後，就準備上場

出場前，佢係袋仲拎左枝氣吸左啖

佢今場嘅對手，係佢一直以黎嘅老對手，可以話亦敵亦友嘅對手

九真羽毛球隊隊長Maggie

Polly今日精神有d恍惚，佢好似有d唔舒服咁

出場前佢仲去洗左個面

果時我剛係洗手間出黎

「Polly，妳冇事嘛，面色唔太好喎」

「冇....可能就快period到者....」

「不如妳休息下啦，叫Michelle代妳打呢一場」

Polly捉實我隻手

「唔...唔好...」

「不過妳真係好差啲」

「阿傑...你記唔記得果一件事?」

「妳指要我同Jessie幫妳帶羽毛球隊?」

「嗯」

我見Polly眼神好真誠，所以我點一點頭

「唔該晒你」

之後佢係學校到，雙手捉實我，再錫去我個咀到

Polly帶住病容去到場上

唔止係我，就連對手Maggie都發現Polly係有d唔舒服

不過Polly堅持要比賽

但係第一球，佢已經露出病意

Maggie接左Polly發嘅球，回返過去

Polly進行攻擊，第一下仲可以殺到波

之後Polly動作愈來愈慢，但係佢地兩個比分仲係相差一分左右

Polly對於Maggie嘅執著，真係好重

大約去到10-10果時，有一個人去左球證身邊叫暫停

「Jessie?妳做咩呀?」

「我幫妳打埋佢，俾妳塊拍我」

「不過....不過....」

「出去!」

Polly依然企係球場上唔肯走

「Polly呀...妳打唔到架啦，妳休息下啦」

「Maggie，連妳都咁講?」

「妳自己都知咩事，今日妳都有狀態。妳想贏我嘅話，我係九龍塘等妳」

Polly係兩大高手威逼下，黯然離場

梓晴代Polly打埋餘下嘅比賽

佢同Maggie兩個打到好燦爛

雙方互有攻守，互有領先

係場邊嘅Polly已經乖乖地換返校服，靜靜到係到休息

終於完左場友誼賽

「Jessie....妳過黎丫」

Polly冇力咁叫梓晴埋去

「Polly?妳冇事嘛?」

「妳幫我去同隊員講幾句，之後就可以解散」

「我...我?」梓晴指一指自己

「嗯.....」Polly點一點頭

「從今日開始，妳係球隊副隊長，連埋阿傑兩個人，幫我帶住隊波」

梓晴依照Polly說話去左同隊員講幾句後，大家就解散

而Polly仍然係坐係到，佢個樣愈來愈唔舒服

「Polly呀，不如我陪妳去睇醫生先啦」

「睇醫生冇用架...你....你陪我去醫院丫...」

「醫院?得，我抱妳過廣華，等一等」

Polly擰一擰頭

「你送我去仁安啦，我個主診醫生係果到...」

「主診醫生?」

「嗯...」

Polly 拎左醫生張咭片俾我「你打呢個電話搵王醫生...」

我望見張咭片，咭片上寫住腦神經外科專科醫生

53. 暫時平安的高手

「腦神經外科? Polly妳做咩事呀?」

果時Polly已經攤係我身上邊，然後聽到好多人大叫

「Polly...Polly佢暈低左呀!!!!」

Michelle大叫之下，好多人望晒過黎

未等教練黎到，我已經抱起Polly走出去信義里，直跑落窩打老道

正當我想橫過去廣華時，有部白車停低左

白車立即打開門，唔需要檢查，直接開車過對面廣華急症室

Polly立即被推入R房

我係門外等緊果時，護士出黎問我Polly病歷

「你係病人同學?」

「可以話係」

「佢因咩事暈低?」

「我唔清楚，佢剛先想叫我陪佢去仁安搵佢主診醫生」

「佢有咩病?」

「詳情我唔太清楚，不過佢主診醫生係腦神經外科」

「咁樣....我地幫佢照CT睇下先，麻煩你通知佢屋企人」

我一個人坐係外邊等果時，梓晴同幾個隊友，連同Maggie同教練一齊黎到

「Polly呢?佢點呀?」教練非常擔心咁問

「仲係R房，護士剛先叫我地通知佢屋企人」

「已經通知左佢屋企」

此時，有護士帶Polly去照CT

然後有醫生出黎詢問

「醫生，我係佢學校教練，我地個學生有咩事？」

「啊，係咁嘅，剛先我地聯絡佢係仁安嘅主診醫生，用電腦睇左報告，病人個腦入邊有個腫瘤，不過好彩係良性」

「咁佢洗唔洗轉院？」

「唔需要啦，我地同QE都有腦神經外科，仁安果邊都同意病人暫時留係呢到休息，有需要時佢地會黎做手術」

之後護士推住仲瞓緊嘅Polly出黎去照CT，然後推左去女性腦神經外科病房

我同梓晴，仲有Maggie、潘教練、Chloe、文浩等人坐係病房外

「腦腫瘤.....」梓晴自己係到講

「所以...Polly先將球隊交俾我同你.....」

「即係佢預自己再打唔到波，以後？」

「點可以架....我同佢仲有場雙打未打完....仲有我同佢果場單打....」

梓晴雙手捂面係到流淚

潘教練走到佢面前，摸下佢個頭

「冇事嘅...冇事嘅知唔知，傻女，唔洗喊」

我係梓晴身邊陪住佢

大約30分鐘之後，Polly屋企人黎到，佢地第一眼，就認到梓晴

「佟梓晴」

「世伯....伯有...」

「妳唔洗擔心寶利，醫生話佢冇咩事，唔好再喊啦傻女」

「知...知道...」

然後佢地轉去望住教練

「唔好意思教練，我地個麻煩女應該...暫時唔可以打波住...所以...」

「趙生趙太，羽毛球唔重要，最緊要係Polly佢冇事，而且，Jessie會幫Polly打落下去」

然後趙生再睇一睇我地幾個

「請問係邊位抱我個麻煩女過黎醫院？」

我慢慢行出黎

「世伯...係我...我方叫白車就擅自抱Polly出黎」

「做得好，你應該就係讀華仁嘅同學？」

「係...」

「我個女經常提起你，麻煩晒你啦」

「我...我應份嘅」

然後，我地聽到另一對夫婦黎到嘅聲音，不過佢地係黎鬧Maggie

54. 兩位姊妹隊長

「妳...妳點做家姐架!!!同個妹打波，都唔知佢唔舒服架咩!!!」

「Daddy呀...」

家姐?妹妹?

「唔好鬧個女啦大佬!!寶恩唔知個妹有腦腫瘤架」

潘教練係我地身邊講

「Maggie叫趙寶恩，Polly叫趙寶利，佢地係堂姊妹」

呢個時候，我走到Maggie面前

「趙生，Polly唔舒服係我發現先，係我方阻佢同Maggie比賽，責任在我」

然後醫生就叫左Polly屋企人入去睇下佢

過左一陣，兩家人行出黎，就到我地入去睇下Polly

Maggie就仍然留係入邊照顧自己個妹妹

「家姐呀...妳休息下啦」

「點解妳唔同我講呀?」

「我講左之後，妳仲會俾我打波咩?不過算啦，我方可能再打波啦」

「Polly....」

「Jessie?以後要麻煩妳啦」

「妳要我返出黎嘅原因，就係妳唔可以再打波?」

Polly佢點一點頭

「我唔可能因為咁而叫家姐轉校過黎幫我....所以我只可以搵妳...」

梓晴雙眼濕濕咁點頭

「我應承妳，我會代妳打單打，同埋暫時代理球隊」

「暫時?」

「我知妳一定會返黎」

「所以我搵左Clarence幫妳，佢會留低幫妳手打理球隊」

「Polly妳放心休息下啦，醫生有冇話幾時做手術？」

「下個月....會做手術」

「洗唔洗剃頭？」

「唔洗...」

「咁妳唔好擔心咁多啦，唔洗剃頭髮，妳仍然係咁靚女」

「我唔擔心自己靚唔靚，我擔心嘅係....到學界開始果時，我可唔可以復出...」

「妳仲諗打波做咩呀，休息下先啦」

「家姐呀...」

「快d休息，羽毛球d野，家姐幫妳處理」

我地留低Maggie係到照顧Polly，之後我地就返左屋企

係屋企內，梓晴悶悶不樂

「妳擔心Polly？」

「點會唔擔心佢....」

「總之妳放鬆d啦，佢又唔係癌症，只係腦腫瘤」

「我真係好想同佢拍多次雙打，我仲想同佢分勝負....」

我第一次攞實梓晴，佢面紅紅咁望返上黎

同時佢捉實我雙手

「你...要幫我先得呀...」

「臣，領旨」

係我地食完晚飯之後，我坐係電腦前，翻睇其他隊友比賽片段

而家Polly養病，女單個位要搵人補上

係咪要梓晴打理女單呢？其實我唔太想，我怕佢會劫

但係又有邊個代替到Polly呢？

Chloe? 佢技術係有，不過實力同Polly相差太遠

Michelle同Jeanie? 佢地兩個係女雙固定組合，盡可能都唔好拆開佢地

仲有其他隊員，我睇完名單先發現，原來Polly一直自己一個出戰女單

佢完全冇副手去幫佢

如果抽走梓晴，混雙組合就要拆檔

但係唔拆檔，女單就唔會有人打

原來Polly一個人自己帶得咁辛苦，真係唔可以睇少呢個大小姐

「你仲係到研究緊？」梓晴溫柔嘅聲音係我背後傳出黎

「而家要搵人代Polly個位有D麻煩」

「有問題?我地仲有幾個隊友可以單打」

「我知呀，不過妳都應該清楚，佢地實力同Polly相差好遠」

「咁...不如我去打埋單打」

梓晴坐係我床上邊，陪我一齊睇片

正想我轉身問佢意見果時先發現，佢又走光

55. 第一次踏入九龍真光

「梓...梓晴呀」

「嗯?咩事呀?」

「妳走光啦」

佢望一望自己身上同褲

「怕咩丫，我而家同你一齊住，唔通你有時去騎樓見到我底褲胸圍又叫我收返咩」

佢又有佢嘅道理，佢黎左我屋企住兩星期，我相信佢所有底褲胸圍顏色我都見過晒

差唔多都係粉色少女系列，仲要喱士款

「啊，我估唔到妳會著呢D款式者」

「你唔鍾意?我洗唔洗換過晒?」

「妳著俾我睇呀?」

我嘅視線繼續留係片上

梓晴靜左一陣，陪我繼續睇片

如果要搵人代Polly打單打，我心中有兩個選擇

梓晴或者Maggie

梓晴實力係無可置疑，而Maggie就可以同梓晴打到咁好睇，佢實力有返咁上下

「梓晴，問妳d野丫」

「你問啦」

我係睇片時仲聞到有薯片味，係卡樂B

「Polly家姐實力妳覺得點樣?」

「Maggie?佢兩姊妹實力不相伯仲，果日我同佢打波都出晒汗」

「嗯...妳觀察力都好好」

我地兩個靜靜地食薯片

「喂呀，食晒啦，你諗到出場陣容未？」

「我唔想妳又單打又雙打啲」

「咁...冇辦法啦」

係下一次練習，梓晴代替Polly帶領球隊，不過始終佢都唔係領導，所以我就暫時代替Polly

我就好似令狐冲成為恒山派掌門人咁，由一個男仔帶領一眾女仔

Polly嘅缺陣，對球隊嘅士氣有一定嘅影響

但係大家都好樂意為Polly而加操，特別係梓晴

因為我要兼顧埋練波之事，所以我將所有球隊行政交晒俾Chloe一個人負責

大約一星期左右，因為腦內腫瘤穩定，所以Polly佢可以出院。但係一出院果一日，佢就直接去仁安準備做手術

係佢做手術前，我地打算一眾球員去探佢

但係有一件事，梓晴佢好想做左先

當日我地買左一張好大嘅祝福咭

「唔?妳想我地成隊球隊簽名?冇問題呀」

其實係練波果時，大家都已經簽晒名上去

不過好奇怪，張咭好大張下

「喂喂，聽日你有冇時間架」

「聽日唔洗練波，妳想行街?我可以陪妳呀」

「你係陪我先好呀」

第二日，梓晴著起套校服一齊出門口

「點呀?妳想去邊到？」

「去九龍塘」

九龍塘?唔?我認我咸濕

係火車站落車後，梓晴帶我行到去真光里

“九龍真光中學”

「入去啦」梓晴帶住我入去

「喂喂喂，妳就話可以直行直過者，我咁樣點入呀？」

佢上下打量我

「行啦!!!Maggie今日係到呀」

我同梓晴好平安咁走到入九龍真光入邊

「球場球場.....係果邊！」

即使我之前同Niki拍拖，我最多都係火車站等佢放學

今次係我第一次踏入前度嘅學校

一去到球場，就已經見到Maggie佢地係到練波

「唔?Jessie妳做咩黎我地到呀？」

「係咁嘅.....Polly....佢下星期做手術...所以我地打算....」

梓晴拎出左張祝福咭遞俾Maggie

「俾我啦，我會叫晒所有隊員寫上去」

「麻煩晒妳啦」

「邊麻煩呢，我呢個做家姐嘅，應該為個妹做多d事」

Maggie叫晒所有隊員集合，然後大家為Polly寫上祝福語

仲有九真校長同羽毛球教練

56.登陸鴨脷洲

「Jessie妳預張咁大嘅?」

「嗯...一陣我仲要去鴨脷洲同大坑」

「妳過鴨真同港真做咩呀?」

「大家叫相識...希望大家可以祝福下Polly....」

「鴨真都話冇問題，不過港真佢地....妳舊年咁樣大炒佢地，唔知道...」

「如果佢地唔肯，我都唔會迫佢地嘅.....」

「妳一陣過去?」

「嗯」

「我幫妳打電話先啦，等佢地準備下」

「唔該晒妳啦」

「我唔該妳先真，妳咁幫手照顧我個妹，都唔該晒你啦傑仔」

「唔緊要丫，為靚女服務係我嘅榮幸」

「咁我靚D定我個妹靚D呢」

O...shit....

離開九龍塘，我地搭地鐵去到鴨脷洲

不過我地兩個都唔係好識路，所以都要問人地

當時個畫面好得意，一個著住真光校服嘅女仔問返路人真光係邊

搵左一陣，我地終於去到啦

“香港真光書院”

我地兩個係門口裝裝下，梓晴入去就一定冇問題，但係我一個男仔就.....

「同學，妳帶男仔入學校?」

我地同時轉身，見到一個女士係到

「妳...妳好，我想搵羽毛球隊嘅Florence」

「咁妳行入去咪得囉，咁一咁學生證啦」

梓晴好聽話咁咁左一下學生證

「嚟!」一聲之後，著左綠燈

「咦!!原來入得架!」我地兩個同時叫左出黎

「咁妳洗乜我陪妳呀」

「我...我點知啱」

身後女士聽到之後就對住梓晴講

「妳係真光女真院嘅佟梓晴」

「係...妳識我?」

果個女士微微一笑

「我點會唔識妳?妳舊年四真聯校運動會，羽毛球賽妳一個人打低左咁多對手，好難唔出名」

「唔...唔好意思」

「我係呢到嘅龔校長，請問妳黎做咩?」

一聽到係校長，我地兩個立即企好

「校長妳好」

校長上下打量我地兩個

「呢位男同學你又黎做咩呢?」

「校長，我係Jess今年羽毛球嘅混雙拍檔，我係九龍華仁嘅常子傑」

「好...不愧係華仁嘅學生，有禮貌，請問兩位有咩貴幹?」

梓晴拎左張祝福卡出黎

「校長，我地羽毛球隊隊長，發生有良性腦腫瘤即將做手術。所以我想搵齊四校羽毛球隊員，可以為佢送上祝福」

「我睇睇，哦，九真簽左啦啱」

「係....佢地隊長係我地隊長嘅堂家姐」

校長睇一睇後，帶我地去球場附近

「羽毛球隊!!!過晒黎!!!」

係校長一聲令下，羽毛球隊好快黎到佢面前

「Jessie，妳終於到啦，我地等左好耐。Maggie同我講左架啦」

「麻煩晒妳地啦Florence」

首先由校長簽名，其他羽毛球隊員陸陸續續簽上去

「Polly佢之前冇同妳地講過佢有腦腫瘤?」

梓晴擰一擰頭

「冇....我都係暑假前先歸隊，詳情我都唔太清楚」

「我知道妳會落場打學界果時，我有d驚」

「有...有咩問題?」

「好似謎一般嘅佟梓晴，係我地四間真光嘅首席球手，但係又偏偏唔鍾意出學界，妳話仲唔係一個謎?」

「Florence妳突然咁講又....」

「係咪為左打混雙呢?」

「唔.....唔係呀....係教練同Polly誠意拳拳咁邀請我...」

「定係俾人地一拳拳咁攻向妳個心先係呀?」

「喂呀....」

梓晴塊面紅到一個點

Florence走到去我面前，係到詳細咁睇住我

「你就係Jessie個混雙拍檔?」

「係...係呀，有咩幫到妳?」

「你第一次黎到，唔係唔俾D見面禮我地班同學呀??」

「見..見面禮呀?」我感覺就好似一隻純情小綿羊深入狼群一樣

「咁...妳地想我點呀，我一個人應付唔到妳地咁多個女仔，都要俾D時間我休息下先架」

Florence望一望我下邊，一個不屑嘅眼神

「睇你咪得3分鐘，點呀?買唔買雪糕俾我地呀?」

「如果我唔買呢?」

「唔買呀....呵呵呵」

我俾佢地成班女仔圍住，不停咁兇我

「買唔買呀你!!!」 「我地要食雪糕呀!!!!」

「雪糕呀!!!!」 「一人一個甜筒呀!!!!」

「買呀!!!」

「得得得，我方問題，不過大家唔好圍住我先好唔好」

「仲唔快d買!買啦!!」

「去...去邊到買呀?」

「你盲架咩!!!果邊咪有小食部囉!!!!」 Florence指一指俾我睇

我低頭行過去小食部同阿姐落單，估唔到阿姐都串我

「真失敗呀細佬你....我計平你一d啦」

成班鴨真嘅羽毛球隊係到好開心咁食雪糕

「Jessie妳跟住...要去大坑?」

「嗯..」

Florence亦都有d擔心咁樣講

「妳舊年真係大炒佢地，妳知班大家姐唔係咁好老牌架啦」

梓晴都知道要大坑班姊妹簽祝福卡係比較難

「我都知，但係為左Polly....辛苦少少都冇咩所謂啦」

57.進入大坑真光

「咁球隊呢?妳而家負責?」

「唔係呀，球隊副隊長有兩個，一個係我，另一個....係佢」

梓晴指一指住我

「你係油真嘅副隊長?!」

「佢...應該話係隊長先啱，Polly係之前已經托佢帶住我地」

Florence望一望我再講

「難到你係Polly男朋友?!」

一聽到Florence咁講，我同梓晴碌大雙眼咁款

佢立即幫我解圍

「唔...唔係呀，佢同Polly...佢地兩個冇野架」

「嘩....Jessie...妳唔洗咁緊張啎」

「冇....邊有呀...」

「總之一陣呢，妳去到大坑就小心d啦，果班大家姐唔係人咁品」

「嗯...我知啦」

我同梓晴兩個係一大班小妹妹揮手下離開鴨脷洲

邊行去車站時，梓晴佢好似心不在焉咁樣，佢好似諗緊好多野

係車上，我忍唔住問梓晴

「妳冇事㗎嘛，有心事?」

「我怕港真班大家姐唔肯簽呀」

佢講完，雙手撓實我，抬頭同我對望

「妳同佢地有牙齒印?」

「嗯....舊年...我一個人將佢地幾個主力打低晒....佢地應該對我恨之入骨。我仲要係大坑真光到，將佢地呢班大家姐打低」

「唔洗驚嘛，今日有我陪妳」

我地兩個就咁撓住手搭巴士，終於去到摩頓台落車，然後慢慢行上去

“香港真光中學”

不愧係四間真光之首，真光大家姐

佢地包埋幼稚園部、小學部同中學部

成個山頭咁款，就係大門口都有幾個

「正門呢？」

「呢個小學部架，中學部正門係上邊」

我同梓晴慢慢行上去

嘩....仲有噴水池添呀

「睇黎佢地早就知道我地會黎」

「點解妳咁講呀？」

「佢地已經企晒係到等我地」

我跟住梓晴視線望過去

有一班著黃色運動服同埋校服嘅女仔，撓實晒雙手企晒係到

佢地眼中充滿火花

睇黎一陣會有一場好戲上演

「妳一個人贏晒佢地D單打？」我係梓晴耳邊問

「嗯....冇一倖免」

「佢地真係好重殺氣，中間果個四眼妹係咪隊長呀？」

「你真係好好眼光，佢係港真首席球員」

「舊年佢輸幾多俾妳？」

「10分以上」

「咁妳今日叫我帶D野係身，係咪打算同佢再黎一場？」

「你帶之嘛，我著校服，點打」

港真有個隊員走出黎同校工講左聲之後，梓晴就咁學生證入去

佢地成班同時行到羽毛球場

我同梓晴兩個人對住一大班港真妹

首先梓晴行前同佢地講

「Caroline.....今日...」

「Florence同Maggie已經同我講左Polly嘅事，我地都知道佢就快做手術，我地都知道妳今日黎嘅目的」

「咁樣.....」

「不過妳覺得我地會咁易俾妳完成妳想做嘅事咩？」

梓晴咬一咬唇，雖然事前佢已經知道呢班大家姐一定會為難佢，但係冇諗過佢地會咁快就俾難題出黎

「妳地...想我點？」

Caroline拎住塊球拍指住梓晴

「妳可以再打贏我地嘅話，我地做咩都得」

「但係我今日著校服黎.....」

「呢個係妳嘅問題」

58.一個打妳地兩個

呢班大家姐真係惡，我企係梓晴前邊保護佢

「咁多位大家姐，Jessie佢今日真係冇帶架撐，如果妳地唔介意，不如由我向妳地領教一下好嘛」

Caroline上下打量我

「你邊位？」

「我係Jessie混雙嘅拍檔，有冇資格同妳地較量較量？」

佢地一班女仔商量完畢後再答我

「你係男仔，你會唔會讓我地？」

「冇問題丫」

「咁我地一打二可唔可以？」

「冇問題」

佢地再傾一傾後

「成交！你可以換衫」

「好丫，請問男洗手間係邊？」

「咩呀?!係到換囉」

「係...係到!?妳地女仔黎架啲!!!」

「怕咩呀!?換定唔換!!!」

「換.....」

我當我除件衫果時，佢地成班走到好近，仲要拎埋電話出黎影

「喂....我換褲啦啲」

「除囉!!定係你想我地幫你除呀？」

「好....我除」

為左保護自己，我早就係入邊著定短褲，所以我一除果陣，就引黎唔少嘍聲

「搞錯呀!!!Florence佢地有著數我地就冇!!!!」

「呀.....可以開始未呀?」我眼前一班並唔係羽毛球隊隊員，而係一群女色魔

「三局兩勝，我地二打一，有冇問題?」

「開波啦」

我今日對上嘅係港真羽毛球隊隊長Caroline同副隊長Jacqueline

Jacqueline 一發球過黎，我都好有風度咁點返俾Caroline

點知呢個隊長果然係心狠心辣!!!就係我回波去到佢果到時，已經升起個人，跳殺

佢殺波嘅聲音好響。球速好快

我要彎低身先救到呢一球，仲要係好勉強咁救到

但係，天助我也

係我救波果一下，其實係撻撻地Q

個波係網頂到挨一挨，然後好冇力咁跌落對面場區

咁樣我就拎到一分

1-0

「死符轆!!!!」Caroline向我方場區咆哮

用幸運成分黎拎分都唔俾，呢位隊長真係專制過呂后

換轉到我發球，因為我得一個人關係，所以我就開d傳統少少，初學者嘅高遠球同佢地慢慢玩下

突然間副隊長Jacqueline一下跳殺，個波冇剛先Caroline果球咁快，但角度刁轉

我要橫身反手伸到盡先有可能救到

但眼見呢一下，應該飛盡都未切救到

所以我用左呢個方法.....

平時正經打波係絕對唔會用到

今日招呼下呢班大家姐，所以就同佢地玩下

我轉手用左手橫身救左呢一球

然後立即起身換返右手再企返去中間

佢地俾我呢一下神來之筆嚇一嚇，打亂左陣腳

所以只可以求其回返個波過黎

就係個波飛到過黎我果場區果時，我又表演下跳殺

“咁”一聲非常之響

個波係兩個人之間落地

2-0

「點呀?兩位，仲打唔打呀?」

Caroline俾我咁樣串一串法，塊面黝到紅晒

「打...當然打啦!!!」

「咁我要side bet啲」

「怕你麼!!!想要d咩」

「我要妳電話號碼」

Caroline聽到我咁講，塊面就更紅

「痴...痴線啦你!!Jessie呀!!!妳...妳管教下佢啦!!!」

係場邊睇波嘅梓晴一面無奈咁表示，幫佢地唔到

佢地兩個俾我咁玩一玩，成場波都有咩專心咁打過

所以我好快就搞掂左佢地

咩野真光大家姐啲，原來咁易受人擺佈

不過話明大家姐，佢地都唔係人咁品嘅

當Caroline帶住我地拎張祝福咭去俾校長同教練簽名之後

佢地呢班女色魔嘅真面目終於露出黎啦

我再一次俾一大班女仔圍住

「喂喂!!!Florence佢地有雪糕食，咁我地呢!!!」

點解要請佢地食雪糕?

「妳地輸左俾我啲，點解要我請妳地食雪糕，應該係妳地請我食先係」

「係咪要我地請你食呀?」

「當然啦」

我轉身望見梓晴，佢已經走到好遠

然後我聽到.....

「姊妹!!!綁實佢!!!打開佢個口!!!!我地一人請佢食一杯雪糕，食唔晒唔准走!!!!」

最後我都係死死地氣去買雪糕俾呢班女色魔食

佢地食得好開心

「Jessie，我地全部都簽晒」Caroline將祝福卡遞俾梓晴

「唔該晒妳...」

「Polly個單打位....妳會頂上?」

「我都唔知，冇理由叫Maggie轉過我地到...而且Polly都唔會俾佢家姐咁做」

「放心啦，Polly唔會咁易認輸，妳未出現之前，佢可以係感冒加m到同有腳傷情況下，同我打足三局，打到deuce，佢先輸俾我，妳地隊長嘅堅持，唔可以睇少」

「係...」

「Polly佢幾時做手術?」

「下星期....詳情要問Maggie先知」

「咁呢張咭妳就代我地交俾佢啦」

「知道...」

「下次係聯校賽到，我唔會留手」

Caroline送我地離開學校，佢真係好有霸氣

「係啲，佢咁有霸氣嘅?佢仲文名叫咩?」

「幗敏·方幗敏」

估唔到中文名更加有霸氣

59.完成手術

到左Polly做完手術第二日，我地幾個連同d隊長s一齊去探佢

Polly不愧係有錢女，佢住嘅房都係私人房(應該係有保險claim)

係房中除左Polly之外，仲有Maggie係到陪佢

我地將一張簽滿晒名嘅咭送俾Polly

「Florence....Caroline....」

「Polly唔該妳快d起身，冇左妳嘅話今年會好悶」

「我派Jessie一個同妳地較量已經足夠，唔需要我落場掛」邊咬住薯片嘅Polly笑住同Caroline講

「咁串？」

「大家咁話啦」

「Polly，醫生話妳可以再打返波咩？學界妳趕得切？」

「我個手術唔洗開釐，應該冇咩問題」

「咁妳快D復出，我真係想同妳地兩姊妹打返場雙打」

「我地？家姐，佢挑我地啫」

「一係妳book會所，然後Caroline妳地黎囉」

佢地四個隊長嘻嘻哈哈係到講笑、講是非，通常係女校有小道消息傳出，就好快就會通晒天

特別係真光呢d姊妹校

當梓晴去幫Polly買野果時，佢地四個以不懷好意嘅眼光望住我

Polly俾個眼神Maggie

「阿傑哥仔呀，我地有D野想問問你架」

我眼前出現左四個女魔頭，頭上有角，口露尖齒咁望實我

好似準備將我生吞咁樣

「咩....咩事呀...四位隊長」

Caroline用好高冷嘅眼神望住我

「我地想知點解果日你會陪Jessie走遍幾間學校，呀...應該話點解佢會搵你，以我地Jessie嘅認知，佢性格係非常孤僻，唔鍾意同人講野、有指示就照做之類」

「咁...佢係呀」

「但係Polly話自從佢改為同你拍檔之後，佢嘅性格好似變左第二個人咁樣，有咩原因呢呵？」

我不停R頭諗下點解

「可能....唔....可能因為....」

「因為你地兩個都係滿洲旗人？」

「可能係掛...」

Florence係另一邊食住薯片講

「我睇唔似嗰，果日佢望你嘅眼神好似好有安全感」

「你地兩個，一個鑲黃旗，一個正黃旗，祖先又係康熙嘅輔政大臣，幾好幾襯呀，怪不得你好似睇唔上我阿叔個心肝寶貝」

「家姐，呢d冇得迫嘅」

「你又送左Niki兩塊拍俾佢，而家你地又有對一模一樣嘅鞋，仲有!!」

仲有咩呀？

「有人見到Jessie經常出入你果座大廈嗰」

唔通....咁快就俾人知道晒？

「阿妹，妳好似話過Jessie係自己住架嗰」

「係呀，佢應該係自己住上海街天台屋」

然後佢地四個一齊望實我

「你好快d講啦，呢d關乎女仔嘅名聲架」 Caroline d殺氣又再出現啦

「講啦!!!講啦!!!!」我俾佢地四個夾擊

呢個時間，梓晴返到黎

佢見到呢個情況，佢唔知發生咩事

「做咩呀？」

Polly坐係病床上望住我地兩個

「Jessie，我地四個唔係多事，不過已經有小道消息話，妳同阿傑同居，如果傳左去老佛爺到.....妳明啦，妳仲要獎學金讀大學」

「下....呢層.....」梓晴顯得有d唔好意思

所以就由我代佢答

「我將屋企間房租左俾佢，因為上次打風發現佢屋企比較危險。呢個提議係我屋企提出嘅」

佢地聽現呢個消息後，好努力消化緊

「至於係唔係同居呢，就交俾大家定奪啦」

佢地四個你眼望我眼，然後Polly先開口講

「我地唔係唔信妳地，但係如果老佛爺問起的話....唔....」

「妳地成隊要夾口供先得架」Caroline提醒Polly

「係...係....所以呢...」

「所以咩呀？」

「我地要一齊上你屋企坐下，玩一兩次咁樣啦，放心啦，我地唔會拆左你屋企嘅」

一聽到佢地話要黎踩場，咁先最唔放心呀

「放心啫，我地唔會亂黎嘅」

點解佢地講到好似會集體剷上去我屋企咁？

60.日久生情的感覺?

望一望梓晴，佢有少少尷尬，但係又有少少開心咁

我地係屋企入邊果時，梓晴好鍾意黎我房到坐，甚至攤係我張床到

當然我地會打開門

「喂喂，佢地今日講D咩呀？」梓晴攬住佢枕頭，係我間房再一次走晒光咁坐係到講

「唔?幾時？」

「我出左去果陣囉...」

「佢地咪問我地係咪同居，點解妳同我拍檔左之後，個人性格變晒咁囉」

「咁...唔好咩?定係佢地鍾意以前嘅我？」

我轉張椅對住佢「妳笑返，開朗D好過以前咁樣，成日都板起塊面，黑口黑面丫」

「咁....即係你鍾意我而家咁樣多D？」

「咁當然啦，郡主應該笑得開朗D架嘛」

「唔.....我為你而改架咋」

「咁妳幾時開始改變？」

「幾時呀....唔.....你抱我返屋企果次囉」

「果陣我識妳冇耐咋喎」

梓晴面紅紅對住我

「咁...我覺得你唔會呃我嘛，你又對我坦坦白白，又咁照顧我....為你改變係好正常架」

然後我聽到佢好細聲講左一句野

「唔通你想你福晉一日到黑都板起口面對住你咩？」

「下?妳講咩話？」

「冇!!!冇呀!!!佢地係咪會話上黎玩下咁呀？」

「我叫佢地上黎，咪要話俾人知，妳係我屋企住，同理一齊諗下，如果遇上體藝果班羽毛混雙，我地要點打囉」

「體藝?你有冇片?」

「上你條管有得睇下嘅」

係你條管上邊，我同梓晴睇緊近年混雙比賽

佢拎住包薯片睇得好入神，當佢專心做一件事果陣，佢係非常專注

而我，就專注係佢對又長又白嘅長腿之上，仲有佢果對唔大唔細嘅小籠包到

可能我太專心睇佢關係，終於俾佢發現左

「你好鍾意我對腳咩?你成日都裝我」

當時我先如夢初醒

「下!!唔好意思....即係我呢....其實」

梓晴面紅紅，不過又唔黴咁對我講

「我同你...兩個人時候...你望就好啦....遲D佢地上黎....我都係著返長袖比較好」

氣氛突然間好尷尬，正當我想開口講野時候

大閘傳出開門聲

阿媽返黎啦!!!!!!

梓晴每一次都好乖咁幫阿媽手去廚房準備晚飯

今日亦都唔例外，阿媽返黎正正解救左剛先我地兩個尷尬嘅氣氛

梓晴佢話，唔想我福晉成日黑口黑面，所以佢自己肯改變

佢咁講，即係暗示?

其實同佢相處耐左，愈來愈清楚佢係咩人

佢只係怕受到傷害而收埋自己

自從同佢拍檔，我抱佢返屋企之後。我同佢關係好左好多，佢同其他隊員關係亦都親近好多

當佢搬黎同我住後，笑容比以前多左好多，而且佢肯開口同人講野

識主動去關心其他隊友

可能真係我改變左佢?

但係我係咪真係對佢有意思呢?其實都有少少嘅

我唔係因為大家都係滿洲人而對佢產生好感

我對梓晴果種感覺....係果時Niki俾唔到我

難道我真係鍾意左梓晴?

係日久生情?

61. 妳係一個問題少女

「仔呀!!!!入黎幫阿晴手啦!!!!」阿媽係廚房大叫

「係!!!」

我入到廚房，見到梓晴係到洗菜

「嘩，阿媽妳今晚整雜菜煲呀？」

「唔係呀!今日你阿爸落地盤，今日係最後一日落去，佢落完地盤果日要食咩丫」

「打邊爐」

「咪係囉!!我漏左野冇買，我去買先，你幫阿晴手洗野啦」

「妳要買咩呀？」

阿媽一下凌厲眼神回望

「蠔!」

明嘅明嘅，佢地想好好黎一炮

阿媽出左去買蠔果時，我同梓晴兩個人係廚房洗野

我地企到好埋

「我聽到有D消息」梓晴細細聲，好尷尬咁講

「妳係廁所聽到我同文浩搞基？」

「唔係呀，佢點會係基」

「咁妳聽到D咩？」

「有傳聞....有傳聞你同Polly...之前去過街?同埋你同佢而家...」

我立即恍然大悟，梓晴應該係有d介意

「去街嘛...試過幾次囉，不過都係關於妳」

「關於我？」

「初次練波，妳拍文浩果時，妳係一個好神秘嘅問題少女」

「我...我邊忽係問題少女呀!」佢搵d菜黎扔我

「哈哈，妳之前又唔講野，又Cool，但係實力又好高不過又唔打學界，所以俾人一種好有迷離嘅感覺」

「咁都唔好用問題少女丫」

「用倩女幽魂會唔會更加好?」

梓晴望一望d餸「點解今晚打邊爐嘅?」

「哦，有時阿爸落一段日子地盤，當個Site完左，佢返office果，佢就會打邊爐補充下體力」

「咁阿瑪佢邊間公司呀?」

「佢係皇家佬嗰」

「我仲以為佢係大判添」

我地今晚都幾多肉下，有肥牛、鮮牛、丸、魚皮餃、烏冬等等

「點解額娘要買蠔嘅?你地好鍾意食?」

佢咁問我，我真係唔知點答佢嗰

「呀...即係呢...蠔就有D...唔...比較對男士有用嘅補充體力物質係入邊嘅」

「咁你洗唔洗又食多D?」

「即係我仲後生，唔洗補住，咁可能今晚佢地要運動下，先至.....妳明架啦」

梓晴仲係唔太明

然後我就同佢講得白D

「今晚佢地可能要敦倫呀，所以要補助下體力，明未?」

我講到咁白佢先明

「咁...我今晚係咪少D出黎比較好呀?」

「妳估佢超人咩，半個鐘就夠架啦」

「你...你講到好似好正常咁嘅」

「咁兩夫婦，好正常者。唔通好似野生動物咁咩」

「你都有你嘅道理」

我地拆好晒D芋絲之類洗乾淨

等埋阿爸阿媽返到黎，搞掂!

四個人坐係廳到，大家都將肉放落去

感覺真好

「仔呀，你幫阿晴淥下野啦」

於是我就夾左舊牛肉俾佢

當然仲有其他野啦

「拿!!!食蠔啦你」

都話左我唔洗補囉

我地仲不停淥魚皮鮫、丸果D

「阿晴妳以前好少打邊爐?」

「唔?自從一個人生活之後都有lu」

「哈哈，咁妳要食多d啦，妳咁瘦」

唔係掛阿媽，妳未見過佢食甜品果陣個樣者.....

62.我地第二次去街

「你地兩個係咪決定左一齊出賽？」阿爸咬住舊牛肉問

我亦都將口中舊牛肉啜入口，好滑好滑

「係呀，阿晴都可能會打埋女單」

「唔？阿晴妳咁勇猛？」

梓晴低頭食緊芋絲再望上黎

「係咁嘅阿瑪.....我地女單球手...我地個隊長有腦腫瘤，良性，剛剛做完手術，未知可唔可以係學界比賽，所以我有機會代佢比賽」

「單打同雙打妳都打過？」

「嗯」

「呵，我真係對妳好有期待，想睇下妳打波」

「其實我打波....一般」

「妳太謙啦，有機會嘅話我都想同妳打一場」

「唔...都可以架」

「哈哈，我受唔到太劇烈嘅比賽啦，普普通通衛生波就可以」

阿爸開始佢嘅蠔宴，阿媽都買左好多返黎

「但係阿瑪，阿傑話你而家仲可以打贏佢啲」

阿爸笑左一笑，再食左隻蠔後

「冇錯，打體能打速度我一定唔夠妳地兩個打，但係一打技術，妳地未必夠我打，我有嘅係經驗」

「oo~really?」我將一埋金菇放入口到

「你咪睇少我」

我地四個繼續淥牛肉

「咁洗唔洗同妳地打場衛生波??」阿爸條癮開始黎啦

「有機會都可以呀」

「咁我就同你地約個時間打」

阿爸同阿媽去拎d雪涼左嘅涼茶果時

梓晴幫我涼左d野食

「打開口丫，餵你食野」

「呀~」

梓晴將d野食放係我個口到

「妳黎左差唔多成個月，妳習慣未呀？」

「點會唔慣，仲好開心添」

「妳開心就好」

「咁你...想唔想我一直係到住？」

「妳總要嫁人架嘛」

「或者...我嫁左之後仲係到住呢」

梓晴郡主算唔算係明示緊，佢想同我行多一步？

正想我回答果時，阿媽拎左d涼茶出黎俾我地

再一次舒緩左氣氛

打完邊爐，我地各自返房

我拎起電話，就見到梓晴佢wts我

“聽日有冇野做？”

“冇呀傻妹，妳想做咩呀？”

“唔...想行下街”

“好啦，同妳出去啦”

第二朝起身，我同梓晴換好衫就出去

今日佢又再一次著裙出街

「無啦啦妳又想去街嘅?」

「咁...Polly夠同你去過街啦，唔通我唔得咩?」

我地一出到去，就行到好近

有幾次我隻手仲掂到佢隻手

今次應該係我第二次同佢一齊行街

「係嗰，妳幾時生日?」

「我?27/9囉，做咩事?」

「咁都要送d野俾妳架嘛」

梓晴笑笑口咁講

「你肯陪我，就已經足夠啦，邊洗買咁多野」

經過小食檔，我望一望佢

「妳以前有冇食街邊野架?」

「尖沙咀同旺角D野都唔好食」

「妳鍾意食咩先?」

「不外乎魚旦燒賣」

諗起魚旦燒賣，我諗到有一檔非常好食嘅，一定要帶一帶佢去

「跟我黎啦，我知道有一檔非常好食嘅」

然後我帶左梓晴上地鐵

63.第一次搭電車

「嘩，檔野要搭地鐵去咁遠架？」

「好食嘅話，我搭飛機去都冇所謂呀」

「真係咁好食？」

「妳試下咪知囉」

我地兩個人坐係地鐵上，不知不覺，梓晴都會雙手撓實我或者挨住我坐

係不覺意之間，我地兩個嘅距離已經愈來愈近

終於到左葵芳，我帶佢落車

「帶我黎葵芳？唔通間野係葵廣入邊呀？」

「當然唔係啦」

我帶住佢去另一個出口

寫住“強記小食”

「拿，呢檔D魚旦燒賣好好食，牛肉又大粒」

我帶住梓晴去買左幾串魚旦、牛肉果D，搵位慢慢食

強記嘅魚旦好彈牙，辣汁又一流，牛肉又大粒夠肉

梓晴佢食得好開心

「真係好好食喎，魚旦好彈牙」

「係呢，我以前經常黎食」

「因為陪Niki黎？」梓晴一下睇穿我嘅過去

咁佢又冇錯嘅，Niki經常要黎葵廣睇野，有時又話剪頭髮扔低我一個，所以我咪自己一個行囉

又俾我搵到檔咁好食嘅野，從此我一口痕，就會搭車黎食

男仔食親呢d野呢，就一定係食到通面都係汁

梓晴見到之後，就拎出紙巾幫我抹咀

「你呀!!食親野都係咁污漕架」

「有咩所謂」

「咁額娘洗衫好辛苦架嘛」

「咪又係洗衣機洗」

梓晴打一打我個頭「丫!!!你真係唔知道用手洗衫係幾咁辛苦」

「係啦係啦，妳都係唔好再用手洗衫啦」

「點解呀？」

我捉起佢對手「妳睇下」

「做...做咩喎」

「妳係女仔，都要好好保養下自己雙手架嘛」

梓晴好快收埋自己隻手

「怕咩喎」

「妳食完野，想去邊？」

「唔....陪我睇下野囉」

「妳有野想買？」

「我想知Polly同你行街果時，著成點」

「咪著校服囉」

「每次都係咩？」

我點想返Polly第一次同我行街嘅情況

「唔....第一次咪長裙，高身少少d涼鞋囉，仲有幾次著平底鞋、波鞋」

「佢每次都著裙？」

「都係嘅」

於是我地兩個就去睇以上嘅野

不過價錢唔平架

我開始get到梓晴佢諗咩

佢可能想參考Polly嘅形象

正當佢睇緊鞋果時，我同佢講

「妳想拎住野同我行街？」

「唔....拎住又好似...」

「妳想買果對鞋？」

「嗯」

「好簡單者，呢到俾錢，遲D返旺角拎咪得囉」

於是梓晴試左兩對減價款

一對高身涼鞋同一對平底鞋

正正係Polly果款鞋

我地俾左錢繼續行街

「估唔到妳都會買野架喎」

「咁而家....唔洗俾租金果d，會多返錢用」

「總之妳而家呢，唔好擔心住同食」

「不過總要俾返錢你地架....」

「阿爸話唔洗喎」

「但係....」

「妳自己都要儲錢讀大學丫嘛」

「你理得我丫」

時間仲早，唔知佢仲想去邊呢？

「妳有冇地方想去？」

「唔.....其實呢....」

「咩？」

「我未搭過電車」

「妳想試下？」

「噃！」

「好啦，同妳搭電車，之後去食夜晚飯啦」

「你請我呀？」

「有咩所謂」

於是我帶左梓晴去堅尼地城，走上電車

64.你想揀佢咪揀佢囉

“叮叮~叮叮~”

梓晴係電車上周圍望

「嘩....原來堅尼地城咁得意架?」

「係呀·新舊區交替」

「我仲以為呢到係全部舊區添」

「唔....妳想睇舊野?」

梓晴點一點頭

「一陣去上環我帶妳睇睇丫」

“叮叮~叮叮~”

慢慢電車去到海味街

「點呀?洗唔洗買返D補下咁呀」

「我都唔識煮嘅」

「妳唔係應該好叻煮飯咩?」

「係咩?」

「咁妳煮野咁好食·一定好叻」

「你呀!口花花」

去到近上環·我地落車·經扶手電梯上山

「妳以前...同屋企人有咩做架?」

「唔?冇架·阿瑪得星期日有得休息·佢放假咪係屋企瞓覺。額娘都係」

「所以妳咩地方都有去過」

「嗯」

「咁睇黎我以後要帶妳去玩多D」

「真係？」

「呃妳做咩？」

梓晴眼中有少少淚光，再打左我一下

我帶住梓晴去到嚟囉街到睇野

「呢到好多舊野喎」

「係呀，當年會考有一課書，叫店舖，作者西西就係行黎呢到D後街黎睇舖」

「有特別嘅景色？」

「唔....可以睇到老香港囉」

經過一D街邊小檔，梓晴對D野好有興趣

我陪佢一齊睇

「呢枝係....」

「係髮簪黎架」

「妳點會知架？」

「我額娘有丫嘛」

「不如...買枝俾妳？」

梓晴拉埋我去一邊「傻架咩，你都識講呢到係地攤貨啦，我先唔會將呢D野插上我個頭到呀」

「咁我地再睇其他野丫」

係嚟囉街，四周都有好多舊貨

有月餅模、有刀刀劍劍，有民國大洋

甚至有雍正通寶(當然係假野啦)

梓晴拎出電話，搵返西西嘅課文黎睇

「唔....同內容相差好遠」

「當然遠啦，會考都不知冇左幾多年」

「不過仲有D舖頭留係到喎...呢間酸枝店...」

「妳真係咁認真咁，邊睇邊行？」

「咁先可以睇真D呀」

果晚我地兩個真係去挑戰自己生命

尋晚打完邊爐，今晚就食韓燒

個喉嚨一定會好痛，不過唔理啦，有得食就好食

呢個正正係我嘅名言

係韓燒餐廳內，我地兩個面對面坐

滋滋聲此起彼落

四周都係油煙，好肥膩嘅味道

梓晴燒好一堆牛肉，再放係我隻碟上

「估唔到，妳燒韓燒都有一手喎」

「只不過係一堆生嘅肉，俾我再熟之嘛」

的的確確，梓晴煮野真係非常好食

「今日做咩咁好請我食飯？」

「咁唔通要女仔出錢咩」

我燒左一堆肉之後，叫佢打開口

「餵妳呀」

「呀~~~~」

結果佢自己都係食到一咀都係

我地兩個食好飯，返去旺角到幫梓晴拎鞋，然後兩個人一齊返屋企

「妳今日劫唔劫呀？」

「同你去街點會劫」

「妳無啦啦要問Polly點著嘅？」

梓晴面紅紅咁講「咁佢.....靚女嘛，又識襯衫」

我伸個頭埋去佢到

「定係有第二個原因呀？」

「咩...咩呀....咩原因㗎....咁你想揀佢咪揀佢囉...同我講咁多做咩㗎」

「咁我又冇話一定會揀佢嘅」今次輪到我細細聲講

「唔?咩話?我聽唔到呀」

「冇野呀!!」

梓晴明顯係聽到我講咩野，佢係我身邊不停咁問我

忽然，有一種生物係我地面前出現

65.大家有冇掛住我呀?

梓晴呆呆咁企係到，我亦都同佢共同進退，同眼前嘅生物互俾

我地兩個向左行，佢又向左行

向右行，佢又向右行

佢兩條觸鬚郁下郁下，好似知道我地會向邊一邊行咁樣

我地兩人一強係到對峙...

「不如....你去趕走佢啦」

「我...我呀?」

「你都驚呀?」

我不停點頭

「不過我會企係妳前邊嘅」

講完，型完，行前一步

我緊緊捉實梓晴隻手，跑呀!!!!

面對贏唔到嘅對手，著草係唯一選擇

但係我地走果時，強亦同我地有相同諗法

佢跟住我地一齊走

我地見佢走近我地，所以我地又跑快D

「喂呀!佢跟住我地呀」

「咁不如踢死佢啦」

「我踢?」

「你...你叫我踢呀?」

「我踢啦」

對唔住強哥!我會幫你風光大葬架啦

我一下大腳一兜，強哥已經口中念念有詞一邊D我媽媽一邊飛走

直到佢飛到去垃圾車上邊

梓晴雙手捉住我

「嚇死啦....佢好似追住我地咁嘅」

「因為妳有吸引力囉」

佢拎起我拖住佢果隻手，然後咬落去

「話我吸引小強!？」

估唔到梓晴咬人係咁痛

「係啦係啦，唔話妳啦」

「哼」

當小強飛走之後，我地兩個慢慢行，期間梓晴冇放開我隻手

經過糖水舖果時，我地兩個正好四目交投

「妳想食糖水？」佢個樣已經出賣左佢

俾我咁樣踢爆法，佢自己都有D唔好意思，所以佢想將個波踢俾我

「咩...咩呀!!明明係你想食，你又屈我!？」

同佢住埋一齊個幾月，佢嘅脾氣我已經摸清

佢咁嘅反應，一定係俾我講中左

佢又係到拐鬮，啱長個咀，所以我都一邊拖住佢，一邊搵佢塊面

「咁妳可唔可以去陪我食糖水呀？」如果我唔認我想食，佢係唔會放過我

「好啦，見你今日陪左我成日」

我地入到糖水舖，佢叫左碗幻彩明珠，而我呢，我比較鍾意食凍野，所以我叫左碗凍綠豆沙

梓晴用叉拈起舊芒果，然後餵我食

「點呀?今日開心嘛」

佢望住我微笑

「你咁識氹我，實開心架」

「妳笑果D咪幾好，咁先靚女架嘛」

「關你咩事喎」

我地兩個食完糖水，一出舖頭外，自然咁兩隻手又拖起黎

「下次學界比賽，唔知我地會去到邊呢？」

「我同妳拍檔，至少入到八強」

「真係？咁有信心？」

「當然」

愈黎愈近開學日子，亦即代表就到學界比賽

女單個位究竟點呢？大家都好心急想知道

終於，係開學後一星期左右……

真光女書院內，羽毛球不停練習

副隊長嘅梓晴同埋我，係球場上不斷督促大家練習

係大家練到好緊張果時，有個人係門口出現左

佢慢慢行到球場中間

大家亦發現佢嘅存在之後，好開心咁衝向佢

冇錯，Polly終於返黎了

「各位!!!冇掛住我呀!!!!」

其實問黎都多餘，大家真係非常掛住佢

我同梓晴兩個人行近Polly

「好啦，我而家可以將隊波交返俾妳啦」

Polly笑住咁對住我地兩個

「辛苦晒啦，洗唔洗送返d野俾你地？」

「唔洗啦，大家咁熟」

「唔.....咁呀.....」

Polly望一望梓晴後，走過黎錫左我塊面一下

呢一下動作，令全場大叫

因為我同Polly嘅傳聞，係無間斷地出現

佢呢下動作，令到身邊嘅梓晴塊面立即黑過包公

Polly見狀就走去佢耳邊講左兩句，然後佢塊面就由黑轉紅

「好!!我地開始練習!!!!」Polly精神咁對住大家發號施令

66.好似情侶嘅一對

「Polly同妳講左d咩呀？」

「你...你咪理啦!!!你好開心啦!!!人地錫你」梓晴塊面又紅佢又嬲咁講

「做咩呀?妳唔鍾意?」

「你...你嘅事關我咩事呀!!!」佢好嬲咁行開左

Polly見到咁樣，就行埋我身邊

「你自己係咪未有答案呀？」

「咩...咩答案呀？」

「之前我話...想你做我男朋友...你俾唔俾到答案我？」

「即係...Polly呀.....其實.....」

Polly望一望我，然後同講

「我知道你鍾意果個，係Jessie，係唔係？」

「其實又唔可以話鍾意嘅，係有好感囉.....」

佢拍一拍我膊頭

「你而家同佢一齊住，如果你覺得佢真係適合你嘅話。不妨同佢發展下囉」

「妳點解會...」

「因為我知道你唔會揀我，你放心啫，我唔係果D因愛成恨，要生要死果種人」

當日練習完後，梓晴嬲爆爆咁返屋企

食完飯後佢返左入房，關埋門冇出過黎

我係咪做左咩激嬲左佢?

第二日，我同佢同時出門口返學

等lift時，我係佢身邊不停問佢

「嬲完未呀?」「嬲完未呀?」

梓晴嘟起個咀好唔開心咁

但係佢都有理我

「你尋日好開心啦，人地錫你啦」

「咁我都唔知佢會咁做架嘛」

梓晴入到lift中仍然鼓起泡腮，所以我就不停咁篤佢塊面

佢好不滿咁鬧我

「你呀!!人地錫你你就接受?」

「係啦係啦，係我衰啦」我係佢面前扭耳仔認錯

「著緊校服架!!你出到去咪咁做呀!!!」

「同妳食早餐?」

「呢個當然啦!本郡主肚餓」

我地兩個去到學校附近間茶餐廳食早餐

依舊，佢食火腿通，我食沙牛麵

係茶餐廳內，有唔少我地兩間學校嘅同學係到

但係大家都係同校嘅坐返埋一齊，所以我地兩個就成為焦點

梓晴係檯底踢我一下

「唔?做咩呀?」

「我覺得好似好多人望住我地咁嘅?」

我抬頭望一望四周

「當然啦，成間餐廳得我地呢檯係一男一女食野，其他都係全女班全男班」

梓晴變得好尷尬

「咁樣...我地一齊食早餐會唔會唔好呀?」

「怕咩丫，我同妳都一齊住緊囉」

食好早餐，我同佢一齊過馬路，兩個人一齊行返學

對於有人送梓晴返學(即係我)·大家係佢背後都議論紛紛

因為暫時只有羽毛球隊知道梓晴已經改變左

佢係其他同學心中·依然係一個唔出聲·好孤獨嘅問題少女

我送到梓晴去信義里果到

「好啦·你唔好上去啦」

「妳冇問題?」

「有咩問題啫·反正...反正今晚都會見面架啦·而且今日仲要練波」

「呀...講起練波·Polly佢係咪負責單打?」

梓晴點一點頭「出賽陣容冇變·而且Polly話會幫你整件學校風褸俾你·同埋整件隊衫俾我地」

「隊衫呀?妳地設計呀?」

「聽講係Polly屋企個集團Sponsor·所以Maggie·Floerence同Caroline佢地果邊都會有件一模一樣」

一模一樣?咁樣我咪變左佢地真光一份子囉·我洗唔洗著長衫呀?

「差唔多夠鐘啦·有咩遲d再傾啦」

「妳晏就係咪同我食?」

「咁...唔同你食...我仲可以陪邊個啫」

我地兩個係真光附近係到傾計·就好似一對情侶咁樣

所以·我地引黎真光訓導組嘅目光

67.老虎狗的懲罰

「華仁嘅同學!請問你係到做咩呢?」係一名訓導處老師行落黎審問我

正當我想答佢果時，我地救星出現啦

「呀Miss Sin，佢係我地羽毛球隊副隊長，佢同緊Jessie傾野咋」

我地回頭一望，係Polly

佢剛先係私家車落車

佢爸爸渣嘅，係寶馬7系

Polly走過黎撓實梓晴

「行啦，返學啦」

「下...係...」

「唔洗咁唔捨得嗶，好快又有得見面啦」

Polly就咁就同梓晴兩個返左真光

而我就行返去華仁果邊，返到自己課室，坐係窗邊望過去真光

我同梓晴目光對上左

原來佢都係坐窗邊

上堂期間，我有時會望一望梓晴

睇住佢上堂認真嘅佢，真係好吸引

我掛住望佢望佢...訓導主任兼化學阿sir老虎狗黎到我身邊都唔知

係真光嘅梓晴仍然好專心咁上堂

同時我耳邊出現左一把聲

「條女好正呵?」

「梓晴?幾啦」

「所以你就連老虎狗都唔怕啦係唔係呀?」

「一向都唔怕佢架啦」

「哦，係呀？」

然後身邊出現犬隻聞野嘅聲音

我認得，呢個係華仁內，係老虎狗獨特嘅聲音

我回一回神之後先諗起，係嗰，而家係chem堂嗰...

我戰戰兢兢咁望去後邊，老虎狗露出仁慈嘅微笑

「呀，魯SIR，咁啱呀？」

「係囉，咁啱呀，真光有咩好望咁呀？」

其他同學，佢地好多人嘅膊頭都係到震緊

老虎狗拍一拍我膊頭

「叻仔嗰，咁都俾你識到隔離學校D女仔」

「唔係呢阿sir，上堂啦好嘛？」

「好...好...你想自己黎定我叫你黎呢？」

點都好，我係逃唔過老虎狗嘅懲罰

我唯有企起身，拎高自己張椅，倒轉頂係頭上邊

「落堂先好放低」老虎狗擺低呢一句說話就返去繼續教書

而我都乖乖地繼續上堂，唔再偷望梓晴

食午飯果時，阿靜拉住梓晴一齊出黎

係餐廳內，佢地三個話題自己係我

「傑少，做咩頭先俾人罰呀？」

阿靜係到恥笑我

「妳點會知我上堂俾人罰」

「你頭先上chem堂俾人罰頂住張椅上堂，好多人都知啦，你得罪左老虎狗丫嘛」

阿靜係電話show我頭先係課室罰企張相出黎，同時我發現呢一張相，已經係真光羽毛球隊wts

group到流出

大家都係用一個恥笑嘅emijo黎回覆

包括梓晴

「點呀?頭先上堂搞d咩呀你?」梓晴好奇咁問我

「佢掛住望妳地學校呀」文浩搶先回答

聽到文浩咁講，阿靜好興奮

「你掛住望Jessie上堂呀?佢又係坐窗邊架啎!!!!係唔係者?!」

阿靜煩緊我果時，我個午餐到左

係阿靜同文浩兩個人食得好開心果時，梓晴輕輕用手肘撞我一下

「唔?」佢再伸個頭過黎同我咬耳仔

「你頭先上堂做咩俾人罰呀?你偷望女仔?」

我不甘示弱向佢反擊

「係呀!我偷望妳呀」我係佢耳邊細聲講

佢無面面咁對住我，然後又係我耳邊講返

「返屋企咪可以望到夠囉」

梓晴講呢句果時，塊面好紅

「你留心D聽書呀，一陣俾我望見你又偷望過黎，我黐你架」

「係啦係啦，乖乖地聽書啦」

梓晴湊近我

「最多今晚我過黎陪你溫書?著短褲?」

「喂....細聲D啦」

「咸濕仔」

放學後，我又一次去真光練習

進入結局篇啦

68.第一次錫咀

今次係我第一次係開學後入去，所以引黎好多人望住
為左令我冇咁受觸目，Polly佢地搵左佢地真光嘅體育校服俾我著

咁樣好似仲尷尬

愈來愈近學界比賽日子，大家練習次數都開始密左

唔單止平時例行練習，有好多隊友仲自己加操去練習

終於...我地所有名都交左上學界體育聯會

我同梓晴正式報名參賽第一年改制嘅混雙比賽

係我地填好晒資料後，立即鬆左一口氣

夜晚返到屋企，我地食完飯各自沖完涼後，就大家係房做返自己野

當我做晒功課之後，電話收到wts

[阿瑪同額娘瞓左未?]

[11點，佢地瞓左啦]

[我過黎可以嗎?]

好在果時我唔係打緊J

[妳過黎啦]

我放低電話後，梓晴好快過到黎

佢依舊著住t shirt同真理褲走入黎我間房

係t shirt間，我見到佢係真空入黎

「做咩事唔瞓覺?」

「冇呀....想過黎」

梓晴除低拖鞋，赤腳咁坐上我張床上邊，雙手抱腳咁坐

佢個樣有d心事咁

「做咩事呀？」

「下星期...就係初賽.....」

「有問題？」

「我第一次係學界比賽...我有d驚」

我坐上床，坐近佢身邊，摸下佢個頭

「我第一次比賽都好似妳咁樣架」

「嗯」

梓晴雙手撓實我，將我拉近佢身邊

然後我聽到佢細細聲咁講

「我怕連累你...怕會令其他人失望...所以我咁多年先唔參賽」

「傻女，比賽一定有輸贏架啦，唔通世界冠軍真係未輸過咩？我都輸過好多次啦，我之前事到差d引退添。如果唔係Polly用眼淚攻勢，我真係唔會出場添呀」

梓晴抬高頭望住我

「你為左Polly而出場？」

「又唔可以咁講嘅」

「佢對你做左d咩？」

「佢.....唔.....」

「快d講」

「佢...錫左我一啖」

梓晴聽到之後，塊面好黑

「咀呀？」

我好驚咁點左下頭

梓晴就靜左落黎

過左大約三分鐘

「妳唔洗呷醋啦，我對佢又冇意思」

梓晴繼續唔出聲，突然!佢推我埋牆，然後佢其中一隻長腿跨過我個身

成個人坐左上黎我到，雙手捉實我塊面

「梓....梓晴?郡主?」

我地兩個就咁對望

而我隻手，就好唔乖咁樣，攤左係到，摸住佢隻腳板，腳趾，再沿小腿再上到大脾

最後到佢條腰

「你好呀!俾其他女仔錫過!」梓晴個樣非常不滿

「咁...果時Polly又飲左酒.....」

「你有冇上佢屋企!?!」

「冇....冇呀...我每次都送到去樓下咋」

「真係?」

「係呀....我點敢呃妳...」

「咁你摸完我對腳未?咸濕佬」

「係....係...唔摸啦」

我迅速擺拎高雙手放係空中

點知道，梓晴佢反而有意見

「我...我冇叫你停呀」

冇叫我停?

然後...我放返雙手係佢對腳上邊

佢面紅紅咁同我講

「我...我想試下....」

試下?

「試....試咩呀?」

「我...咁大個女...都未試過...錫男仔....」

我地兩個靜左一陣，然後佢再開口

「你....可唔可以...同我....」

我諗左一諗，點左下頭

「妳黎啦!!!」

梓晴吸一啖氣，捉住我塊面

錫落去個咀到

大約三十秒，梓晴放開左我

我咁耐以黎錫過三個女仔

第一個係Niki，第二個係Polly，之後就係眼前嘅Jessie

三個之中，梓晴俾我衝擊係最大

「Sorry....我唔應該咁做」

佢似乎有d尷尬

於是，今次到我拉佢埋我身邊

到我主動錫返佢

同時，梓晴雙手攬實我

唔知過左幾耐，我地先鬆開

大家好尷尬咁坐好

「試左啦，妳覺得點？」

「嗯.....」

「咁我地....而家...」

梓晴佢靜靜地諗左陣

「比...比賽完晒先俾答案你啦.....我....瞓啦」

佢一枝箭咁返左入房

我同梓晴.....錫左?互相表明心意?

69.決賽上演

我地兩間學校聯隊準時出現係球場

大家都著住由Polly屋企贊助嘅隊服

係場邊，有好多同學黎睇睇呢一場比賽

一場本應唔受注目嘅比賽，即將上演

今個學年嘅學界羽毛球，被稱為異軍突起嘅一年

我地兩間學校，如果係混雙中奪冠，就係第一次有齋校贏混雙

而且今日仲有港隊教練黎揀人入隊

對上一次成功大滿貫嘅，係體藝中學

其實佢地一直包辦晒羽毛球各獎

對上一次成功擊敗體藝而奪取大滿貫嘅，已經要數到十幾年前，聖保羅男女中學贏果一屆

之前有一間學校同體藝可以打到好激烈嘅，就係新法書院

自從新法結束營運之後，羽毛球就成為體藝天下

今日，我同梓晴將會挑戰呢面高牆

大會宣佈

「現在奏起雙方代表校歌」

首先係體藝校歌，佢地奏出次數係全港學校之冠

然後就係奏起九龍華仁校歌

“Our Captain and Our King”

一唱嘅時候，我以為會好少人唱

點知一開口嘅時候

我就見到對面除左有九華校旗同埋同學之餘，仲有港華嘅兄弟係到

一時間，成場老牛唱歌

終於到梓晴佢地唱校歌

“真光之歌”

其實唔洗諗，我眼見係一片淺藍色長衫校服

佢地四間真光一開口

如雷貫耳

果種氣勢令到對手嚇左一嚇

今日華仁唔分港華同九華，只有一間華仁

同時真光唔分港真、九真、鴨真同油真，今日只有一間真光

同時，Florence、Maggie仲有Caroline佢地都坐左係我地球員席

大家都著住同一隊服

不過佢地見到我同梓晴出場件衫，就忍唔住笑

「Polly姐.....妳屋企公司贊助者...都唔好咁搞法呀？」

「咩呀，我回家姐諗架，唔鍾意呀?立即除衫丫，同我連底褲都除埋佢呀」

“請雙方球員出場”

我相信第一次有對手同情我地

當我地同體藝握手果時，佢地都忍住笑

「有贊助？」

「唔...」

「辛苦晒...一陣借黎影一影」

「你鍾意嘅我送埋件襖俾你都得」

我一轉身，件襖背面就係Polly屋企旗下其中一間餐廳嘅餐牌

XX放題

午市 每位成人130 小童70(身高120cm以上)

全時段

晚市 每位成人 250 小童140(身高120cm以上)

晚市第一時段 1730至2000

每位成人 180 小童110(身高120cm以上)

晚市第二時段 2030至2300

每位成人 190 小童120(身高120cm以上)

*另加一收費

不過Polly同Maggie佢地屋企間放題餐廳又真係幾好食嘅

雙方熱身後，我地返回後備席

今日嘅球隊唔係由兩間學校教練做指示，因為大家都怕兩個意見不合

今日臨場俾指示我地嘅

係我爸爸

前香港公開賽季軍、香港表年軍代表

「老豆、阿瑪」

我同梓晴行埋去聽指示

「佢地攻擊好快，好凌厲，頭局唔好同佢地硬撞，要令佢地心浮氣糟」

「知道」

「阿晴，第一局由妳帶住，如果第一局輸都有問題，但係唔好輸過10分」

「知道阿瑪」

「死仔」

「係...」

「一球10蚊」

「30」

「20」

「殺你」

如果唔用錢嘅話，我嘅真正實力係唔會發揮到出黎

球賽開始

70.依照計劃嘅game 2

雖則梓晴係第一次打學界，但係佢係之前嘅比賽，都將節奏控制得好好

但係今場係決賽

少不免會有心理上嘅壓力

所以對方一開波時，梓晴有少少手忙腳亂

可以話係俾人揪住黎打

雖然係咁，但係佢都用自己嘅技術黎補救下

第一局中段，比賽呈現膠著狀態

你一分呀，我一分咁

不過我地仍然係依住阿爸俾我地咁指示進行比賽

就算係跟足指示出賽，但對手都唔係簡單

梓晴係第一次休息果時都開始要深呼吸換氣

係場邊，阿爸對我地落指示

「暫時幾好，你地繼續示弱，做長敗將軍」

「長敗?但係世伯，而家分數好接近喎」

Polly係爸爸身邊問

「妹妹，我地而家用計謀去贏對方。如果下下同對手鬥攻，的確場波係好睇，但係傑仔同阿晴體力會消耗得好快」

「用計謀呀...唔...」

阿爸胸有成竹咁講「信我啦，對手就快狂攻，我地就係佢不停進攻果一刻，突擊對手」

第一局休息完畢

對方女球手(好受男同學歡迎，不論自己學校定對手學校。佢上身比較重少少)

不停用力殺波(一個大家好鍾意睇嘅動作)

而梓晴做左樣對手冇諗過嘅野，呢招係網球常用招數，不過梓晴借左黎用

佢趁人地殺波果一刻，衝左上前黎個上網

一時間我仲以為佢係舒拉寶娃

佢呢一球上網，令對手跌左眼鏡

可能將羽毛球當成網球咁打，佢地都係第一次見

呢一招，係阿爸教佢

等對方覺得摸熟自己球路果時，同佢地黎個突擊

用d出其不意嘅招數

發球上網呢一招就係咁樣諗出黎

第一局我地依住阿爸俾我地指示去長敗，不過永唔輸超過10分

差唔多係時候，我覺得我地要留返d力去下兩局

所以我同梓晴開始放軟手腳

第一局完

我地以12-21先輸第一局

不過我地成功將對手大量體力消耗

第二局開始前，我地係到傾戰術

「第二局，阿仔你同阿晴交換位打，你主攻對方女球手，阿晴妳係後方不停用遠攻，迫個男仔出錯」

「咁樣...真係有用?」

阿爸點點頭

「信我啦，個男仔基本功冇你地咁扎實，三至四球後佢會出現失誤」

梓晴臨出場時，雙手拍一拍自己塊面，等自己醒少少

「仲緊張?」

「少少一定有，我地落後緊一局」

「所以呢一局妳要發揮自己表現出黎」

「呢句話我同返你講」

「好似係妳緊張d啎」

「乜你唔想....贏左之後同我...唔...一齊行落去咩？」

梓晴講完就行返出場

望住佢背影，睇黎我要落力d打先得

第二局開始，我地依照計劃咁打

我係前面盡快救波打去對方後場

梓晴不停係我地後場殺波過去

一如阿爸所料對方個男隊員嘅基本功唔太扎實，當梓晴一打個對角過去，佢每次都回得好辛苦

佢係靠身高去彌補技術上嘅失誤

不過佢應該唔救得幾多次

當真去到佢同梓晴互猜第四球果一下，佢終於失分

呢一分得黎不易

雖則話對方基本功唔實，但實力都仲係有

當我地贏到8比3果時，對方開始發動攻擊

71. 決勝的game3

一時間，我同梓晴有少少亂

但係我地已經預料佢地會咁樣猛攻

所以梓晴同我互換位置，用佢嘅靈活去換取我殺波機會

佢開始發揮佢問題少女本色

突然間係網前，對方回個波過黎

果球波嘅高度係不利殺波

但係就係果一刻，梓晴運用佢強勁嘅腕力，將個波狠狠咁殺過去對方地下

即使對手之前有睇過我地比賽

但只限八強開始

而且梓晴打波果時，係唔知幾時會抽起筋亂出招

所以梓晴接連拎左幾分

當我地拎到11分，有60秒休息時，對方改變打法

當時比數係11比5

但係當對方轉打法後

佢地又中伏了

因為梓晴佢傻完，變返正常

對方集中係前場，下半節就係輪到我表演我嘅長距離攻擊

去到第15分果時，我跳到最高，然後使出阿爸教我嘅招數

凌空扣殺

呢一下扣殺並唔係咁易學

當初我練左好耐先學到阿爸3成

剩低果7成，我要不停係比賽、同阿爸練波之下先至學到

一招易學難精嘅招式

彈起.....好似隻蝦咁樣.....扣殺!!!!

呢一球球速好快，個羽毛球好似粒子彈咁飛過去

“擦”一下落地聲

係一球in

呢一球，我將對方道氣打窒左

好快我地贏左第二局

不過有一個問題開始出現，我同梓晴開始體力流失好快

我嘅汗對比起梓晴，更多

呢個係我毛病之一

我一向打波都係頭兩局直落贏對手2-0

當我輸左一局之後，去到第三局就一定會流失體力

不過今次比以前比賽好D，冇咁叻

「好啦，第三局」阿爸坐係我地面前講

「阿晴妳第一次打比賽，辛唔辛苦？」

「少少...不過我仲可以應付到」但同時佢自己係到抖緊大氣

「傑...你又點呀？」

我拎住Polly俾我嘅水，但係都唔太飲得落

如果飲太多水，我知道我一定會嘔

阿爸將兩個氧氣罩罩住我地

過後開大枝氣

俾我地盡量多吸氧氣

雖然話策略成功...始終對手係冠軍級人馬，我地嘅體力都要流失好多先打到咁嘅地步

吸左氧氣，體力好左d

「阿爸，有咩指示？」

阿爸同我地講一句

「冇」

「冇!？」我地一齊講

「真係冇」

佢飲一啖水後

「點解冇呢....因為你地兩個已經盡力咁打，到呢個時候我都冇咩指示俾到你。我只可以叫你地兩個放鬆打。唔.....」

「唔咩呀？」

「如果話指示嘅話，我有一個嘅」

「講黎聽下」

「開心打波，享受比賽」

「咩...咩話？」我黑人問號中

「阿傑，你太著重勝負。以前我帶你去打波果時，你笑得好開心」

當然啦，唔洗溫書喎

我不自覺諗返起阿爸以前帶我去打波嘅事

我係未出世果時，阿爸已經受左傷，所以退落黎，打衛生波

每一次佢帶我去打羽毛球，都係好開心

當然佢會懷念下以前打公開賽嘅日子，一班師兄弟打波嘅日子

「爸爸，你唔比賽，冇贏冠軍你唔開心架咩？」

阿爸摸下我個頭

「有時候，贏到冠軍唔代表一切。如果一直咁贏，令會自己散慢。不過最重要呢，係要開心，如果打波打黎都唔開心，不如唔好打」

係細個時，每一球波我都打得好開心

係公園內同小朋友打羽毛球，特別係發育緊嘅中學大姐姐

就更加開心

睇住D波s飛黎飛去，令人心曠神怡

「阿傑，記住爸爸所講，打波會帶俾你歡樂同開心」

我慢慢記起細個時嘅事

打波係要令自己開心，有時即使輸波，令到自己冇得著，都可以係一件好事

如果今次我出賽而令我最大嘅得著.....

一定係坐係我身邊嘅佢

我將呢個本應孤獨自己一個人嘅郡主，係黑暗之中拉出黎

而家仲同佢住係同一屋簷下

如果話俾大家聽，我對阿晴冇野，就咁係當佢妹妹咁睇，就一定係呢你

72.勇戰受傷

阿爸兩下掌聲令我回魂

「好啦，上場啦」

「上場？」阿晴仍然一面呆

「放心啦，冇指示我地都打到波架嘛」

阿晴跟住我行出場

「係咪真係得架？」

「只要開開心心打波咪得囉，唔洗理贏輸架。唔通妳想唔開心咁打波？」

阿晴諗左諗答我

「又唔係嘅」

「咁妳同我打波時開唔開心丫」

阿晴聽到我咁問就好怕羞咁答我

「你...你知架....我同你都錫左啦...同你打波點會唔開心者...」

「咁咪得囉，我地打完波再一齊行街囉」

「咩...咩喎!!!咁簡單就要我做你福晉呀?你諗得太天真啦」

阿晴企定定嘍長個咀

然後....我行去佢面前，彈左佢額頭一下

彈完佢之後發現佢紅面面咁，微笑望住我

「我唔當係架...我要你正正式式同我講清楚架」

我搵一搵佢個鼻

「無論贏輸，妳都會係我福晉」

佢好開心咁打左我一拳，之後我地各自企好位

第三局，決勝局開始!!

對方開出一個波，今次佢地都好謹慎

因為已經係決勝局

頭五至六分，大家都互有領先，如果一有失誤的話...

所以第三局係比較悶，大家似係到互猜咁樣

其實我咁做，係等緊

等咩？就係等對方發起攻勢果一刻

因為梓晴好擅長打反守為攻

終於...對方開始猛攻，正中我地下懷

我地同時發起反攻，一時間氣氛非常緊張

只要有一下失誤，就足以影響戰局

場內場外都非常安靜，我地四個每一球都好用心打

大家變得非常享受比賽

但始終，呢場係一場比賽，仲要係決賽

所以激烈程度一定好大

去到11-9時，我地落後2分

到11分果陣，我地有30秒飲水時間

Polly幫我地抹好汗後，我地兩個再踏出球場

期間我地一句話都冇同對方講，因為大家都想爭取時間抖下氣

我臨行出場時，阿爸拍一拍我隻左手

我亦知道佢想我做乜

比賽繼續

每一分都得黎不易

直到去到18-18果時.....

地下上嘅汗愈來愈多，因為我地唔係職業賽，唔會有人幫我地抹地下

對手吊一個高波過阿晴到，佢退後退唔切，正當個波就黎落地in果時，我係老遠殺到

飛過去伸盡右手同塊拍，希望救到呢一球

同時我右手著地，聽到“ 架” 一聲

我隻右手好似....甩左骹....痛意好快傳到我全身

呢球救唔到之餘，我仲係呢個重要時刻受傷

73.解除封印

裁判立即叫停左比賽

急救人員過黎摸一摸我隻右手，發現甩左骹

雖則問題唔太大，但都好痛

兩個教練係到傾，諗緊會唔會認為棄權會比較好

「阿傑你認為呢？」紫菜將個波交返俾我

我環顧四周。兩間學校嘅羽毛球隊都等緊我自己做嘅決定

而我都做出左一個決定

「裁判我可以繼續」

裁判考慮左一陣後宣佈「比賽繼續」

現場所有觀眾都唔可以相信裁判所講嘅說話，所以佢再宣佈多一次

「應華仁及真光聯隊代表要求，比賽繼續」

已經準備慶祝嘅對手紛紛放低手上嘅毛巾，而對方教練亦走出黎抗議

後備席箱好多同學隊員紛紛走過黎我身邊

唯獨係阿爸知道，係我身上嘅枷鎖，今日將會俾我打破

急救人員係我右肩綁上彈性繃帶，以防止更嚴重甩骹

然後我起身，行上球場

「傑.....傑呀....你真係要繼續？」梓晴係我身後不停問

我轉身對住佢講「我唔想同妳行到呢一步先投降」

「但係我地仲有出年丫嘛」

我擰擰頭

「妳望住個鐘，呢一分鐘過左就係過左，永遠唔會再返黎。」

佢又真係望住個鐘喎，所以我再順勢講

「所以我地今次機會只有一個，下次又會唔同情況，所以我想捉緊呢個機會」

梓晴自己企係到諗緊我所講嘅野，自己係到思考

「即使呢場係你最後一場比賽，都冇所謂？」

「同妳一齊打...同自己福晉打，我仲有咩所謂」

「咩呀...我未應承你架....打贏左先啦」

我地兩個再次企係球場上，唔同嘅係，我用左手握拍

最後呢三分，我要一口氣贏返黎

對方見我用左手握拍，佢地希望儘快解決呢場比賽，所以佢地一開波就向我猛攻過黎

頭幾球梓晴不停左飛右撲咁護住我

大家都認為我地應該放棄比賽，係一下大家冇為意情況下

我跳起...用左手殺左一球

我殺呢一球比平時球速更快、力度更狠

對方女隊員想接呢一下，但球速實在太快，佢只係塊拍輕輕掂到個波

然後就係一下in

大家見到我呢一下跳殺後，先開始Load到發生咩事

事實係，我一直將自己左手封印

因為我咁多年都係控制唔到殺波嘅力度

「左拗...」

我可以用左手打波呢個事實，係場上只有我屋企人知道。如今我為左比賽，要贏呢一場比賽而將自己左手解封

74.終於...(結局)

今次換轉到我開波

因為右手有傷關係，開波一定有反影響

所以我用左手拋起個波，再兜低打個波過去

開波一開，吊去對方後場，對手睇機會黎一球殺球想儘快搶分

梓晴見到對方嘅凌厲殺球，佢好快走到應該企嘅位，搶左呢一球過去對面場區

對方再一次殺球

今次佢冇咁簡單

我成個人彈高，拗腰，再大力Cup落去

又係一球好快好勁嘅波，再一球IN

最後一分.....我流住大汗...忍住右肩嘅傷患去接呢一球

今次對方用盡力同我互猜！約10板之後...

個波係非常高點落黎...係瞄準個波，用力將左手手肩拉後

然後黎個殺波，呢一下聲音非常清翠

我用左手...完結左呢一場賽事

我地...贏左冠軍

當裁判宣布我同梓晴贏左後....大家好快咁衝出黎抱住我，果種感覺，就好似係夜總會一個啖幾十個小姐陪我咁樣

「喂喂!!借開借開!!!我地睇下傑仔右肩先」

阿爸好到我身邊，拆晒D繃帶就叫梓晴捉實我

「好啦阿晴，捉實阿傑。文浩，幫幫手」

「不如去醫院會唔會更好呀?」

「唔會」

阿爸一托一推，我個駁就返左原位。但係換黎嘅係我嘅慘叫

「阿瑪...咁樣佢有冇事架?」梓晴有少少擔心

「唔緊要，佢細個經常甩骹。而且痛果個唔係我」

嘩!呢個咩阿爸黎架!!!!

「準備....1....2.....」

未講到3，阿爸已經將我個骹托返好，而我嘅痛，係非一般嘅痛

大家等呀等，終於到左頒獎時間

嘉賓將金牌掛係我地頸上果一刻，我同梓晴都好開心

Polly同大家講星期五晚係佢屋企間放題到搞慶功宴，大家真係唔洗俾錢，因為係爸爸包晒

慶功宴上，所有女仔都食得好開心

而粗口都唔少

我同梓晴係街到行，兩個非常之Close

我之前同佢講過嘅野，唔可以言而無信

所以，我係佢唔為意果時，拖起左佢隻手

「你唔後悔?我會跟住你一世㗎」梓晴講果時，咀角上揚

「點解我要後悔?我好認真架」

「咁本郡主俾一道命令你」

「接旨」

「你要一生一世錫晒我、照顧我，唔可以有其他女仔」

「臣領旨」

然後，我地兩個將個咀緊貼大家

大約10年後...一個婚禮場地，有真光羽毛球隊嘅隊員做姊妹

九華羽毛球隊嘅隊員做兄弟

Reception上，擺放左兩塊羽毛球拍....

成長片段上，播出一對新人嘅相片，以及

10年前首屆聯校混雙冠軍相片

最後就係.....

Polly屋企嘅贊助廣告

完

聽日會發表後記，同埋下一個故嘅事宜

75.後記

大家覺得呢個故點呀?我諗左好耐先諗到呢個故嘅大綱同細節

原因，係我完全唔識打羽毛球嘅，但係我為左呢個故，真係走去睇羽毛球規則，睇羽毛球比賽

原來認認真真打一場羽毛球，係辛苦過你踢一場波

好高興可以抽身出黎，完成一個唔係女校男生嘅故事

雖然結尾係差左少少，我會檢討下架啦

不過有d讀者朋友仲想回味一下女校男生故事

有機會嘅，總有機會

內容都打好晒架啦

而且篇幅仲要唔短下，本來想打少少.....結果我又重複犯錯，又打左篇大長篇出黎

希望到時大家會鍾意啦